

**NINTH MIZORAM LEGISLATIVE ASSEMBLY
(FOURTH SESSION CUM BUDGET SESSION)**

LIST OF BUSINESS

FOR THIRD SITTING ON MONDAY, THE 3rd MARCH, 2025
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **DR. VANLALTHLANA**, Minister to lay on the Table of the House “Mizoram State Higher Education Council Rules, 2024.”
3. **PI LALRINPUII**, Minister to lay on the Table of the House a copy each of the following :
 - i) “Annual Report of the Office of the State Commissioner for Persons with Disabilities, Mizoram for the year 2022-2023 and 2023-2024.”
 - ii) “The Annual Reports of Mizoram State Commission for Protection of Child Rights (MSCPCR) for the year 2023-2024.”

PRESENTATION OF REPORT

4. **THE SPEAKER** to present to the House the Fourth Report of the Business Advisory Committee for the current Session.

LEGISLATIVE BUSINESS

Bills for introduction, consideration and passing

5. **PU LALDUHOMA**, Hon. Chief Minister to beg leave of the House to introduce “The Mizoram Goods and Services Tax (First Amendment) Bill, 2025”

ALSO

to introduce the Bill

to move that the Bill be taken into consideration

AND

to move that the Bill be passed.

6. **PU LALNGHINGLOVA HMAR**, Minister to beg leave of the House to introduce “The Mizoram Youth Commission Bill, 2025”

ALSO

to introduce the Bill

to move that the Bill be taken into consideration

AND

to move that the Bill be passed.

7. **PU LALNGHINGLOVA HMAR**, Minister to beg leave of the House to introduce “The Mizoram Private Placement Agencies (Regulation) Bill, 2025”

ALSO

to introduce the Bill

to move that the Bill be taken into consideration

AND

to move that the Bill be passed.

VANLALTHANTLINGI
Commissioner & Secretary

SPEAKER : *Zilhtu pawhin zilh tlat rawh se; thil petu chuan ui lovin pe rawh se; rorêltuin taima takin rêl rawh se; mi khawngaihtuin lâwm takin khawngaih rawh se.*

- Rom 12:8

Vawiinah kan member-te, Er. H. Lalzirliana leh Pu RM Chakma te rolkhawlhna avângin kan zîngah vawiinah an awm thei dawn lo a tih hian House ka hriattir e.

Kan hmaa tablet-te hi khawngaihin password thlak loh ni se; password thlak kan lo awm thin a, harsatna an tawk deuh hlek a. Kha kha member te'n kan hre dâwn nia.

Member-te hnenah ngenna siam ka'n duh a- Legislature Party hi ðu zing deuh hlek thei ta ila. Kha hmannah kan hmu a, sawi hun hawn lain tur kan awm lo a, kan chhuak duak a. Chuan, allotted time pelh fê hnu ah kan han lut khâwm leh a, wholesale-in kan han phar khawm leh ta kha ania. Khatiang lo deuh hlek khan kal hrâm hrâm tum ila. Kan hruiatu hmasa te, zahawm taka House an lo kalpui tawh leh hunbi fel taka an lo vawn te kha chhawm nun hrâm hrâm kan tum dawn nia.

Hemi chungchanga Parliament kan entawn ber, Indian Parliament leh kan parent body ni baw, Lok Sabha Secretariat- te hian hemi chungchângah hian eng nge an sawi ilo thlir lawk ila, display han ti rawh u le.

(Screen display of 'Practice and Procedure of Parliament, 2024 Edition: Lok Sabha Secretariat, New Delhi, Chapter 32- Pp 999')

Hei hi 'Practice and Procedure of Parliament, 2024 Edition a ni a. Hei hi Lok Sabha Secretariat, New Delhi publication, Chapter 32, page- 999 a a inziak -

"No member can claim to speak as a matter of right: he should try to catch the Speaker's eye and wait for his turn. The one who is called upon to speak is deemed to have caught the Speaker's eye. A member who tries to catch the Speaker's eye by shouting may not be called; so also, a member who does not stick to his seat. A member who is absent or inattentive and does not respond when called upon to speak loses his chance. The one who is not called upon to speak has no right to protest against the decision of the Speaker", tih a ni a.

A Mizo ðawngin han sawi leh ta ila:

"Member tumahin mahni dikna ti a duh hun hun a thusawi hi kan chanvo a ngaih mai tur a ni lo; Speaker mit in a hmuh hun a chang ang a, a thusawi hun a nghak tur a ni. Speaker-in thusawi tura a koh te chu Speaker mitin a hmuh a ngai a ni. Aw rawl chhuaha Speaker mit lak tum a au bengchheng te chu hun pek an ni kher lovang; chutiang bawkin member tu pawh a ðhuthmun a ðhu lo pawh a ni tho. Member kallo emaw, ngaihsak lo emaw, hun hawn sak an nih lai a ding lo te chu an hun tiam an hloh tihna a ni. Thusawi tura koh an nih loh pawhin member ten Speaker thutlukna chu sawi an sawi buai thei lovang."

Vawiinah business kan nei nual mai a. Zawnha leh chhana hun kan hmang ang a, chuan Laying of Papers, Dr. Vanlalhlana leh Pi Lalrinpuui, Minister zahawm tak tak ten “Mizoram State Higher Education Council Rules, 2024” te, “Annual Report of the Office of the State Commissioner for Persons with Disabilities, Mizoram for the year 2022-2023 and 2023-2024” leh, “The Annual Reports of Mizoram State Commission for Protection of Child Rights (MSCPCR) for the year 2023-2024” te hi House dawhkanah an rawn lay ang a. Chuan Business Advisory Committee Report kan present leh ang a.

Tichuan, Legislative Business-ah Government Bill sawi ho tur pathum kan nei a. “The Mizoram Goods and Services Tax (First Amendment) Bill, 2025”, Pu Lalduhoma, Chief Minister zahawm tak hnen aʔangin kan dawng a. Tin, Minister zahawm tak, Pu Lalngchinglova Hmar hnen aʔangin bill pahnih, “The Mizoram Youth Commission Bill, 2025” leh “The Mizoram Private Placement Agencies (Regulation) Bill, 2025” te kan dawng a. Kan sawi ho dawn a ni.

QUESTIONS & ANSWERS:

Starred Question No. 21: Law & Judicial Department chungchang

Zawnha neitu: Pu Jeje Lalpekhlua, South Tuipui Bialtu

PU JEJE LALPEKHLUA: Pu Speaker ka lawm e. A hmasain vawiin niah Starred Question tam tak zingah zawnha hmasa ber ka chang thei hi he House zahawm tak kaltlang hian lawmthu ka sawi duh a. Law & Judicial Department changtu Minister leh kan Chief Minister ni baw, Pu Lalduhoma chhan tur atana ka zawnha chu:

“Hnahthial District-ah hian Law & Judicial Department hawn tumna a a awm em?” tih hi a ni e.

SPEAKER : Aw le, a chhang turin Law & Judicial Department changtu, Chief Minister zahawm tak, Pu Lalduhoma ilo sawm ang.

PU LALDUHOMA, CHIEF MINISTER: Pu Speaker, a chhanna chu- “Hnahthial District-ah Law & Judicial Department hawn tumin hmalak mek a ni.”, tih a ni e.

SPEAKER : A lawmawm e. Zawhbelhna zawt turin member zahawm tak, Pi Baryl Vanneihsangi ilo sawm ang.

PI BARYL VANNEIHSANGI: Pu Speaker, ka lawm e. Law & Judicial Department changtu Minister zahawm tak ka zawhbelhna chu- “Law & Judicial hian Directorate hran neia bifurcate tumna a awm em?”, tih a ni e. Ka lawm e.

PU LALDUHOMA, CHIEF MINISTER: Pu Speaker, tunah chuan Law & Judicial Department Directorate-a siam emaw, bifurcate tumna emaw a awm rih lova. Hun lo kal zelah te erawh chuan kan sawi phak lova, a ʔul hun te pawh a la thleng mai thei a.

Hemi paha member zahawm tak ten kan lo hriat belh atana ka'n duh chu, tunlaiin khawvel pumah leh India ramah e-office kal pui a ni a. Keini pawhin kan kal pui mek a. E-office hi a taka kan hman chhoh zel chuan manpower kan mamawh hi a tlem tual tual dawn a ni.

Chuvângin tunah hian vacancy han fill-up tul ang ang te pawh e-office kan hman hunah chuan heng hi kan mamawh dawn lova tih rilru, khami hisap nen khan kan kal pui a. Chuvâng chuan kan Sorkar in thawktu a mamawhna hi tunah hian nasa viau mahsela, e-office kan hman hi chuan a ziaawm chho dawn a ni tih kha ka'n sawi tel duh a ni e. Ka lawm e.

SPEAKER : Zawhbelhna dang a awm loh chuan,

Starred Question No. 22: Aikal chungchang

Zawhna neitu: Pu R. Rohmingliana Thorang Bialtu.

PU R. ROHMINGLIANA: Pu Speaker, ka lawm e. *Starred Question 22*-na, General Administration changtu, Hon'ble CM chhan atan:

- a) Vawiin ni thlengin Sorkar hnathawk aikal la an la awm em?
- b) An awm chuan Department tin ami an hming, post chelh leh engtik atanga aikal la nge an nih min hrilh thei em?

SPEAKER : Chhang turin a changtu Minister leh House Leader ni bawk, Pu Lalduhoma ilo sawm ang.

PU LALDUHOMA, CHIEF MINISTER: Pu Speaker, a zawhna chhanna chu-

- a) Aikal la an awm hriat a ni lo.
- b) N/A

SPEAKER : Zawhbelhna zawt turin-

1. Pu R. Rohmingliana (Zawhna neitu),
2. Pu H. Ginzalala,
3. Pi Prova Chakma,
4. Pu C. Ngunlianchunga.

PU R. ROHMINGLIANA: Pu Speaker, ka lawm e. Lo awm ru ta si se, hremna hi lek kawh a ni angem? Tute nge in hrem ang?

PU H. GINZALALA: Pu Speaker, ka lawm e. Hon'ble Chief Minister zahawm takin min chhan atana kan zawh duh chu hei Guwahati Mizoram House te a lo tawt em em tawh a, tunah hian 6 miles GS Road Guwahati ah ram tha deuh mai kan nei a ni tih hi ka hria a. Tah hianin sum kan neih ang angin thil tih vut vut theih pheih chu a ni miahlo ang a. Kan neih hunah, pawisa kan neih hunah, Mizoram House te hi a dang sak belh theih dan a awm ang em? tih hi ka zawhna a ni e.

PI PROVA CHAKMA: Pu Speaker, ka lawm e. Kan GAD Minister zahawm tak chhan atana ka duh chu –

Natna khirh tak tak vei te an awm a, chung chu consider dan a awm em? tih kha a ni e. Ka lawm e.

SPEAKER : Zawhna pathum kan la ta a, zawhbelhna kan senior Pu Nguna hian a la phar lauh lauh mai a, kan la leh hram dawn em ni ang? La leh hram ang aw. Pu C. Ngunlianchnunga ilo sawm ang.

PU C. NGUNLIANCHUNGA: Pu Speaker, ka lawm e, min duhsak thin a. Tunah aikal chhawr an awmloin sawkarin a hria a. Samagra Shiksha hnuai ami te hi Mizoram sawrkar hnuai mi an ni ve em? Aikal an awm em? tih kha ka zawhbelhna a ni e.

SPEAKER : Le, zawhna kha a inkarkik angreng a, a theih ang anga chhang turin House Leader ni bawk Pu Lalduhoma ilo sawm ang.

PU LALDUHOMA, CHIEF MINISTER: Pu Speaker, ta se tih a ni a, zawhna hmasa ber kha, lo awm ta sela tih kha awm pawh an lo awm maithei reng a. Chuvang chuan grace period kan siam a, hemi hun chhung hian aikalte chu an insiamrem tur a ni. Grace period a pelh tawh hnuai kan man chhuak che u a nih chuan appropriate action kan la dawn a ni kan ti a. Chu chu an lo la awm a nih chuan helaia kan Member zawng zawngte leh mi zawng zawng sawkarah information min pe turin ka duh a.

Tin, chung chu lo la awm nise, anmahni leh an thawhnaa officer lo chhawrtu a kha an pahniha chungah a tul angin action kan la ve ve tawh ang. Hei chen hun kan hawng tawh a, chupawh zah lova lo la tilui kan awm a nih chuan hremna an tawh ang angah an phunnawi thei lovang. Tin, Samagra Shiksha hi Mizoram sawrkar hnuai tho a ni a, zirtirtute pawh hlawh kan pek tawmte an ni a. Chuvang chuan anni pawh a huam vek a ni.

Tin, Guwahati ah Mizoram House sak belh a ni dawn em tih hi Guwahati chauh nilovin Bangalore ah te, Mumbai ah te, leh Churachanpur ah te pawh kan mamawh khawp mai a. Kan sum atanga han ti tur chuan tunah hian kan tlin rih lova, amaherawhchu tun hnaiah hian Mumbai-ah hman tawh atanga kan ram neih sa tura sawkarin a agreement a lo siampui sak la ni chuang lo khu terminate kan tum a, a contactor khu. A sakna sum kan sawrkar sum seng lova ngaihtuah thei tur leh sa theitu tur ten min rawn dawr a, chu chu a kal mek a, an thei tak tak dawn leh dawn loh erawh chu a takin kan la hria ang a. Anmahni sawi dan chuan Bangalore ah te leh Churachandpur ah te leh a tul tulah tiang hian kan kalpui zel thei ang an ti a. Chu chu a tak tak a nih dawn leh dawn loh kan la nghak mek a. Thil lawmawm takah chuan kan ngai phawt a ni.

Tin, Pi Prova-i zawhna kha ka chianglo tlat mai a, natna khirh tak tih lai kha i han sawi nawn leh thei mai em le?

PI PROVA CHAKMA: Pu Speaker, damlo serious tak tak te aikal la an awm a nih chuan consider theih dan a awm em tih kha a ni e.

PU LALDUHOMA, CHIEF MINISTER: Aw le aw le. A awm lo a ni, Pu Speaker.

A awmlo a, kan sawkar hian hemi hrulah hian ‘Service Review Committee’ din vek tura tih a ni a, Department zawng zawngah. Service Review Committee chuan an department theuha hnathawkte engvang pawha an hna chhonzawm lo, titheilo te tan Special Voluntary Scheme a buatsaih sak a ni. Chumi hnuaiah chuan thawk theilo na na na chu an chawl mai turah ngaih a ni a. Kan sawrkar hnathawk quality hi kan siamthat loh chuan sawkar a chak thei lova.

Kan huanah hlawhfa kan rawih pawhin thawk theilo chu hlawh kan pe ngailo a ni. Chuvang chuan sawrkar pawhin keimahni sawrkar hnathawk mimalah theuh hian investment a rawn ti a, chu a investment tihna chuan production a rawn neilo a nih chuan a thawk zel theilo tihna a ni a. Amaherawhchu a pawng a puia inban kha kan tum lova, hnhemnang taka, rilru nuam tak chung a chawlh theih dan kawng zawnsak a ni a. Chumi kawng chu an zawh mai turah kan ngai a ni.

SPEAKER : A lawmawm e. Vawiin chu kan House Leader leh kan Home Minister te an rim deuh dawn em mawni chu aw. Hei Home lam kan hawi leh ang a, a awm chho deuh tlah tlah a.

Hei attendance ka’n en a, kan House Leader te hian hmahruai awm tak a ni a. A la absent tlat mai a, khawngaih han present se a va se a va duhawm em, ka’n ngen teh ang. Tin Pu V.L. Zaithanzama leh Pu W. Chhuanawma te kha han present ve hram ula, in hmaa tablet kha.

Starred Question No. 23: Police chungchang

Zawhna neitu: Pu Lalrinsanga Ralte, Serlui Bialtu

PU LALRINSANGA RALTE: Pu Speaker, ka lawm e. Home Minister chhan atana ka zawhna chu hengte hi a ni e –

- a) Mizoram Police Act, 2011 hnuaiah hian Rules kan nei tawh em?
- b) Kan la nei lo a nih chuan nei tura hmalakna a awm em?
- c) Awm ta se eng nge tunah a thlen chin?
- d) Tuna Police Constable lak turah hian Eligibility eng nge? tih leh
- e) Eligibility ang hian kan kal em? tih a ni e.

SPEAKER : Chhang turin Home Department Minister, Pu K. Sapdanga ilo sawm ang.

PU K SAPDANGA, MINISTER: Pu Speaker, Serlui bialtu zahawm tak, Pu Lalrinsanga Ralte zawhna chhanna chu hetiang hi a ni.

- a) Mizoram Police Act, 2011 hnuaiah hian Rules kan la neilo.
- b) Nei tura hmalakna a awm e.
- c) Tunah hian Draft Rules buatsaih mek a ni.
- d) Tuna Police Constable lak turah hian Eligibility chu hengte hi a ni –

Educational qualification: High School Leaving Certificate or equivalent examination from a recognized institution.

Height: Mipa (General) ah 168 cm; Scheduled Tribe/Scheduled Caste ah 163 cm; relxataion 158 cm thleng.

Hmeichhia (General) ah 157 cm; relation 153 cm a ni ang.

Weight: Mipaah bithliah a awm lo.

Hmeichhia (General) ah kg 45; relaxation kg 44.

Awm (Chest) len zawng: Normal 84 cms, Expanded 89 cms.

Long jump: Mipa - 3.30 meters, Hmeichhia - 2.25 meters zuang thei chin.

High jump: Mipa - 1 meter, Hmeichhia - 80 cm long.

Long-distance Race: Mipa - 1 km/5 mins; Hmeichhia – 1km/8 mins.

100-Meters Race: Mipa – 100 m/15 secs; Hmeichhia – 100 m/18 secs.

Age: Kum 18-28 inkar; Relaxation - ST/SC tan kum 5 thleng; OBC tan kum 3; Ex-Servicemen tan DP&AR OM notification angin relaxation pek tur a ni; Meritorious Sportsperson tan kum 5 thleng; SC/ST tan kum 10.

e) Heng eligibility ang hian kal tum ni e. ka lawm e.

SPEAKER : Kan Minister zahawm tak kha ST/SC tan khan in khami chest (awm) kha ngaihnamna kha a awm deuh hlek em aw? Chest (normal)-ah hian 79 cm tih leh expanded-ah 84 cm tih kha sawi a awm a, kha kha a dik em aw?

PU K. SAPDANGA, MINISTER: Pu Speaker, dik e. Awm len zawngah khan SC/ST tan a pangngaiyah 79 cm a ni ang a, tih len in 84 cm a ni ang.

SPEAKER : A lawmawm e. Le, zawhbelhna zawt turin-

1. Pu Lalrinsanga Ralte (Zawhna neitu),
2. Pu H. Ginzalala,
3. Pi Prova Chakma.

PU LALRINSANGA RALTE: Pu Speaker, ka lawm e. San zawngah khan relaxation siam a ni a, a pangngaiyah 163 cm, hmeichhia 158 cm tih a ni a. Amaherawhchu, relaxation 157 leh hmeichhia 153 a ni a. Police atan hian fit tha, physical tha, fit tha lak tur an awm lo nge, hemi hi san zawng engvanga tihnam nge kan nih kha a chhan kan zawt duh a. Tin, Pu Speaker, kan Home Minister hian a lo hriat leh zawhna kan zawh duh a chu – MNF sorkar lai khan khumi Phainuam Buarchep leh Vairengte area a kan buai hrep kha kan la hre tlang ang a. Khami Buarchep kan buaina hmunah khuan Assam Police in Duty Post an rawn siam hnanna Pu Lalnuntluanga huan a awm a ni. Chu chu status quo-ah dah luh a ni a, a awm vek tawh a. Mizoram leh Assam in a kan buaina thil thlenna hmun laia kha lehlam lehlam in khawih lo ve ve tura thu rem a ni.

Amaherawhchu, tunhnaiah Pu Lalnuntluanga huan khu Assam in an rawn khawih leh ta a. A hma khan sangha dil an sah sak vak mai a, enkawl lohin kum 2 kum 3 an awm chho a. Tunhnaiah Assam sorkar in sangha dil te rawn siam in a bulah kawng te an rawn siam a, block te an rawn phah leh ta vek mai a. Hei hi Mizoram sorkar in a hria em tih hi ka zawhna pakhatna ni ta se. Tin, MNF sorkar lai khan khulai kan buainaah Buarchep tlangah khuan Police Duty Post 2 Kan dah thin a tunah hian a awm ta lo va. Hei engvangin nge Police Duty Post 2 hi lak chhuah a nihna chhan tih kha ka zawhna ni bawk ta se.

Tin, Pu Lalnuntluanga te hi eizawna dang an nei lo va. An huan sangha dil 4 khumi khu

an inngahna ber a ni a. Assam Police ten an rawn thutchilh tak si avangin MNF sorkar lai khan Duty Post saknaa contract te kha kan pe a. Tin, hei kan Leader of Opposition, Education Minister a nih lai khan SEDP teacher-ah an fapa thun a ni bawk a. Tunah hian SEDP teacher tih tawp a ni ta a, an khawngaihthlak khawp mai a. Sorkar hian Pu Lalnuntluanga chhungkaw tan hian eng emaw tih sak theih kan nei em tih kha ka zawhna a ni bawk e.

PU H. GINZALALA: Pu Speaker, ka lawm e. Hon. Home Minister in min chhan atana ka duh chu ka bialchhung Champhai lamah Police quarter te leh office building te a chhe ang reng tawh viau mai a. Remchang hmasa berah sorkar in pawisa a neih ang in min siamthat sak thei ang em tih leh Hnahlan Beat Post-ah hian Police tlem te kan in dah thei hram a tun dinhmunah. Nakinah Police tam zawk te kan lak theih hunah a tam zawk min dah belh sak thei ang em tih hi ka zawhna a ni e, ka lawm e.

PI PROVA CHAKMA: Pu Speaker, ka lawm e. Home Minister zahawm tak chhan atana ka duh chu – kan bial Tlabung Police Station-ah hian staff hi an indaih lo riau a. International boundary kan nihna angin tunah hian staff kan neih zat Inspector kan nei lo va, Asst. Sub-Inspector 1 kan nei a, Head Constable 1, Constable 5, IV grade kan nei lo a. Heng staff te hi dah khah tum na a awm em tih a ni e, ka lawm e.

SPEAKER : A theih ang ang a chhang turin Home Department changtu Minister Pu K. Sapdanga ilo sawm ang.

PU K. SAPDANGA, MINISTER: Pu Speaker, zawhna siamtu in zawhbelhna a rawn siam hemi san zawngah hian relaxation siam a ni ta hi kan Mizo te zingah tling an awm ta mang lo em ni tih a ni a. Hei hi tunhma atangin hetia mass recruitment siam reng reng in relaxation siam ziah a la ni a. Tun tumah hian siam loh tuma Police manual ang thlap a tih tumna an awm hmasa phawt. Tichuan, mipui lam atangin leh hmung sawi remchiah kher lo, House member Ruling lam pawh a ni a, Opposition lam pawh a ni a.

Kum dangah relaxation an siam tho si a, engatinge kuminah hian siam in tum loh? tih zawhna a tam em em mai a, chuvangin kan hotuten relaxation hi i siam leh mai ang, sorkar hmasa tihdan angin kan ti a nih chu. Chuvangin relaxation hi siam a ni e.

Tin, zawhbelhnaah khanin ramri chungchang a rawn awm nual a, tin, ramria harsatna taww mimal chungchang te a awm a, tin BOP chungchangte a awm a, khang ho kha dik zawka kan chhan theihna turin wind up note ah rawn telh kan tum dawn nia.

Tin, Champhai N bialtu Pu Ginzalala zawhna bialchhung Champhai lamah Quarter chhia a awm a, hei hi siamthat tumna a awm em? tih a ni a. Champhai North mai nilovin ram pumah Police quarter te leh Office te hi siamthat ngai vek mai an ni a, chu chu Session zawhah hian department hotute nen uluk zawkin chhui zui teh ang u, khawi khawi nge ngaihdam theih tawh loh te, tawngkam chuan thudah kan lo nei mek a ni.

Police dah belh chungchang Pi Prova-i member zahawm tak zawhna kha Tlabung chang ni

loin hmun tinah hian indaihlohna hi a nasa em em mai a, tunah hian Police post ruak hi sangli leh zali sawmriat vel a awm a ni. Chumi phuhruk nan chuan sorkarin theih tawpa tan a'n lak a lak belh theih zat sangber tur chu tuna recruitment kal mek hi a ni a, 200 chauh mai a nia, chuvangin 200 hian phuhruk kan han tum phawt dawn a ni. Chumi hnuah remchangah sorkar dinhmun a zirin la lak belh zelte pawh a hun ang chu. Chung hunah chuan Tlabung Police Station te leh hmundang Champhai North a ni emaw, hmundang pawh theih ang anga thuum tum a ni e. Ka lawm e.

SPEAKER : A lawmawm e. tunah chuan *Starred Question no. 24* naah kan kal ang. Zawt turin Member zahawm tak Dr. Beichhua ilo sawm ang.

Starred Question No. 24: Halpuah hal chungchang
Zawhna neitu: Dr. K. Beichhua, Siaha Bialtu

DR. K. BEICHHUA: Pu Speaker, ka lawm e. Kan Minister zahawm tak hnena ka zawhna chu –

Halpuah hal avangin mi engzatnge thubuai siamsak an nih? tih a ni e.

SPEAKER : Chhang turin Home Department changtu Minister Pu K. Sapdanga ilo sawm ang.

PU K. SAPDANGA, MINISTER: Pu Speaker, Member zahawm tak Dr. K. Beichhuua zawhna – chhanna chu

Halpuah hal avangin mi 68 man a ni a, case 55 register a ni a, mi 63 lakah thubuai siam sak anni tih a ni e. Ka lawm e.

SPEAKER : Aw le, zawhbelhna zawt turin -

1. Dr. K. Beichhua (Zawhna neitu),
2. Pu Robert Romawia Royte,
3. Pu TBC Lalvenchhunga,
4. Pu Lalrintluanga Sailo.

DR. K. BEICHHUA: Pu Speaker, ka zawhbelhna chu kan sorkar hian halpuah leh a kaihhnawihah hian a strict viau mai a, khang sorkar dan bawhchhiate kha engtia hrem nge an nih? Point khatna nise.

Point hnihnaah chuan, Mizoram khawpui hrang hrangah hian kan hriat angin Two-wheeler ah hian proton vuah ring zet zeta tlan ring taka tlan jet fighter a rawn tlan emaw tih mai tur a zan lamah an awm thin a, heng hi dan phal a ni em? phal ni lo ta se, sorkar hian engtinng hma a lak?

Tin, nichina zawh ka tum deuh kha Police weight specification awm lo kha, engvanga a rih zawng kha specification awm lo nge a nih chhan? Mihring pianphung a in ang lo viau mai a, mipa kg 45 tling lo a awm ve theih a ni. Mipa kg 45 tling lo ta se, khang te kha lak a ni theih dawn em?

Tin, Police recruitment hi Aizawlah chauh em ni tih a nih? District hrang hrangah recruitment hi tih a ni ve ang em? tih kha ka zawh belhna a ni e.

PU ROBERT ROMAWIA ROYTE: Pu Speaker ka lawm e, Home Minister zahawm tak chhan tura ka zawhna chu – 1. Tuna Police lak turah hian sorkar hmasa hun laia Sport thei bik te pual a quota 5% lo dah kha, kha dan kha apply a ni dawn em? tih a ni a. Ka'n sawi thui hret ang a. Sports person te hi an hlu a, kan hre vek ang a, State dangah chuan quota pawh hi an pe tha hlawm khawp mai a, sorkar hmasa hun lai khan 5% chin kha Group B atanga Group D kha permanent recruitment ti mai ila regular recruitmentah chuan sport person ten an intihsiak ve turin quota hranpa kha siam a ni a. Chu chu tuna Police lak turah hian hman a ni ve dawn em tih kha ka zawhna a ni a.

Tin, ka zawhna dang lehah chuan – sorkar hmasa ten an ti a, kan ti ve mai a ni tih lai hi a ni zel mai a. Tunah mi kan lo changkang zel tawh a, kan thalaite zingah pian tha tak tak, hleitling tak takte pawh an awm a, tin, Police atan te pawha duhawm tak tak, thiamna lam qualification mai piah lamah physical fitness eligibility test ah pawh Police manual anga tling tur pawh hi tam tak an awmin a rinawm a, chutiang a nih laia, tun hnaiah pawh October ni 7 a ni em aw, ka hre lova tuna relaxation kan Home Minister zahawm takin a rawn sawi kha, kha kha kan han tichhuak thar tlai leh hnunawh lai vel hian tinzawn nei deuh hian relaxation hi kan siam a ni lo maw? Recruitment boruak sang tak siam a nih tawh hnua relaxation siam hi a him em aw tih te kha rilruah a awm a, churang chuan tuna relaxation kha 2024 October ni 7 a notification base a siam a ni nge a hma atanga lo siam tawh reng tih kha ka'n zawh belh duh bawk a ni. Chu chu ka zawhbelh chu a ni e, ka lawm e.

PU TBC. LALVENCHHUNGA: Pu Speaker, kan Home Minister zahawm tak hnena ka zawh belhna chu – Tuna Mizoram Police Manual anga tih a nih thu leh relaxation kha siam zel a nih thu kha kan lo hria a, tun dinhmunah hian India ram pumpuiaah vawiinni thlengin tribal kan nihna angin Indian Army, Airforce, Navy piah lamah Central Arm Police reng reng leh Para Military ah hian tuna kan relaxation kan tih hi standard a ni a. Chutih ruala hetiang hnam te berin hetiang taka sang kan mamawhna chhan hi enge a chhan ni ang a?

Entirnaah chuan, kei pawh hi sipai bang ka ni a, Mizoram standard-ah chuan ka tling hauh lo tihna a ni a, mipui sang chuang training zingah best all rounder award ka la thei a, physical activities zawng zawngah kan top thei a, football-ah best footballer award ka la thei a, training engkimah physical activities-ah kan excell vek thei a ni. Service record tha tak nen tunah chuan Mizoramah Ex-servicement commodity service sangruk chuang kan awm a, tanglai mek sangli chuang an awm bawk a, chutiang a nih mek laia India ram veng him tur pawh a thlan tlinna tawk ni a ngaih leh training tough ber ber pal chhuak vek theih leh service theih te aia sang cm 168 tih hi khawi dan atang lo chhuak thei nge ni a, a hnam ang pawha chawh ruala palian lo ber ber ten milian ber ber tura kan beisei tlatna hi he kan police manual a hi discriminatory ka ti a. Kan Mizo thalaite tan hian mental fitness hian awmzia a nei dawn ta lo nge ni a, he manual hi ennawn tumna awm em tih ka zawhna a ni e, ka lawm e.

PU LALRINTLUANGA SAILO: Pu Speaker, ka lawm e. Ka zawh belhna chu hei

hi a ni. Halpuah haltute December ni 31, 2024 zana hal, khang ho hriatchhuahna atan hian Sorkar hian a bikin Home Department hian Drone a hmang em ni? Pahnihna, lo hmang ni ta sela crime dang entirnan zu siamna zawn chhuahna atante, drug dona atante leh a bika kan Home Minister hian jail tang a tichhuak hnem ang reng hle mai a, a hunchhung tawite ah hian. Heng zawnchhuah nan hian YMA pun buai lo hian Drone hman ve a ni em tih ka zawt duh a. A pathumnaah chuan ka bial Kanghmuna Police Outpost sorkar hmasa in a Covid avanga a tihpuitlin tak loh kha nikum ka zawhna ah khan hmalak mek a ni e tikhan min chhang a, engchen nge hmalak a nih tawh tih ka zawt e.

SPEAKER : Kha zawhnate a inkarkik khawp a. Chhang turin, a changtu Home Minister Pu K. Sapdanga.

PU K SAPDANGA, MINISTER: Pu Speaker, ka lawm e. Zawhbelhna a thahnem viau mai a, a hmaa kan chhan tawh te nen kan zawh pawlh a, a thiang vekah ngai ila. Zawhna neitu in zawhbelhna a rawn siam bike ri ring bik proton silencer hmang tlan vak vak mai hi danin a phal em ni tih kha bike silencer permissible chu 80 decibel a ni a, chu aia sang chu a ni em ni lo em tih hi kan hriat angin zan laiah te an rawn tlan thin si a, a ri han hriata han um hi chuan um tura han inbuatsaih chhungte hi a rei ve si a, a chang chuan an tlan thanna ah te hian kan Police-te hian an lo chang thin a, an man deuh reng bawk a, engzat chiah nge kan man tawh tih hi a figure chuan ka sawi thei mai lo nain dan bawhchhia ni a kan hriat te chu zan duty-te hian an um a, an man bawk a, chuti chung chuan zan rei tawh lamah hian an rawn tlan phut thin a, in ven sen chu a har thin khawp mai a, theihtawp chhuahin kan police ten an changin an man reng bawk ani tih hi zawhna pakhatna chhanna ni ta sela.

Tin, sanzawng chungchang ah khan Police Manual-ah 168 tih hi a lo la awm si a, khami Manual kha siam that a la ni bawk si lova, chumi anga han tih phawt chu a ngai a, Hachhek bialtu Member zahawmtak zawhna te nen khan han chhan zawm ta zel ila, eng huna siam nge tih laia kha chu danin a huam hun chhunga siam a ni a, October, August tih laia kha chu engpawh nise danin a huam hun chhunga siam a ni e tiin kan chhanna ni sela.

Tin, Dampa bialtu Member zahawm tak zawhna kha halpuah hal tute zawn nan Drone hman a ni si a, jail tlanchhuakte zawn nan drone in hmang em tih kha chu kan hmang lo e.

PU LALRINTLUANGA SAILO: Pu Speaker, jail tang tlanchhuakte um nan inhmang em ka ti lova, ka zawhna kha a chiang lo niin ka hria a, halpuah hal tute zawnchhuah nan Dec ni 31 2024 zan khan drone hman a ni em? Hman ni sela heng crime dang zu siamna drug dona kawngah te leh jail tang tlan chhuak zawnna kawngah hian hman a ni ve em tih a ni.

PU K. SAPDANGA MINISTER: Halpuah haltute zawn nan khan hmun then thenah Drone hman a ni a, a vaiin hman sen a ni lova. Tin, hmundang thildangah pawh hian a rem remah hian drone hmanna a tam khawp mai a, kan department pawh hian Drone hi kan lo nei ve tat a, chuvangin a remchang leh a tangkai turah hi chuan kan han hmang ve zel e. Chu chuan chhang thei mai em, a lawmawm e. Tichuan chhan bak kan la nei em?

PU LALRINTLUANGA SAILO: Pu Speaker, ka bial Kanhmun changchang kha?

PU ROBERT ROMAWIA ROYTE: Pu Speaker, Home Minister khan a theihngihlh niin ka hria a, thil pawimawh tak a ni a, sports-ah phei chuan mi ngaihven tak a ni a, 5% sport quota kha hman a ni dawn em tih kha khawngaiha min chhan theih chuan.

PU K. SAPDANGA, MINISTER: Pu Speaker, hmabakah ka lo dah palh hlauh a ni.

DR. K. BEICHHUA: Pu Speaker ka zawhna kha a muang thei ang ber leh a chiang thei ang berin ka zawt a, record thei mai tura ka ngaih laiin - Halpuah leh a kaihhnawiha dan bawhchhia te kha engtia hrem tur nge an nih tih kha. Tin, Police specification siam loh hi engnge a chhan? Hei hi, mipa ah khan kg 40 vel lo ni ta se, thildangah tling ta vek se, kan la tho ang em? Specification a awm si lova, 'hmeichhia ai khan rit lo ta se' tih kha a ni a. Tin, tlan chak viauin thildang kha thiam ta thei se, a weight kha kg 40 lek ni ta se, kha kha kan la mai tho ang em? Tin, police recruitment kha Aizawl-ah chauh a mi kan conduct ang? District hrang hrangah kan conduct ve ang em? District hla tak taka atanga lo kal kha, an kal leh hawna kha thil harsa tak a ni a. District tinah min duhsak thei ang em? tih kha a ni e.

PU K. SAPDANGA, MINISTER: Pu Speaker, recruitment hi hmun 4 ah tih tum a ni a, Aizawl hi hmun 2-ah tih tum a, a bak chu Khawzawl leh Lunglei-ah tih tum a ni. Kan thalaite a tam thei ang ber, insengso nasa lutuk lo tura an attend theihna tura ruahman a ni.

Tin rih zawng chungchangah khan Police Manual-a awm anga tih a ni phawt a, a hranpa in helaiha hian hmeichhia siam a lo ni a, mipa ah chuan 'ta se' tih laia kha chu a har khawp mai a; 'lo ta se; ta se' tih kha chu a inchhang tawkah ngai ta ila. An lo that viaua an lo tling viau phei chuan, mipa hi chu general takin kg 44 hnuai lamah police duhawm takte hi chu an awm lo mai thei a, 'maithei' tih vela chhan tawkah ngai ta ila; a zawhna pawh 'ta se' tih tho a nih avangin. Khalai kha chu kan Police Manual entawna dah anih avangin.

Halpuah leh a kaihhnawiha thubuai neite hrem chungchang hi chu court lam thutlukna anih avangin, sorkar lam han inrawlhna tur a ni lovang.

PU LALRINTLUANGA SAILO: Pu Speaker, ka zawhna - Mizoram police manual kha a specification khatiang nuai a nih avangin, siamthat tumna a awm em; siamthat theih a ni em? tih kha.

PU TBC LALVENCHHUNGA: Manual specification kha khatiang teh nuai anih avangin, ennawn tumna a awm em, ennawn theih a ni em, tih kha ka zawhna a ni.

PU K. SAPDANGA, MINISTER: Pu Speaker, a ennawn theih tehreng ang a. Tunah erawh chuan 'ennawn ni se' tia thutlukna erawh chu a lawm awm rih lo.

Sports quota kha 5 % meritorious sportsmen te tan a manual-ah pawh a awm e.

Outpost kha Kanghmun mai ni lovin, Outpost zawng zawng leh police station zawng zawng hi thuum that tuma inbuatsaih mek a ni e.

PU LALRINTLUANGA SAILO: Pu Speaker, la din loh a ni a, a thuum that theih ngawt dawn em ni?

PU K. SAPDANGA, MINISTER: Din turin kan inbuatsaih anga a ni mai a. Amaherawhchu, rampumah khawilaiah nge police station hi khat deuh, khawilai nge beat post hi khat deuh, khawilai nge outpost hi khat deuh tihte enfiah vek tum a ni a, chutah chuan Kanghmun pawh a tel ngei ang.

SPEAKER : A lawmawm e. Kan zawhbelhna kar kik deuh deuh mai te a ni a. Kan Minister ten chawp chilha an react hman lo a nih pawhin kan inhrethiam dawn nia.

Starred Question No. 25: *Farkawn Police Beat Post chungchang.*

Zawhna neitu: Pu Ramthanmawia, East Tuipui Bialtu.

PU RAMTHANMAWIA: Pu Speaker, ka lawm e. Kan Home Minister zahawm tak chhanna atan: -

- a) Farkawn Police Beat Post hi Outpost-a hlang kai turin hmalak chhunzawm zel a ni em?
- b) Engnge tun dinhmunah a thlen chin?

SPEAKER : Chhang turin Home Department changtu Minister Pu K. Sapdanga ilo sawm ang.

PU K. SAPDANGA, MINISTER: Pu Speaker, East Tuipui Bialtu zahawm tak zawhna chhanna chu: -

- a) Farkawn Police Beat Post, Outpost-a hlang kai turin tun dinhmunah hmalak chhunzawmna a awm rih lo.
- b) Hmalakna a awm loh avangin tun dinhmunah thlen chin sawi tur a awm rih lo.

SPEAKER : Zawhbelhna zawt turin: -

1. Pu Ramthanmawia (Zawhna neitu),
2. Pu C. Ngunlianchnunga,
3. Pu Lalmuanpuia Punte,
4. Pu Lalchhandama Ralte, Opp. Leader. (Addl.)
5. Pu W. Chhuanawma, (Addl.)

PU RAMTHANMAWIA: Pu Speaker, ka zawhbelhna chu, kum 2023 khan khatih laia DGP kha Farkawn-ah leh Tiau ramri ah a han kal a, a lehlamah khan camp lian deuh mai a zuk hmu ta a, a lo haw chho chu a rawn phawk viau a. VC-te kovin ‘tuna police 2-3 leka kan awm hi chu a diklo ang; tihlen a ngai a ni’ a ti a. ‘Hmun remchang lo ngaihtuah ula, police tam zawk helaiah hian an awm a ngai a ni; a him lo a ni’ tih angin kan khawtlang hruaitute hnenah a hrilh a. Chu chu a hmunhma a tan Farkawn-ah khian sikul hman tawh loha ruak a awm a. ‘A remchang thei ang’ tiin nikum khan helaia kan Home Department

lamah te pawh an thlen tawh a. Kan DGP meuhin a ngaih pawimawh, ramri ni bawh si, lehlama silai nena awm thup mai an hmuh khan thuam chak a ngai a ni tih kha a han hmu a. Chulai chu kan Home Minister zahawm tak hian mutmawh-hnarmawhah min neih sak se.

Ka zawhna tak chu, nichina min chhan ang deuh khan, a remchan ve leh khilai khi chu min ngaihtuah sak se tih khan ka'n ngen a. Chu chu hma min lak sak thei ang em?

PU C. NGUNLIANCHUNGA: Pu Speaker, kan Home Minister zahawm tak ka zawhbelhna chu –

i) Zochachhuah KMMPT road kallai, engemaw chen Myanmar ramah a lut tawh a, sawlaih sawn police an awm lo a, Bungtlang Outpost atanga vil mai a ni a. Zochachhuah ah khuan Police Outpost dah tumna a awm em?

ii) Bungtlang South-ah Police Beat Post a awm a. Bungtlang atanga Zochachhuah chu 10 km vel niin, international border a ni a, a thlang hnai te ah Bangladesh a ni. Zochachhuah piah lawk Zocha Lui piah lawk atangin Myanmar a ni a, kawngpui laih a ni a, a pawimawh em em mai a; he House-ah pawh hian an sawi zing viau tawh a. Tun sorkar hian Zochachhuah ah dah a tum em?

iii) Bungtlang South Outpost saw Police Station puitlinga hlankai tumna a awm em? A awm loh chuan, hlankai theih a ni ang em?

iv) Tin, Vaseikai ah Police Out Post a awm a, hei hi Tuichawng lui kama awm a ni a. MLA constituency ang pawhin Tuichawng MLA constituency huamchhunga awm a ni a, western bik tan khaw pawimawh tak he beat post hian a cover a. Hei hi tihchangtlun tumna leh thawktute pawh tam zawk dah tumna a awm em? A awmlo anih chuan, tihchangtlun anih theihna atan he sorkar chak tak hian hma min lak sak thei ang em? Ka lawm e.

PU LALMUANPUIA PUNTE: Pu Speaker, ka zawhbelhna chu – Tuna MLA Pu C. Ngunlianchunga, a bialtu sawi ang khan, Bungtlang South saw an pachhe em em a, a te a, police station-a hlankai ngei ni se a duhawm hle a. Tin, Parva-ah sawn engmah an awm lo a, BSF te rin deuh mai an ni a, zep miah loah chuan; BSF te chu hnam hrang hrang awmkhawm an ni a, an discriminatory viau a ni. Chuvang chuan, Mizoram Police Outpost tal dah ni se, Bungtlang saw police station puitlinga siamin, Vaseikai te leh Pu C. Ngunlianchunga sawi zawng zawng te kha a bik taka ngaih pawimawh theih a ni em?

SPEAKER : Zawhna pathum a lut ta a, a zawhna neitu tiamin, kha kha kan lak dan tur a ni tih kha kan sawi lawk a. Amaherawhchu, phar in la awm nual mai a, Pu Lalrinsanga Ralte, Pu Lalchhandama Ralte leh Pu W. Chhuanawma te. Engtingge kan tih ang? Pakhat helam, pakhat helam tiin kan la leh mai dawn em ni ang?

PU LALRINSANGA RALTE: Pu Speaker, i remtih chuan, kan Opp. Leader hi ka'n kian mai ang e.

SPEAKER : A lawmawm e. Anih chuan helamah pakhat, sawlamah pakhat la leh hram ila kan hrethiam mai ang chu. Tunah Opp. Leader Pu Lalchhandama Ralte ilo sawm ang.

PU LALCHHANDAMA RALTE, OPP. LEADER: Pu Speaker, ka lawm e. Ka zawh duh chu –

- i) Kan police te hi ramin kan inngahna, kan security a nih avangin an pawimawh em em a. Police motor kawl, a bik takin thingtlang outpost-ah, a bik takin ka bial lamah te pawh motor an neih chhiat lutuk avangin duh angin an bial an enkawlna hlei thei lova. Police Motor thlak thar tumna kan nei em?
- ii) Tin, kan VIP neihte pilot pek an ni a; kan Speaker ngei pawh hi VIP Pilot pek a ni a. Police Department hian kan Speaker a zin dawn nikhuua pilot tur motor pek tur hi kan nei lo nge, Assembly hian motor kan pe ziah mai a, a mihring (sipai) chiah an rawn tum thin a. Hmanni a, Tuivai Lei kan hawn pawh khan harsatna kan tawh a ni a. Tun hnaiah motor thar tha deuh deuh VIP te pilot tur lei niin kan hria a. Kha kha kan Speaker hman tur hian pek ve theih a ni dawn em?
- iii) Tin, hmanni lawkah Manipur nena kan inkalpawhna Tuivai Lei dawh a ni a. Khi lam khi kan corridor pawimawh tak a ni dawn ta a. New Vervek ah khian Police Outpost kan nei thin a, hun eng emaw chen a function reng a, tunah khian kawng a tlang loh avangin, a function tur anga function lovin, tlem te kan dah a. Hetia kalkawngpui a tlang takah chuan New Vervek Police Outpost khi tih changtlun leh ken tum em?

PU W. CHHUANAWMA: Pu Speaker, ka lawm e. Nichinah khan kan Home Minister khan Outpost chungchang kha ‘a tul angin ram pumah en a ni ang’, tih kha a a ni a. Khawzawl District-ah khian South lampangah khian khaw sawm (10) khaw lian pui pui a awm a, a bik takin Khawhai phei khi chu notified town a ni tawh a ni. Sawlamah sawn outpost a la awm miah lova, a ram lai Khawhai ah khian a pawimawh em em a. Hetah hian dah in rawn tum thei em?

SPEAKER : A theih ang anga chhang turin Home changtu Minister zahawm tak Pu K. Sapdanga ilo sawm ang.

PU K. SAPDANGA, MINISTER: Pu Speaker, ka lawm e. Zawhna neitu East Tuipui bialtu in Farkawn chungchang a sawi kha ka lo chhinchhiah a. A tlawhtu DGP nen kan lo sawi chhunzawm ang chu.

Tin, Lawngtlai West bialtu zahawm tak zawhna - Zochachhuah te, Bungtlang South te, Vaseikai te ah hian tuna kan police neih sa te leh, a then la neilote, a then nei tawha nei leh tawh lote kan ni hlawm a. Heng hi department chuan a hria a, theih tawpa tih changtlun tumna a awm avanga heng mass recruitment te pawh hi tih a ni a. Rampum huapin a ni a, khawilai bial hlang bik emawah kalpui theih a ni lova. Nakinah 200 zetin kan belh hunah chuan Bialtute nen sawi hoin, khawilai ah nge kan dah buk deuh ang, tih chu Pu Speaker, sawiho zel a la ni ang chu.

Hrangturzo Bialtu Pu Muanpuia zawhna pawh kha, khatiang tho kha ka chhanna chu a ni a. South Bungtlang leh Parva te pawh BSF chauh an awm a. Kan sawi tak ang khan, tunah hian kan nih tur ang kan nih phak lohna hi sangli chuang zet a ni a, indaih lohna a nasa a, indaih turin sum lamah harsatna a la awm bawh si a. State hausa deuh duh zah zah police la thei nih a chakawm hle mai. Kan neih ang angte a remchan hun hunah sorkar chuan theihtawp a chhuah chhun zawn zel a ni.

Tin, Opp. Leader zahawm tak Pu Lalchhandama zawhna pawh kha, kan Speaker kha thahnem a rawn ngaihpuoi hle mai a, a lawmawm tak zet zet a; motor lamah hian kan indaih lo nasa viau a. Session hmasa khan kan ngaitla a, kan House Leader kan Chief Minister ngei pawh a zinnaah tum thum ngawt a motor hnutchhiah ngai khawpin a awm a. Han inpuang ve ta mai mai ila, kei pawh tum hnih chu pilot motor hi kan hluihlawn der mai a. Dap chawp ngai khawpin lirthei lamah harsatna kan tawh a. Tun hnaiah Chief Minister hian hetiang a han tawh takah chuan pahnih-pathum emaw lek motor chu lei a ni a, indaihloh a la nasa viau mai a. A lo remchang anih chuan, pilot tur hi chu eng department ami pawh han pawh nawk nawk a la ngai rih a. Chu chu Memberte'n min lo hriat thiam kan duh hle a ni.

Tin, New Vervek Post hi tunhma kawng tha a awm laiin Police Outpost tha tak siam a ni a. Kawngpuoi dinhmunin a zir loh avangin, tlema tih thawl a ni ta a, tunah hian a mamawh leh ta hle mai tih report a awm a. Chuvangin, hei pawh hi ngaih pawimawh ah neih tum a ni e.

Tin, Member zahawm tak Pu W. Chhuanawma zawhna kha, . Khawhai ah hian Police Outpost awm tura thang deuh hat kha a awm a, ziak pawh a awm a ni. Amaherawhchu, hei pawh hi thawktute indaihlohna avang bawkin tihpuitlin a la ni lova. A pumpuia kan thlir hunah heng thawktu lo nei tawh ho phei hi chu, hmu hmasa tur pawlah a tel ngei turah ngai ila a tha awm e.

LAYING OF PAPERS:

SPEAKER : I chhang kim thawkhat e, a lawmawm e. Tikhan zawhna leh chhanna hun chu vawiin atan chuan kan zo ta a, Business dangah kan kal ang a. Laying of Papers ah kan kal ang a -

The following Members laid their papers respectively on the table of the House:

1. Dr. Vanlalhlana, Minister -

“Mizoram State Higher Education Council Rules, 2024”

2. Pi Lalrinpuoi, Minister -

- i) “Annual Report of the Office of the State Commissioner for Persons with Disabilities, Mizoram for the year 2022-2023 and 2023-2024”.
- ii) “The Annual Reports of Mizoram State Commission for Protection of Child Rights (MSCPCR) for the ear 2023-2024”.

(Paper-te lay niin, memberte hnenah a copy sem a ni a.)

PRESENTATION OF REPORT

SPEAKER : A lawmawm e. A copy han sem u la. Kan changkimin a hriat e.

Presentation of Report, Business Advisory Committee te Februaty 25, 2025 (Thawhlejni) khan thutkhawm an nei a. Chutah chuan tuna Fourth Session of Ninth Legislative Assembly kal mek a detailed programme hi duan that leh a ni a. Hei hi Bulletin Part II hmangin kan rawn sem vek tawh a. Fourth Report of the Business Advisory Committee for the current Session hi House ah ka rawn present e. A copy han sem nghal u la.

LEGISLATIVE BUSINESS

Tunah chuan *Legislative Business* ah kan kal ang a. Vawiinah hian Government Bill sawi ho tur pathum kan nei dawn a. Kan sawi ho hmasak ber tur atan “The Mizoram Goods and Services Tax (First Amendment) Bill, 2025” hi a Bill neitu Pu Lalduhoma, Chief Minister zahawmtakin House a introduce phalna rawn dil se la, ilo sawm ang u.

PU LALDUHOMA, CHIEF MINISTER: Pu Speaker, i phalna leh he House remtihhain, “The Mizoram Goods and Services Tax (First Amendment) Bill, 2025” hi rawn introduce ka dil a. Move nghal pawh i remtih chuan ka dil e. Ka lawm e.

SPEAKER : Kan remti em. Rem kan titlangin a hriat e. Chief Minister zahawmtakin House ah phalna a rawn dil a, kan phal sak ta a. Tunah introduce leh move turin ilo sawm ang u.

PU LALDUHOMA, CHIEF MINISTER: I phalna leh he House remtihhain “The Mizoram Goods and Services Tax (First Amendment) Bill, 2025” hi ka rawn introduce e.

Pu Speaker, GST Rules hi siamthat a zing khawp mai a; kan thu a ni lo a, Central lam thu a ni a. Tun tuma Amendment Bill ka rawn put luh pawh *hi The Goods and Services Tax Council* in meeting vawi 53-naa an lo rel a ni a, chutah chuan Dan siamthat ngai an hmu hnem khawp mai a. GST Acts leh Rules hi a taka hman a nih hnu hian a tla chawpa thil lo thleng tawn tur a tam a ni ang, amendment hi a awm leh thin a. Tunah pawh hian amendment ngai an rawn tih hi 40 dawn lai a niin ka hria a.

Central lamin a Act an amend rual khan State tinte hian chu mi dung zuia kan lo amend ve zel hi a ngai a. Chuvangin, vawiinah hian kan sorkarin tul a tia kan rawn pulut pawh a ni chiah lo. Central lamin an siam a, chu mi dung zui chuan kan tih ve a ngaih avangin, ‘a tul tul lai lo amend ve ang u’ tih a ni ber mai.

Tin, zawhna te pawh han inzawt pawh ni ila, kei pawh hian ka chhang thiam vek dawn chuang lo. A technical hle hlawm mai a. Chuvang chuan, kan tih tur ve hrim hrim kha a nih avangin he amendment ka rawn dil hi House hian min remtih sak mai turin ka ngen a ni e. Ka lawm e.

SPEAKER : Kan Chief Minister zahawmtakin a Bill chungchang te sawiin a rawn putluh chhante min hrilh a. Amendment Bill a ni a, a move tuin fiah takin amendment ngai chungchang te a rawn sawi tawh bawk a. Central Act kan lo adopt mai a ni a, eng hi chu sawi ho a ni vak ngai lo a. Sawi duh kan awm em? Opp. Leader hian sawi duh a nei a, ilo sawm ang.

PU LALCHHANDAMA RALTE, OPP. LEADER: Pu Speaker, tuna kan House Leader sawi ang khan, sawiho loa pass mai thin kha a ni a. Kha kha ka rawn thlawp a. Chutih rual chuan zawh duh ka neih vang zawk a ni a. A technical ni lovin, GST tun ami ah hian ‘*First Amendment Bill, 2025*’ a inti a, a hnunga *Statement and Object Reason 3*-na ah hian ‘*Third Amendment Bill*’ a in ti bawk si a. Keimahni paper ve ve ah khan *third* tih

leh *first* kha a awm a. Hei hi a chhan nawm nia a lan theih tho rualin, kan zawh duh chu - Hei amendment dangah hi chuan India Constituion pawh tunah hian *106th Amendment* te kan ti a a, a kal chho zel a, indawtin; GST amendment hi kumtin a lo kal a. Hetia amendment a kum apianga a number rawn dang zela hi, in chhunzawm tir chi a ni ve em? State dangah engtinng an kalpui ve? A pumpui thuah chuan hei hi dan anga kan adopt ve a ngai a nih avangin ka rawn thlawp nghal e.

SPEAKER : Aw le. Kan House Leader khan sawi duh a nei em?

PU LALDUHOMA, CHIEF MINISTER: Aw le. Pu Speaker hemi *3rd Amendment Bill, 2024* hi chu, 2024 kuma vawi thum an amend tawh an sawinaah ka ngai mai a. Tuna *First Amendment* a lo nih takna hi chu, kumin 2025 hi a vawikhatna a nih vang ni turah ka ngai ringawt mai a, ka chiang bik lutuk lo. Ka lo sawi sual palh a nih chuan, a dikna rawn dah leh kan tum ang a.

Tin, amendment reng reng, Constitution pawh hi India kan independent tirh atang khan amendment hi chhiar belh zel a ni a. Engatinge GST atang a nih avanga nikum lama mi kha kan chhiar zawm mai loha, kum tin a thara tih lai erawh hi chu ka chiang bik lo a, rawn chian ka tum dawn nia.

SPEAKER : A lawmawm e, nichinah khan kan House Leader khanin pass pui kha a rawn dil tawh a, tikhan a han sawifiah bawk a. Kan pass thei mai em? A lawmawm e.

Kan Chief Minister zahawm takin, ‘The Mizoram Rules and Services Tax First Amendment Bill, 2025’ chu House pass-pui turin a rawn dil a; remti leh tilo kan inzawt a, rem kan ti tlang a. Tichuan, “*The Mizoram Rules and Services Tax First Amendment Bill, 2025*” chu he House hian lungrual takin a pass ta a ni. (**Pu Lalduhoma, CM:** Pu Speaker, ka lawm e.)

Bill pahnihnaah kan kal ang a. “*The Mizoram Youth Commission Bill, 2025*” hi a bill neitu Pu Lalnghinglova Hmar, Minister zahawmtakin House-a introduce phalna rawn dil turin ilo sawm ang.

PU LALNGHINGLOVA HMAR, MINSITER: Pu Speaker, ka lawm e. Pu Speaker, i remtihna leh he House zahawmtak remtihna, “*The Mizoram Youth Commission Bill, 2025*” hi introduce ka rawn dil e.

SPEAKER : Aw le, Bill neitu Minster zahawmtakin House-ah introduce phalna a rawn dil a, kan phalsak em? (*House-in introduce a phalsak a.*) Kan phalsak chuan, rawn introduce-a rawn move nghal turin ilo sawm ang u.

PU LALNGHINGLOVA HMAR, MINISTER: Pu Speaker, ka lawm e. Min phalsak angin, “*The Mizoram Youth Commission Bill, 2025*”hi kan han move nghal dawn ang a.

He Bill hi a lo luh chhan chu, “The Mizoram Youth Commission Act, 2008” tunah hian hman mek a ni a. April 23, 2008 atanga hman tan tawh kha a ni a, a kum 16-na a lo ni ve ta a ni. Pu Speaker, mihring pawh hi kum 16-ah hi chuan an lo puitling tan tih kha a ni a. *Sweet 16* tih te pawh kan han nei kha a ni a, a par vul chho chiah ang vel a ni. Chuvang chuan, a dan hmasaa kim lote, fuh tawklo te tin, tunlai thil che zelah bikin, thalaite kaihnawih thil a nih avangin, chungah chuanin bilh tel ngai tam tak a awm nia hriat a ni. Chuvangin, he *Youth Commission Bill* hi putlulh a lo tul ta a. ZPM-in sorkarna vawnfung kan han chelh hnu ah Mizoram Youth Commission thuan chak dan turte, hmasawn tur zawk leh tangkai zawka hman hi kan tum a, theihtawp kan han chhuah ve a ni.

Tunah hian lawmthu ka han sawi hmasa duh a. Kan sorkar hmasa lamah khan Youth Commission tha tak an lo din a. Tin, India hmar chhakah hian a hranpaa Youth Commission nei pawh hi Assam, Sikkim leh Mizoram chauh hi kan lo ni a; Tripura, Meghalaya, Arunachal Pradesh, Nagaland leh Manipur te pawh hian an lo la neilo chu niin. Tichuan, Assam leh Sikkim-ah hian Sports and Youth Services Department kan tih ang chi hnuai ah ve ve hian a awm a.

Tin, Mizoram-ah pawh Youth Commission a din tirh khan Sports & Youth Services Department hnuaiah a dah a ni a. Kum 2020, February Ni 21 khan LESDE kan tih, tuna Labour, Employment, Skill Development and Entrepreneurship hnuaiah hian dah a lo ni ta zawk a ni. Tichuan, khawvelin hma a sawn zel a; tin, a hun lai khan hnawhsa ruma a dan te kha lo siam a ni bawk nen hmsawna tur tam tak a awm nia hriat avangin he bill thar hi kan rawn pulut a ni a. A zavai leh a chipchiar chuan Pu Speaker, ka luhchilh lo mai ang a.

Chapter 1 ah hian a hrilhfiahna (definition) a awm a, hei hi kan act neih lai mekah hianin definition atana hrilfiah ngai em em lo hrilfiah kimloh te; tin, telh tur lo telh kimloh te a awm bawk avangin, hetah hian eng emmaw zat siam that a ni. Tin, Chapter 2 Act, 2008 ah khan Commission din dan te, Commission member ruat dan leh Service awm dan tur bakah officer leh staff-te chungchang leh an hlawh chungchang te zau tak maiin sawi a ni a. Amaherawhchu, MYC Bill, 2025-ah chuan heng zawng zawng hi felfai tak leh chipchiar zawka sawi niin, a hranpain dan pangngai kalphung zulzuiin inrelbawl dan tur hi chhawpchuah a ni.

Pu Speaker, MYC Bill, 2025 Chapter 3-naah hian chipchiar leh kim chang zawkin Commission kalphungte pawh dah a han ni ta a. Commission leh Chairperson thuneihna leh an thuneih dan chinte, an hnathawh tur hrang hrang, an power leh function-te pawh hetah hian zeh tel a ni ta a ni.

Tin, Member Secretary ruat theihna kha Sorkar danah khan a awm sa a. Amaherawhchu, Member Secretary hnathawh dan tur hrang hrangte kha tun tum Bill-ah hian chipchiar zawkin kan rawn pulut ta a. Chumai chu nilovin, Commission member ruat dan leh a ban theih dan, (a resignation, a removal) a dan lo awmlo te pawh tun tumah hian he bill-ah hian kan han bilh tel ta bawk a ni. Tin, Commission meeting neih dan tur chungchang leh a quorum chungchang te pawh a hranpa siam ziah tel a lo nilo a, chungte chu uluk zawkin kan han ziaak tel a.

Tin, kan dan hmanlai *MYC Act, 2008*-ah MYC, ti-MYC tu, Commission, ti-Commission tu bera member-te appointment leh resignation, a removal chungchan gte, khangte kha chapter hrana ziaak a awm lova, chung chu a chapter hrangin kan han ziaak ta bawk a ni. Tin, MYC a thawkte rawih dan chungchang kha Pu Speaker, hmanni pawh khan an han sawi kha a ni a. *MYC Act, 2008* kan hman mekah hian staff rawih dan emaw, a engagement tih dan emaw, khatiang kha dan mumal behchhan a awm lo a ni. Chuvang chuan, advertisement pawh awm mumal lovin rawih mai an ni a. Tin, a tul hunah anni pawh kha chawhlthir leh mai thin an lo ni. Chu chu tuna kan dan, kan bill put luh tharah hi chuan chiang takin kan ziaak lang tawh a. Tuna thawk mek awm hote hi chu Pu Speaker, zep thu a cheng lo, Dan mumal beh chhan awm lem loa lak kha an lo ni hlawm a ni.

Chutihlai chuan Pu Speaker, Finance Department hian kum 2022 daih tawh khan OM an rawn tichhuak daih tawh a. Chutah chuan Finance Department, Mizoram sorkar atanga sum leh pai hlawh leh hamthatna hmu tur Cooperation emaw, Board emaw, Society te pawh recruitment chungchang leh an hlawh chungchangah te khan November Ni 11, 2022 khan OM tichhuakin mumal zawka dan anga kalpui tur tih kha a lo ni tawh a, chungte chu he Bill hian a rawn take-care dawn ta a ni.

Tin, tun tuma *MYC Bill, 2025* kan put luh ah hi chuan, dik leh fel fai zawka MYC staff-te rawih dan tur a duang a, sorkar hriatpuina leh phalna zelin, proper channel hmangin thawktute lak an ni tawh dawn a ni.

Tin, Pu Speaker, kan ngaih pawimawh em em chu, Finance leh Account chungchang a ni. Tuna Act kan hman mekah chuan ‘Annual Report-a thehluh tur’ tih ngawt mai kha a ni a. Tuna kan Bill putluh tharah hi chuan account chungchang pawh hi compulsory auditing, ‘audit a paltlang ngei ngei tur a ni’ tih a ni. Chuvang chuan, Pu Speaker, he MYC Mizoram Youth Commission-a hi mumal zawk, chak zawk, langtlang zawk leh dan anga nghet zawka ding thei turin tunah hian thuam chak kan tum a, chu a thuam chakna tur Bill chu kan rawn pulut a ni.

Pu Speaker, he Mizoram Youth Commission tuna kan Bill put luh chhungah hian a tawp lamah hian kan hmu ang a, holistic development a pumpui a thalaite’n hma an sawn theihna tur kha dah a ni a. Chutah chuan miscellaneous provision, kan Chapter V ah khan belh tel a ni a. Kha kha kan en chuan, MYC hi thil tithei zawk, chak zawka hmasawn tur, thalaite tana chhenfak awm zawka a kal theihna turin kan han belh tel ta a. Engpawh nise, Pu Speaker, he *MYC Bill, 2025* kan put luha hi a detail hian sawi dawn ta ila rei tak sawi daih tur a ni a, helai a awm chin ringawt pawh hi keimahin ka ziah thlak china pawh hi a thahnem em em mai a. Chutih rual chuan, a bill copy hi Pu Speaker, kan memberte’n an dawn vek tho avangin anni lam hian an duh ang te han sawi zau ta zawk se, rem i tih chuan.

Pu Speaker a wind-up-na ah MYC-in tunhnaia a hnathawh tawhte pawh kan la tarlang ang a, Memberte’n an sawihona khaikhawmna hun Pu Speaker, min pe a nih chuan, chutah chuan he bill-ina a ken thil dangte pawh kimchang zawkin kan sawi turah ngai ila. A sawi hawna ah chuan Pu Speaker, khati chin kha ka duh tawk mai ang e. Ka lawm e.

SPEAKER : A lawmawm e. Minister zahawmtakin a Bill chungchang sawi turte sawi in a Bill putluh chhante min hrilh ta a, sawiho tul kan ti em? (*House-in sawiho a ti a.*) Aw le. kan sawiho ang a; member pakhat tan minute engzatnge kan tih ang? (*Member pakhat tan minute 5 pek a ni a.*) Minute 5 member pakhatin khung len kan tum ang a, minute 4-ah bell kan ti ri thin dawn nia. Member zahawm tak Pu Rinsanga Ralte ilo sawm ang.

PU LALRINSANGA RALTE: Pu Speaker, ka lawm e. Hei vawiinah, “*The Mizoram Youth Commission Bill, 2025*” a rawn lut hi a lawmawm hle a, sawiho pawh a nuamin ka hria a. Ka han chhiar ka han chhiar a, a fel fai tha viauin ka hria a. Hemi Youth Commission Bill a rawn luh hian ka rilruah ngaihtuahna a kal thui hle a. Term hmasa lam leh he youth commission rawn din a nih chhoh dan te kan minister-in a rawn sawi thuk ang khan, 2008-ah India rama a hmasa ber turin Mizoram-in MNF sorkar lai khan Youth Commission a lo din a ni a, chumi hun lai chuan Sport Department kha nodal-a hman a ni a.

Tin sorkar a lo inthlak a, Congress sorkar kum 10 a rawn kal a; khami chhung khan LESDE-ah congress sorkar khan an dah a, LESDE enkawl na hnuaiah chutiang chuan Youth Commission hi theih ang tawkin sorkar hmasa khan an lo enkawl a. Term hmasa 2018 MNF a rawn sorkar leh khan kan rama thalaite tan theihtawp kan chhuah a ngai a, youth commission hmang hian Mizoram thalaite an hna hmuhna kawngah a ni emaw, an thil tihna kawng hrim hrimah puih an ngai a, an puih theih theihnaa pui turin anmahni thum chak leh zual a ngai a ni tih hriain sorkar hmasa hun laia LESDE minister, tuna kan Opp. Leader Pu Lalchhandama Ralte ho khan hma an la nasa viau mai a. Kan Youth Commission chairman kal chhuak ta Dr. Vanlaltanpuia pawh kha mitthla-ah a lang reng mai a, lawmawm tak zet in ka hria a. 2018 kan sorkar khan Youth Commission thum chak hle a ngai a ni tih hriain sorkar-in theihtawp a chhuah a, Youth Commission office tur hmun hma te pe in sak zawh a ni a. Youth Centre tur kha Aizawl, Lunglei leh Serchhip-ah te sak an ni ta bawh a. Tuna infrastucture kan neih hrim hrima hi chu MNF kut chhuak vek a ni, tih a sawi ngamin ka hria a, a lawmawm takzet a ni.

Chuti chuan, theihtawpa hma han lain Youth Commission mumal zawk a kal theihna turin ruahmanna an han siam a, tuna bill a rawn luh hma hian Youth Commission hian Acts leh Rules pawh eng emaw chu a nei ve a. Amaherawhchu, kan minister sawi ang khan kum 16 kal taa MNF in a lo din, la siam that miah loh a rawn ni chho a, term hmasa khan ‘Dan mumal zawk kan neih hi a tul e’ tiin, Chairman Dr. Tanpuia ho khan committee din a ni a. Kha khan he Dan vawiina Bill rawn lut te pawh hi bul lo tantu an niin ka hria a. Hetianga Bill tha tak mai sorkar tharin rawn bawhzuia, bill pass theih tura an rawn chhawp chhuak hi lawmawm hle a ni.

Pu Speaker, sorkar hmasa khan Youth Commission-in hma chak taka lak theihna tura ruahmanna hrang hrang an neih zingah IELTS Coaching te, UPSC Coaching te, OET Coaching te, SMARTEE Coaching te, Mizoram Civil Service Combined Coaching hrang hrang te khatiang khan changtlung takin a lo din a ni. He sorkar thar rawn pian hnuaiah pawh Youth Commission an rawn ngai pawimawh ve leh chat hi a lawmawm hle a. A zuih zawnga kal lova he sorkar in a Youth Commission MNF sorkarin duh taka a lo din leh thum chak tawh infrasture tha tak tak a pek tawh kalphung dik pangngai dik pangngaia a

kal chhoh reng theihna tur Bill an rawn pulut hi a lawmawm hle a. Chuvang chuan heng Youth Commission a hi mumal taka hi a thawktute a ni emaw, a Commission, a chairman, a committee, a member, a bu chhunga a rawn ziah hrang hrangte hi a thain ka hria a.

Ka ngaih pawimawh ber chu, he Youth Commission hi sorkarin duat se, ngai pawimawh se, 'Mizoram thalaite tan a ni' tih hriain, an mamawh leh tul sum leh paiah pawh duhsakna pe thei se. Sum mamawh leh sum involve tur hi a tlem viau mai a, hengte hi chu a ve chauh tur a ni dawnin a lang a. Harsatna an neih hrang hrang kan thalaiten eizawna kawngah te, an mahni mimal nun leh thiam thil bik an neihna kawng hrang hrangah te hma an lak chhoh theihna turin sorkarin he Youth Commission hi thuam chak leh zual se. A Bill rawn lut hrim hrima hi chu han sawisel lutuk tur hi a awmin ka hre lova. A tul anih chuan, kan han hmang chhin ang a, kan minister sawi ang khan amend theih leh zel a ni a. Chu chu ka'n sawi ve duh a ni e. Ka lawm e.

SPEAKER : Aw le. Thorang Bialtu, Member zahawm tak Pu Rohmingliana ilo sawm ang.

PU R. ROHMINGLIANA: Ka lawm e. Pu Speaker, vawiin ah Bill pawimawh tak mai thalaite hma khua ngaihna tur thil put luh nia sawina hun ka nei ve thei hi ka lawm hle mai. Thalaite hma khua ngaihna tur *Youth Commission 2025* chungchang han sawi dawn hian a bul tanna tawi te han sawi ve ka duh chu, India rama 'Youth Commission hmasa ber a ni' tih kan ngaihthla tawh a, a dik a. Helai bul rawn tan chhuah dan hi Pu Speaker, a bu chhung ka luh hmaw tawi te han tarlan ka duh a,

Helaiah hian han fak ngaite pawh han fak lawk duh ka nei a. He Bill rawn luh theihna tur hian 2002 kum tawp lam leh kum 2003 kum tir lam khan Mizoram-a kan NGO neih MZP te khan bul an rawn tan a, 2003 inthlan dawnah party tin manifesto ah te telh sak turin an rawn ngen kual a. Chuti hun laia MZP President kha vawiina kan Opp. Leader Pu Lalchandama Ralte hi a ni nghe nghe a. Chutiang chuan keini MNF te pawh khan kan lo ngai pawimawh a, khatih hun laia kan President, vawiin thlenga President la ni, Pu Zoramthanga kaihhruai MNF party khan manifesto-ah te kan lo dah lut a.

2003 kum tawp General Election-ah sorkarna kan han chan takah khan, kan hotuten an tiam ang ngeiin India rama a hmasa ber ni turin Mizoram Youth Commission dinna tur kawng an lo zawng chho ta a. Chutianga an beihna azarah vawiinah khami an siam tuma Dan an siam kha amend loin a la awm ta reng a. MNF sorkar kha Congress sorkar-in term 2 (kum 10) lai a rawn thlak a, khami hun chhung khan han siam danglam kha a awm lo a. Chumi hnuah MNF term khat kan han sorkar leh a, chumi chhung chuan nasa takin hna thawh a ni a. Office nuai 300 man te, Youth Centre Aizawl-ah 5 crore te, Lunglei Youth Centre 4 crore leh Youth Centre, Serchhip-ah 3 crore mante sak a ni bawka a ni. Chung bakah chuan thil dang tam tak thawh a awm bawka a.

Tichuan, chu Dan an lo siam tawh chu vawiinah a changtlung lo laite tihchangtlunna tur kan Minister zahawm takin bill a rawn thelut hi lawmawm ka ti a. A chhungthu te pawh han en hian, tunlai mil zawka han dah te pawh tam tak a awm niin ka hria a, a lawmawm ka ti

khawp mai a. Pu Speaker, he laiah hian a hunlaia tha tak, tun hnua tihbelh ngai lai – Chapter 1 leh 2-ah te pawh ‘*constitute under section 3*’ a ti a, section 3 pawh helaiah hian a rawn siam danglam hi a lawmawm ka ti a. ‘Youth Commission Headquarters hi Aizawl-ah a ni ang’ tih ringawt laia kha a awm a. Amaherawhchu, tun bill-ah hian lawmawm ka tih em em mai chu, ‘in Aizawl and such centre as may be established in the district’ tih a rawn tel ta te hi lawmawm ka ti hle a. Keini chhim lampangah te pawh he Bill avang hian headquarters ang deuh te pawh a din theih dawn ta niin ka hria a. Tin, Commission Chairperson tenure ‘kum 3 tur, kum 2 thlenga extend theih’ tih te, ‘kum 65 aia upa an ni tur a nilo’ tih ang chi bakah thil dang tam tak tha tak nia ka hriatte a awm bawk a. Pu Speaker, hei bakah hian thil thar hlak mai ‘Appointment of Officer and staff’ tih leh, ‘contribution, enrollment, etc. of the Commission’ han tih lai te, ‘salaries and allowances to be paid out of grant’ han tih lai te bakah thil thar rawn chhuak te pawh a awm a ni.

Tin, Youth Commission member zat 5 atanga 7 a han tihpunna lai te pawh a lang a, a lawmawm ka ti hle mai a. Pu Speaker, Chuvang chuan, he Bill hi pulut tuin a rawn dil ang khan, pass ka remti e. Ka lawm e.

SPEAKER : A lawmawm e. Tunah chuan, Member zahawm tak Pu Lalramliana Papua ilo sawm ang.

PU LALRAMLIANA PAPUIA: Mizoram Youth Commission Bill hi kan Minister-in a tarlan tak ang khan ennawn tul ve hrim hrim tawh a nihna lai te pawh a awm niin a lang a. Kan dan hluiah a thumal hrilhfiahna an sawite pawh kha sawifiah ngai eng emaw zat la sawifiah loha awm, a hmaa point 7 vel chauh sawifiahna awm kha, point 11 ah tih changtlun an ni ta te kha a lawmawm ka ti a.

Tin, MYC Act, 2008 ah khan Commission din dan tur chungchang chapter 2-ah a rawn tarlan tak ang khan, famkim tawk lo deuhin headquarters Aizawl-ah a awm tur thu tarlan kha a ni mai a. He kan Bill tharah hian district dangah te pawh centre din a nih theih tur thu tarlan a ni kha kei pawhin a lawmawm ka ti hle a. Kan bial lampang, Lunglei South Constituency huamchhung Theiri-at-ah sawn Youth Centre, MYC building hi kan nei nghe nghe a, kei pawhin tum hnih-thum lai kan Chairperson te nen pawh kan tlawh tawh nghe nghe a. Hmun tha tak leh building tha tak kan nei a. Remchangah han la ila, sawlai te pawh saw tihchangtlun chhoh a theih dawn niin ka hria a. He dan changtlung zawka kan han thum leh thil tithei zawka kan han dah hi lawmawm ka ti a. Sawti lai hmunhma chungchangah pawh a bulhnai, a kawmthlanga in neitute kalna kawng bo tura sak hnan a han ni ta mai saw, kawng thar rehsak an ngai a ni tih te pawh Chairperson nen kan thlekpuu thuk thuk tawh a. Heng hi thuneihna famkim zawka thum an nih chhoh chuan, chung tihfel ngai neuh neuhte pawh tihfel zung zung theih turah kan beisei a. He bill thar hi ka ngahkhlel hle a ni tih te pawh kan tarlang duh a ni.

Tin, kan Dan hlui chapter 2-ah ‘terms of office’ leh ‘condition of service’ hnuaiah khan Commission member-te ban leh chawlh theihna dan zawng zawng nen khan fawmkem deuh vek niin, a inkhawikhawm deuh vek a. Tuna kan dan tharah hi chuan Section 8 hnuaiah a hran hlakin, felfai zawkin member-te chawlh tir leh ban theih dan te, an

hmunruak hnawhkhah theih dan tur te dah a ni hi a felfai zawk hlein ka hria a. Kan dan hlui MYC Act, 2008 ah khan commission hna leh thuneihna – ‘power and function’ anga talran kha ni mai a. Tuna kan bill sawi mekah erawh hi chuan, Chairperson leh Member Secretary-te pawh thuneihna leh an hna tur a hrana felfai taka sawi lanin a lo awm ta a. Kan dan hmasaah mumal deuh hleka an thuneihna chin pawh tarlan nilo, tunah felfai taka tarlan an ni ta hi lawmawm ka ti a. Kan Minister-in a move-a a sawi lan ang khan, famkim lo lai awm ang angte thuan famkim zel a ni hi a lawmawm ka ti a. Sawi

Tin, MYC officer leh staff chungchangah pawh thawktu lak dan mumal zawk chiang taka dan in tarlan chhoh a ni ta hi lawmawm ka ti a. Appointment chungchang pawh Section 13 hnuaiyah hian felfai taka tarlan a lo ni ta a. Tin, sorkar remtihna hnuaiyah Commission hian post-te pawh a create thei ve dawn ta a. Chumi kaltlang chuan thawktu lak a ni anga, thawktute rawih leh enkawl dan kalphung fel taka duan a ni chho ta hi, kan hun hman meka member-te ngei pawhin kan rilrua zawhna kan siam kan siam thin – ‘A ni hi engati nge ni leh si; A hma khan chuti a ni si a, tunah hian...’ tia dan mumal kan neih loh avanga zawhna mumal lo tak kan lo siam thin leh kan buai rukna thinte pawh, hetianga a thawktu lak leh enkawl dan fel tak kan neih chhoh takah chuan a fel chho turah beisei ila.

Heng zawng zawn avang hian he kan bill thar hi kan mamawhin, ‘a lo tul hle a nih hi’ tih min ngaihtuah tir a. Chuvang chuan, he Bill thar kan rawn putlul pawh hi kan Minister-in a rawn move ang khan, kaltlangpui ni ngei se tiin, keima mimal duhdan pawh kan sawi lang nghal ni se. Ka lawm e.

SPEAKER : Member zahawm tak Pu Ngunlianchunga ilo sawm ang.

PU C. NGUNLIANCHUNGA: Pu Speaker, ka lawm e. Ka hmingah ‘C’ hi a tel a; (**Speaker:** Sorry; ka lo hre tawh ang e.) min hriatsak a tan. Vawiinah ‘*The Mizoram Youth Commission Bill, 2025*’ pharh a ni a. Kan ngaihthlak tak ang khan kan Minister khan, ‘kum 2008 a mi kha a rei tawh deuh a’ a ti a.

India ram, ram ropui taka kan awm a. India Danpui hi vawi 125 amend a ni a; keini Autonomous Council phei chuan kan buiapui ang reng khawp mai. Chutah chuan, District Council thuneihna lian zawk a lo chang ve theih nan kan ngai pawimawh khawp mai a; kan buaipui a, kan hre angreng viau mai a. Vawiinah kan hian he Dan hi a sawisel ngawr ngawr lam ni lovin, engatinge 2008 ami mai kha appeal-a kalpui mai lova, amendment siam kher hi, eng role nge kan play hi aw, ka ti a ni.

A Dan chu a lo fello anih pawhin, a chapter-ah pawh belh leh maia, hna lak theihna tur pawh dah tel mai awm tak. A hmaa mite lo siam a nih avang nge ni a; nakinah pawh kan la sawi dawn a. Village Council Bill te pawh repeal a ni a, Dan thar hlak siam hi a buaithlak a. Tunah pawh he Sorkar hi engtik ni ah emaw chuan Sorkar dang a la rawn kal ang a; Dan hi vawi lekhata siam famkim vek theih a nilo. Chuvang chuan, India Danpui, India Constitution meuh pawh vawi 125 amendment kalpui a ni a, tunah phei chuan vawi 125 aia tam a kal tawh mai thei, ka hriat chin ah a ni a.

Chutiang chuan, he Mizoram Youth Commission Bill pawh hi 2008-ah MNF Sorkar khan a siam a. Chutih mek lai chuan, Pu Speaker, vawiinah hian party hrang hrang hmalakna han sawi dawn ila. Kum 2008-a MNF Sorkar a rawn din chiah khan he Youth Commission-ah hian nasa takin hma chhawp a rawn nei chho a, Aizawl-ah te, Lunglei ah te Serchhip-ah te hma lakna an rawn kalpui a. Khang kha Congress hun laia hma chhawp niin ka hria a. Chu mai chu ni lovin, April - May thla-ah khan District khawpui tinah Youth Summit leh Road Show, 2018 te kan nei a. Thalai singnga chuang khatah khan an kalkhawm a ni.

He Youth Commission lo ding hian thalaite hmakhua nasa takin a rawn vai-eng a, amaherawhchu, a famkim vek lovang tih erawh chu a chiang a ni. Chutih mek lai chuan, Dan lo awm tawh sa kha paiha, Dan thar siam kher hi engnge a tulna? A tul a nih chuan amendment type-a kalpuiin, dah belh ngai a nih chuan dah belha kalpui mai awm anih laiin hetiang kan han ti chho hi; ‘hei hi ZPM hun laia tih puitlin a ni’, tih deuh kher kha kan duh vang nge ni? Kan Bible-ah kan hmu a, Paula’n a sawi chu, “Kei Appolova Pawl, kei Kipha Pawl, kei Paula Pawl, tih suh u. Appolova’n a phun a, Kipha an tuiin a chawm a, Paula’n a enkawl a, Pathianin a than tir mai a ni”, tih kha, kan Pathian thuah pawh kan hmu a.

Vawiina dan kan siamtu kan nihna chungchangah, khawvel inthlak danglam zela thil thar inthlak zelah, vawiinnia thil tha kha, a lo thalo leh anga, a bu chhunga mi hi ka sawisel a ni ngawt chuanglo, a tha reng mai. Mahse, vawiinniah a kalphung erawh hi chu, kan hmalam kan kal zelna turah MNF leh Congress sawrkar lo siam tawh te, PC sorkarin in an lo siam tawh te repeal-a, a thara siam vek kan tum a nih chuan, sawrkar dang a lo pian hunah; hei tunah te pawh a langin ka hria; ZMC ah te pawh MIMER kha ZMC a ni a, tunah ‘H’ belh leh a ni. Khatiang mai maia kha he ramah hian awmlo se tha ka ti a. A famkimlo laite chu i belh ang u i dah belh ang u; i siam belh ang u. A then chu omit a lo ngai a nih pawhin, ‘hei hi chu a relavant tawh lo e; hei chu kan tan a tul tawh lo e’ kan ti a nih pawhin chu chu thu hran ni ta sela.

Finance & Account chung changah te pawh Audit a lo awm lova, a coulumn kha dah leh mai ila, a sub-section pawhin dah belh mai ila. Khatiang zawnga kha kan kalphung ni sela. Tuna kan kalphung dan hi chu, kan campaign laia a hmaa sawrkar lo kal tawh te engmah tih neilo ang deuha kan sawi thin te kha, vawiin niah te pawh hian a rawn lang em, ka ti a. Vawiina kan Dan siama hi tun atanga kum 10 a kal chuan amend ngai te pawh a la rawn awm ang; belh ngai pawh a awm ang; paih ngai pawh a awm ang. Chutianga chu Pu Speaker, vawiinnia kan kalphung thar hrim hrim hi hetiang tur hi em ni dawn? Pu Speaker, ka lawm e.

SPEAKER : Aw le tunah chuan Pu Robert Romawia Royte ilo sawm ang.

PU ROBERT ROMAWIA ROYTE: Pu Speaker, ka lawm e. Hei vawiina kan thil sawiho tur hi a pawimawh khawp mai a, Minister zahawm takin Bill thar hlak, subject inang si ah a rawn introduce a ni a. Hetiang hi kalphung-thar he bill ka hmuh tirh atang khan a lo lang nghal a. A bill hmasa copy te ka han en ve a; kum 2008 MNF sawrkar hmasaah khan lo siam tawh a ni a, tin, Congress sawrkar pawh hian legislation pawimawh tak mai an lo nei a. Ka hma chiaha mi khan a sawi dawn emaw ka ti a, a sawi lang lova; kum 2015 ah an lo siam a, he a bill chung changah hian anni chuan an tihawm tak tak tiin,

a bill awmsa parent awmsa, a hming pawh la puin, ‘Amendment, 2015’ an rawn ti mai a, tihawm tak ni pawhin ka hria a.

Tichuan, hei, sorkar thar a lo piang a, ‘*Mizoram Youth Commission Bill, 2025*’ an rawn ti ve thung a; ‘*amendment*’ ti lovin, bill thar hlak angin an rawn in troduce a, hei hi. Tih theih tho chu a nih ka ring a. Mahse, ‘*amendment*’ rawn ti se, a hming te, a subject matter leh engkim hi addition tlem tlem leh eng emaw tlem tlem a awm tih loh hi chu, a inang khawp mai a. Chuvang chuan, keima ngaih danah chuan, Youth Commission Bill, 2025 hi ‘Second Amendment Bill’ tih awm takah ka ngai a ni.

Tin, he Bill thar chapter 2 section 4 ah hian Pu Speaker, i phalnain kan chhiar chhuak ang a, “LESDE - Minister Labour & Employment Skill Development Enterpriniourship Deptt., who shall be the Chairman of the Committee” tih a awm a, helai te ah chauh hian committee hi a awmin ka hria a. Minister hi ‘*a committee-ah hian a chairman tur*’ tih helai hian Chiang takin a inziak a. Chu committee ah chuan ‘members te pawh a ruat tur a ni’ tih a rawn tarlang a. Helai hian ngaih fin theih takin “Chairman of the Commission” tih leh, “Chairman of the Committee” tih hi an inhnaih renrawn khawp mai a. Helai hian he committee-a a chairman Minister hian a chairman-na hnuai ah hian a member-te ruat chauh hi a ti dawn em ni? He Dan hnuai hian Sorkar, autonomy body a ni dawn a, sorkar anga minister te hi hei aia prominent deuh hian tel thei sela ava tha dawn em! Helai te mai ah chauh intervention awm tur hi a dik dawn em ni aw, tih te rilru ah a lo awm a.

Tin, chapter 5 ah khan hlawh chung chang – ‘Salaries and Allowances to be paid out of grants’, Grant-in-Aids hmangin sorkarin a chawm dawn a ni tih kan hmu a, kha kha chu a hma pawhin thil kalphung a nih hmel a. Hetah hian Pu Speaker, i phalnain kan chhiar chhuak ang a - ‘Honorarium, chairperson, time to time’ tih te a ni a. A nihna takah chuan, Mizoram Youth Commission ah hian he House chhunga member nite hi Youth Commission Chairman te an lo ni thin a. Khami tinzawn leh mitthla hmu hian he Dan an siam tharna ah pawh hian MLA te chu MLA atangin hlawh an neisa a, an hlawh tur hi pek leh chuan an ngai lo tihna mai a niin ka hria a. Helai ka chhiar lai hian kan MLA zahawm tak tak ruling-a kan chhuanvawr kan han tih ang chi Pu TBC Lalvenchhunga hming te pawh sawi a pawilo ang chu maw, NI. Beryl-i te, Pu Jeje Lalpekhlua te pawh hi Youth Commission-ah hian Chairman ni sela an va duhawm dawn em, ka ti a ni.

Tin, Assembly-a thu ve te hi sorkar hmasa lamin chairman-a an lo ruat thin ang khan awm ve ta sela, tih te kha, tuna chairman hi mimal takin ka hre chuang lova, an thawk tha ang tih pawh ka ring tho a; he Dan spirit ah hi chuan MLA te chanvo tur deuha ngaihna, chu chuan sum te pawh a ti heklo deuh ang a, MLA hlawh kha an hlawh mai dawn avangin, tih te kha rilru ah a awm a. Kalphung-thar lampang, ZPM pawl ka sawi ang tih te chu ka hlau angreng a, mahse ka rilru tak tak waviinah hian ka sawi a ni. He Dan ah hian, ‘MLA te an ni tur a ni’ a ti chiah lo na a, MLA te an nih loh chuan, thil a he deuh hlek thin tih kan hriat kha.

Chuvang chuan, MLA-te awmna tur ang deuha he Dan-in a rawn sawina chiah chu a awmlo mahse, kan thiante ni awm takte kha han awm se tih te rilru ah a lo awm a. Chairperson ah hian Legislator ngat hi he MYC ah hian chairperson hi ni se chuan, a Dan

hmingah pawh hian ‘The Mizoram Youth Commission (2nd Amendment) Bill, 2025’ an rawn tih zaih ka ring a. Youth Commission lama awmte he House-a roreltute an nih chiah lohna hian a hming pawh hi an phuah fuh lo deuh em aw, ka ti a; ka support lo bur chu ni chuang lovin. Select Committee ten rawn enchiang leh deuh sela, ‘helai hi a tha em; Minister chanvo leh a Committee pawh tu tu nge an nih dawn’ tih pawh chiang lova ‘committee-in a recommend ang’ tih awm bawk si lai hi han tih that deuh a ngai em aw, tih kha ka rilru a ni e. Pu Speaker, ka lawm e.

SPEAKER : Sawi leh turin Dr. K. Beichhua ilo sawm ang.

DR. K. BEICHHUA: Pu Speaker, ka lawm e. vawiin ah ‘The Mizoram Youth Commission Bill 2025’ a rawn lut a, thalaite hamthatna tur ngaihtuahna hmang chung a rawn tih a nih ngei ka ring a. Chutih laia ka rilru a lo lang chu, a hma khan ‘The Mizoram Veterinary Clinical Establishment Bill kan luhpui a ni. Chu bill chu India ram a bill lut hmasa ber a ni, Clinical Establishment ah. Kan inchhuang ve angreng viau a, lawm pawh kan lawm a ni. Chutih lai chuan, vawiin a bill kan sawiho hi, kan member zahawm tak takten an rawn sawi tawh ang khan 2008-a din a ni a, 2015 ah vawikhat amend a ni a, vawikhat chauh a ni. Amendment tam tak han thlir leh eng emaw thil buaithlak chu a nih chuan, repeal pawh hi a awm ka ti a. Chutiang ni silo, vawi khat chauh amend lo ni si, a chhung thu hi han chhiara, paih vek ni chuang silo, tam zawk a hma ami ni tho si, tlemte han belha repeal mai hi thil tih theihloh chu a ni hauh lo a, mahse kalphung tur, kalphung dik a ni ang em, tihlai hi. Hei hian precedent thalo kan hma lam hun lo la awm zel turah a siam palh ang, tih te ngaihtuahna min neih tir a. Mahse, chutih rual chuan, tun sorkar kan hrawn mek hi kalphung-thar sorkar a ni a, kalphung tharin an kal a nih dawn hi, tih te pawh kha ngaihtuahna ka nei bawk a ni.

He bill hi hetia han en mai chuan a tha viau a, a Bill ang leh tih tur hma chhawp anga kan kal theih pheih chuan a tha viau turah beisei ila. 2008-a Dan awm lo, 2025 a bill-a telh belh leh thil thar awm chu, chairperson bik a hrana thu neihna pek section 6-na leh Member Secretary thuneihna a tarlan section 7 te hi a niin ka hria a. Hetia a lan danah chuan, Chairperson leh Member Secretary hian thuneihna zau tak, member awm ve te rawn kher ngai lova tithei anga ngaih a ni tlat mai a, hei hian ngaihtuahna thui tak min neih tir a. Committee, Council a ni emaw, Commission a ni emaw anga thil han tih mai tur ang chi, khang te te ho ah khan, Chairman hian thuneihna a nei lian angreng si a, misuse palh a awm thei ang em, tih te pawh ngaihtuahna min neih tir a.

Tin, Section 9, sub-section 2 hnuaia clause belh chhungah hian rehabilitation chungchang te a rawn sawi ta a. Heng rehabilitation chungchang thalaite tuna a sawi zelah pheih chuan substance abuse leh juvenile chungchang te pawh a rawn sawi a. Heng te pawh hi concerned department hian theihtawp chhuaha, tuna hma la mektu an awm lai hian, tuna commission kan neih lai mek hi manpower-ah pawh kan indaihlo, sum ah pawh kan indaih lo. He kalphung thar sorkar-ah hian sum leh manpower pawh a.. vawi leh khat a indaih viau a, han inhlan kai chhoh ngaihna pawh hi a awm lo, hetia ngaihtuah hian. Chutiang a nih lai a, heng a enkawltu tur department tha tak tak Social Welfare Department-ina a enkawl tur ang Juvenile Justice Act te pawh kan nei a, ti tute pawh an awm a, hengte an thil tih tur keiniina lo tih tum hi, *kan*

kuanglo kan nawr em tih lai te pawh hi ngaihtuahnaah a awm a.

Hei, clause 18 hi a mak lehzualin ka hria a. Commission tih turah hian leh, an kalphung turah hian Mizoram chhung mai nilo, Tuipui-ral foreign ram thleng thlenga partnership siam tel a lo ni zel mai hi; hei hi India sorkar foreign policy thleng nghawng thei thil a nilo maw? Chuvang chuan, heng te te pawh hi uluk lehzuala kan en a tha awm mang e. ‘Kan huang kan zauh lutuk deuh em’ tih ngaihtuahna te pawh min neih tir a ni.

Tin, section 10, sub-section 6 hi ka en vang vang a, commission hian thuneihna sang tak, sum hmuh dan leh hman danah te a nei dawn niin a lang a. Hei hi kan Chief Minister zahawm takin November 2024 khan heng CSR te leh CSR atang a sum kan hmuh ang chi te, CSR cell dinin Chief Minister Office lamah centralized a nih tur thu te pawh kha a sawi a, ‘Chief Minister office atanga monitor vek a ni ang’ tih te pawh kan hria a. Commission-ina thuneihna zau tak sum lakluhna kawng leh a hmanna zawng zawng kan tih chuan, heng te hi a in clash deuh lo maw tih ka rilru ah awm bawk a ni.

Section 13, sub-section 2 ah post creation te a rawn tarlang bawk a. Sorkar hian sum hman tur hi a nei turah ngai ila; hlawh mumal taka pein kan inchhawr thei turah pawh ngai ila. Financial Memorandum-ah khan ‘will not incur any extra additional from the State Government’ a ti a ni a. Commission hi hemi ang hian a kal theih a rinawm chiah em aw, tih lai te pawh ka ngaihtuahna ah a awm bawk a.

Engpawh ni se, kal thei turah beisei ila, chutiang tur chuan kan theihtawpin hma kan theihna zawn zawnah hma la theuh ila. Chuvang chuan, he bill hi tha tak anga lang si, a rawn pian chhuahna motive pakhat, a chhunga thil awm hi kan tlin dawn nge, dawnlo tih te, kan kuanglo kan nawr em tih te, kan huang kan zauh lutuk em tih lai te pawh hi ngun taka kan thlir chuan, kan ngaihtuahawm viauin ka hria a ni. Ka thlawp leh thlawp loh chu ka sawi lem lo ang a;, thlawplo pawh ni ila, ‘*Kela, be be mah la ka talh tho ang che*’ tih ang deuh kha a ni a. Khati zawng kha ni mai se, Pu Speaker.

SPEAKER : Member zahawm tak Pi Baryl Vanneihnsangi ilo sawm ang.

PI BARYL VANNEIHSANGI: Pu Speaker, Ka lawm e. Bill a ka luh hmain. Hei a tir lamah khan a inbuatsaih tak taka te kha chu an rawn ding nghal mai a, a Bill a pawh kha anmahni hunlai a an irawm chhuak a nih thu te, tha an tih thu te leh tih changtlun a ngaih zia te an rawn sawi a, kan ngaithla ho a nih kha. Amaherawhchu, kan sawi tui zel a. A bawp lawka lak tur hrim hrim zawng emaw tih mai tur hian a pawr tawlh tawlh mai em maw ni; nge ni, kan invenpuina te pawh a ni tho ang a. Helai kan House chhunga thute hian kan nihna kan hriat thar leh hi a pawimawh hlein ka hria a. Kan ram tan, kan thalaite tan thil thar tur kan relnaah hian, ‘keini tih; an ni tih; nangni tih’ kan tih zel dawn chuan, nakin zelah kan la inthlang dawn chauh a, a la kal dawn chauh a. Chuvang chuan, helaiah hian precedence tha tak siam hi a thain ka hria a ni. Chutiang ni lova, kan rilru lo pui nia inpuh thluk deuh tumna awm thina hi pawi ka ti a. Thil hi a subject takah lut lo hian, emotional appeal nen a nilo lam lam hi kan sawiho thinin ka hria a. Chu chu he House zahawmna kan vawna atan pawh hian ka’n sawi thar ve leh ni sela. Kan senior zawkte an

ni a, an hniakhnung zuitu turte kan ni a. Chuvang chuan, a hmasa lama he Youth Commission lo dintute pawhina tha an tih em em, an pawm em ema te pawh kha kan rilru hian hre reng sela. Tichuan, tih changtlun tumin tunah hian hma kan la mek a ni tih hi, kan sawi hawng a ni ka'n tih lai khan, kan sawi thar leh duh a.

Tichuan, hei Mizoram Youth Commission din a nih khan keini pawh entertainer te kan la ni ve a, chutah chuan min duhsak a, min sawm a, Chairman hlui Dr. Tanpuia te nen pawh kan ti ho nasa thin khawp mai a; kei pawh hian ka ta neih ve a. An chhungkuaah hian min chhiar a, kei pawhin chutiang chiah chuan hei hi ka chhungte angin ka ngai ve a. Chuvang chuan, he Bill pawh hi kan lo en ulukin, kan lo zir uluk ve khawp mai a.

MYC Bill, 2025 hian hna zawn leh hna lak kawngah te thalaite kawng dik min zawhpuiin, hma min sawnpui dawn niin a lang a. Nichina changtu minister sawi tak ang khan, kum 16 chhung dan mumal lo, khatianga hna lak te leh thawktu lak te a lo nih kha, dan mumal lova lak nan chuan a rei khawp mai a. Kum khat chauh pawh ni se la, thil eng emaw zat hi kal fuhlo awm thei a ni a. Chutah chuan, 16 lai mai a ni a, tunah siam thatna tur te kan han pu lut a, kan han sawi ho thei a ni a, hei hian thla a timuang hle mai a. MYC staff-te rawih dan tur chungchangah tunah chuan sorkar hriatpuina leh phalna zelin helaia a rawn sawi ang khan, 'proper channel-in hnathawktu tur reng reng rawih tur a ni' a rawn ti a. Khalai kha kei ka lo duhthawh deuh hlek a. Ka sawi ang khan, hei hi ka inti-neitu a; chutah chuan, proper channel bakah khan duhsak zawng te ruai mai lovin a qualified te, a tling leh a tlaka te rawih zel ni sela. Tichuan, he Dâh hi a famkim ngeiin ka ring a. Kha lai kha uar takin ka'n sawi duh a ni.

Pu Speaker, Youth Commission ti-commission tute pawh nichin lamah khan kan ngaithla a, Powers & Functions chipchiar zâwkin he Bill-ah hian kan hmu a. Chapter hranin a awm ngailo tih te kan hmu a, a pawimawh lai ber te pawh a ni a. Chuvâng chuan, hetiang a chipchiar taka ziaa a han ni hi a lawmawm ka ti a. Kan experience chhe te, AMC lama kan tel vena ah *dual-authority* awm thei ang chi eng eng emaw hi a awm ve thei a, a buaithlak khawp mai a. Traffic chungchangah te pawh a ni a, 'no parking' tiha, parking chungchangah te pawh mipui kan hrilhhhai thin a, kan buai thin a; min ti chi-ai em em a. Chûng te chu awm lo sela, felfai takin MYC pawhin an nodal department LESDE-te nen inngheng thiamin thuneihna, he laia an ziah chin bakah hi chuan inrâwn tawnin kal zel sela. Chu chuan thalaite, he Bill hmang tur, chhawrtu turte tan hian felfaina leh awlsamna a thlen ngeiin ka ring a, beseina sâng tak pawh ka nei a ni.

Tin, Mizoram Youth Commission hi a awm chhan ber chu - Mizo thalaite kawng engkimah kan mizia, kan nungchang, eizawnaah te, taksa leh rilru hriselna, hemi *holistic development* kan tih te, henga hmasawn zêlna tur kawngpui tur a ni a. Hemi kawngah hian chapter 5, MYC Bill 2025-ah khan 'Miscellaneous Provisions' tih kha a rawn ziaa a. Hemi chapter hi MYC Act, 2008-ah khan a awm sa tho na a, 2025 Bill-ah hi chuan Mizo thalaite'n chhenfakawm taka hma an sawn theih nan MYC chuan hmachhawp (initiatives) hrang hrang leh tunlai khawvel ke pen ruala kan pen ve theihna tur kha a rawn tarlang a. Khatianga kalpui thin tur khan 'Sorkar phalna leh hriatpuina zela hma lak a ni ang' tih te a rawn tarlang bawk a, a lawmawm ka ti hle a.

Tukin lama tuna Chairman kan han biaknaah pawh (ka hraitsual loh chuan) Entrepreneurship Development Institute buatsaih tur te pawh MZU Incubation Centre- te nena tangkawpa hmalak tur a ni a, tunah hian Sorkar phalna te an dil mêk a ni a. Chutiang chuan, anmahni thuneihna an neih rualin an tih tur, an chanvo, inrâwn an ngaihna te, râwn tur an neih te hai lovin hetiang hian an kal zêl a. Chuvang chuan, he Bill hi Mizo thalaite hmasawna kawngah leh eizawna leh thil tinrênga min ti sâwttu leh changtlunna, changkâna, intodelhna min thlentu lo ni ngei se ka ti a, he Bill hi pass ngei turin ka thlâwp a ni. Ka lawm e.

SPEAKER : A lawmawm e. Sawi leh turin Pu Lalrintluanga Sailo, member zahawm tak ilo sâwm ang.

PU LALRINTLUANGA SAILO: Pu Speaker, ka lawm e. Vawiinniah he House zahawm takah a changtu Minister-in Mizoram Youth Commission Bill a rawn pulût hi a lawmawm a, a thu han en pawh hian a tha khawp mai a. Amaherawhchu, nichina member zahawm tak tak ten an sawi tawh ang khan, a lo luh dan laia erawh hi chu duhthu a sâwm zân lo em aw, tih ka ngaihtuah a.

Pu Speaker, i remtihna, vawiinniah kan Opp. Leader te, dinglama kan member zahawm tak Hrangturzo bialtu, Pu Lalmuanpuia Punte te'n he Commission a dinna atân hian tha tam tak kum 18 kal ta ah khan an lo thawh tawh thin a. Pu Lalchandama Ralte MZP President a nihlai te, Pu Muanpuia, kan member zahawm tak NESO-a Vice Chairman a nih lai atang tea heng, Sorkarah idea tha tak an neih avânga Sorkar kal tain a ngaihtuahna thui tak senga he Commission hi a din a lo ni a. A pian tih atangin kan thalaite pawh an phur hle a ni tih kan hria a. Chumi kengkawh tur chuan he Bill rawn neia, Mizoram Youth Commission, All India-a din hmasa ber kan lo nihna pawh a chhuanawm hlein ka hria. Vawiinah member zahawm tak tak pahnihte chungah hian a bik takin lâwmthu ka sawi duh a.

Tin, a dinna kawngah MNF Ministry kal ta khan zirchianna te pawh mumal taka an neih tho rualin, a Dân te hun lo kal leh zêl ah mumal taka en zui chhoh zêl tur atân pawha buatsaih a ni tih kan hria a. Chutiang chuan, kha Ministry kha a lo liama, Congress Ministry lo kalin kum 2015-ah he Bill tho hman hian amendment a rawn siam a; member zahawm tak tak te rawn sawi tawh ang khan.

Vawiinah hian second amendment bill ni awm tak a nih laia a thar hlak anga an rawn ti hi chu, kan Minister khan a bulah, he Bill sawi hawna a rawn sawi ah khan tha takin sawi mah sela, House kalphung leh kan practice dân hi a ni em aw tih erawh chu ka ngaihtuah angreng viau mai a. He lai hi tlema a wording tam taka hi kan han en hian Bill hmasa, 2015 leh 2018 a mi tho a tam zâwk hi rawn quote chhuah tho a ni a, a thar hlak anga thil lo lang laia hi chu a felhlel deuh em ka ti a. Nichina member zahawm tak Dr. K. Beichhua sawi ang khan, helai ah hianin thil danglam lutuk, eng eng emaw a tha zawngin her rem pawh ni sela, a nihphung erawh hi chu tlemin a dik lo deuh em aw tih ka ngaihtuahna ah a awm a ni.

A thu hrim hrim, a Bill rawn kalphunga hi chu; ni e, kan Minister zahawm tak pawh thalai te an la ni a, heng atang hian thil thui zawk thlirin thil thar tha tak takte pawh duang chhuahin he

khawvêl, kan chetvêlna ah, thalai chetvêlna ah te, chumi mil zawng chuan a rawn kalpui a ni tih a hriat hlein ka hria a, chutah chuan ka fak duh a ni. Amaherawhchu, he Commission enkawltute hi he House-a experience nei miah lote an nih avânga hetianga Bill thar hlak anga lo kal hi a ni ta mai a ni tih erawh chu ngaihtuahnaa a awm a ni. Chuti ni lo sela chuan, amendment nei tur angah kan lo inngai a. Amaherawhchu, Bill thar anga a lo kal hian hun lo kal leh zêlah hei hi thil practice tlâk fo a ni em aw, tih te min ngaihtuah tir a ni.

Nichina member thenkhat in an sawi ang khan Sorkar lo ding leh sela, amendment ni lovin Bill thar ang hian tuna kan Bill hi rawn appeal-in han ti leh ta sela a tha ber ang em? A puitling ang em? Hei hi hruaitu hmasa te hmalakna ang chi hi thup bo tumna a ni em, tih te vawiinah hian ka ngaihtuahna ah a awm a. Tin, khami a kalphunga kha kan practice loh lam zawng a ni deuh em aw tih min ngaihtuah tîr deuh a ni. Chuvâng chuan, hei hi ngaihtuah nawn leh deuh a tha em aw ka ti a. Ni e, member thenkhatte sawi ang khan, Select Committee-ah emaw thlen ni sela, lungruual takin kan pass dâwn tho sia Pu Speaker, I kaihhruaina hnuaiah hian.

Hei hi Select Committee-ah te thlenin; vawiinah hian he Bill tho hi ni sela. A hming, “*The Mizoram Youth Commission Bill*” tilo hian, “*The Mizoram Youth Commission Second Amendment Bill, 2025*” ti mai sela, kan lungruual tlang mai ang em aw? Tin, a nih dân phung pawh a ni mai lawm ni? Kha, member zahawm tak tak ten Bill an rawn put luh pawh amend a ni zêl a. Hei hi a hmaa dân la neih miah lo, Bill la nei miah lo chu ni ila, a hriatthiam theih a ni. Amaherawhchu, amendment pawh a lo awm tawh si a. Khami thai lang miah loa a fresh anga kan kalpui a ni hi chuan *precedence* tha lo deuh hi vawiina he rorêl na khawla members-te hian kan siam anih chuan kan hmathlirna hi a tawi deuh mange tih hi; miin min dem ang tih te pawh ngaihtuahna ka nei tel a ni tih kha Pu Speaker, ka’n sawi duh a ni e. Ka lawm e.

SPEAKER : A lawmawm e. Opp. Leader-in sawi duh a neih chuan kan sawm dawn ang a. Opposition Leader-te hi chu allotted time minute 5 an pelh deuh pawhin an sawi laklawh chuan kan hrethiam thin a nih kha. Tunah ilo sawm ang.

PU LALCHHANDAMA RALTE, OPP. LEADER: Pu Speaker, ka lawm e. Vawiinah, “*Mizoram Youth Commission Bill, 2025*” hi sawiho tura pharh a ni dawn tih hriat khan ngaihtuahna a vâk thui khawp mai a. “Eng nga tinge amendment ti lova, Bill awm sa, 2018 Bill repeal duhna thinlung hi a luh aw?”, kan ti a.

Kan Bill hi ka’n chhiar hian 70-80%, 100% hi a ngai kha a ni vek tho si a. Nichina kan House Leader-in a sawi ang khan, GST (Amendment) ah pawh kha reilo te ah pawh 45 vêl amend tur a thar kha a rawn awm e, a tih ang deuh khan, a words leh thil dang thlaka kha a ni mai si a. Kan Rorêlna-In zahawmna te, kan senior kal tate zahawmna te hi vawn nun hram hram hi a tha mang e tih ngaihtuahna te ka nei a. Kan Member Pu Lalrinsanga Ralte te, Er. Rohminga te, Pu Lalrintluanga Sailo te pawh khan kan hming te pawh an lam ri ve nawk nawk a. Vanneihthlak takin he Youth Commission din a nih theih nan Pathianin hun remchang min han pe ve a. MZP President kan nih ve lai taka party hrang hrang leader-te, hei Pu Duha te ho pawh hi an manifesto ah telh theih turin kan kawm a, khatiang khan

party hrang hrangte leader lo kawm kualtu ah khan kan han tang thin a. MZP hi Youth Commission dinna kawnga credit hmasa ber pek tur chi an ni tih kha ka sawi nawn duh a.

Chumi hnuah chuan vanneihthlak takin ram rorelnaah te kan han tel ve leh a, he Youth Commission din an nih dawn laia Drafting Committee member-ah ka tel ve leh a. Chuvang chuan, vawiinniah hian hei hi kan repeal dawn a nih chuan, mihring hming tute emaw pawh Pu Speaker i remtih chuan he House a awm thinte he hi session pawnlam atangin lo en dawn a vawiinah hian, repeal dawn tih an hriata rilru na tak takte an awm a. Khatih hunlaia kan Minister in-charge Pu ZH Ropuia, Sports & Youth Services Minister kaihhraina hnuaiyah Pu Liansuama kha Drafting Committee Chairman a ni a, Pu Lalrinliana Sailo kha Congress aiawhin Drafting Committee Member a ni a, Pu Andrew Lalhreliana kha kan House Leader Pu Duha nen chiah ZNP member an nih lai khan Drafting Member a ni bawk a. Tin, Pu Vanlalthaliana leh kei kha MNF atangin Drafting Member kan ni a. Tiang khan kan han ti nawk nawk a, sawrkarah a han lut chho a, 2008 ah khan kan han pass ta a.

2015 ah Congress an sorkar a, MNF kha chuan Youth Commission khan kan pass a, thui tak kan kalpui lutuk hman lova. Office leh bul tanna turte kan han ruahman a, 2008 kum chanve a kan pass avangin. Congress sorkar kum 10 chhung khan tha takin Youth Commission kha an rawn keng chho a, thil tamtak pawh an rawn ti a. Nichina kan senior member Pu C. Ngunlianchunga'n, "kan tih zawk emaw ka lo tia," a tih kha, han sawi theih tur ting khan ruahmanna te chu an siam hman a ni. Amaherawhchu, sawrkar thar MNF sorkar lo lan leha an bawhzui leh an tih te, a hmun hma leh a building sak zawng zawngte pawh kha MNF khan a rawn tih chhoh leh te a ni a. Khang MYC building te, Youth Center zawng zawngte kha khatih hunlai khan vanneihthlak takin LESDE changtu ka lo ni ve leh zel a. Vawiinnia kan Bill nen hian mak tak mai hian kan lo inphiarzawm ve avangin, sentimental attachment a awm ve tih te kha ni se.

Engpawh ni se, sorkarin tha a ti a, an pass dawnah kan ngai a, a tawpah rawtna te chu kan siam tho ang a. Helai kan dan han en hian, tunah hian tlema zawng hi chu ennawn a tha ang em aw, tih te kan nei a. Section 9 – 'Function of the Commission' tiha 15-na ah khan Mizoram culture heritage humhalh chungchang te kha Youth Commission subject ah dah tel niin, a rawn hma tel dawn a; *Allocation of Business Rules 2019* ah khan kha kha Art & Culture chanvo te kha a ni a. Tin, library lam te, khatiang tihchangtlun lam te pawh kha a hawi tel dawn a. Khang *Youth* tihah ah khan engpawh a leng kan tih rualin, kan Dan hi han enchiang ula, department dang chanvo, Allocation of Business kan neih te nena intibuai tur hi a awm zeuh zeuh em aw kan ti a.

Tin, 2008-a kan Dan ah khan Youth Commission Member leh a chairman te ruat chungchangah chuan Youth welfare lam, khang activity leh experience neite kha ruat tura a duhthu ziah kha a awm deuh a. Tun tum kan Bill-a Youth Commission Chairman ruat dan hrim hrimah hi chuan Sorkar ruat tur chu a ni mai a. Chutih rual chuan, Member-te ruat tur khan LESDE Minister, Youth Commission Chairman leh LESDE Secretary te a rawn ti a. Sorkar lam khan Youth Commission Chairman kha ruat lawk lo ta se, tikhan Youth Commission kha function lovin a awm reng dawn nge tih kha, Member pakhat a

ruattu tur Chairman kha a awm a, kha kha Governor hminga ruat tur tih kha a ni a.

Tin, Youth Commission Member ruat turte an background turah khan Youth lama activity nei, thalaite han kaihruai thei tur ang chi hun hmasa 2008 Dan a an bilha kha tunah hi chuan a awm ta lo a. Political appointment hlir hian tu tu emaw te hi kan inruat palh ang tih hi ka hlau a ni. Youth Commission lo pian chhan, lo pian dan enin, Youth welfare lama inhmang nasa, khawvel kal chho tura kaihruaitu tur mitha kan thalaite zing ami ni hram hram se kan tiha kha dah tel a ni lo hi, eng emaw sorkar ngaihtuahna ah chuan a tel tho maithei e. Amaherawhchu, Dan a nih chuan, hun kal zel turah fimkhur ngai hi a awm ang, tih te min neih tir a. (**Speaker:** Minute 7 a; kaw k a, zo thei dawn hnai tawh em?)

Sum leh pai leh thil dangah pawh thuneihna kan pe tam viau dawn a, a kal zel ang a, LESDE Minister tan pawh hianin nakin lawkah chuan LESDE Department hnuaiah mi ni si, LESDE Minister part tur kha kan Bill-a Act turah khan a awmlo khawp mai a. Assembly ah tuna kan kal danah chuan Member a han Chairman te kha an nih loha an chhan theih dawn siloh chuan, thil tam tak harsatna awmah hian kan sawrkar lu tihaitu a ni thei ang em tih te min ngaituah tir a ni.

Engpawh nise, Pu Speaker, uluk takin *Youth Commission Bill 2025* hi min lo ngaihtuah nawn sak se. 2025 Bill han tih kher hi engnge a chhan? Mizoram-ah 2008 ah Youth Commission Bill kan pass a, India rama Youth Commission Bill nei hmasa ber kan ni a. Kan Assembly ti zawhawmtu, India rama a hmasa ber kan nihna a kha vawiin hi 2025 a lo nih tawh chuan, kan hnungah midang an tam tawh a, a kal zel turah hianin chu chu he House zahawmna te pawh hi a tibawrhbang pha in ka hria a ni. Chuvangin, Select Committee ah refer leh lawk ila, nakinah pass tur tho pawhin amendment form in emaw lo kal leh se. A dan an duh hi chu kan ti tho ang, i veilama mite pawh hian kan tuipui lutuk. Amaherawhchu, he House kal zel tur zahawmna atan te; Bill thar tia a hmasate an la dam ve reng laia hetia kan in repeal sak pawp pawp hi a thalo em le? Chuvangin, Select Committee ah kan House Leader hovin lo ngaihtuah thei se a tha lo maw, tiin Pu Speaker, rawtna ka'n siam a ni e.

SPEAKER : Awle, a lawmawm e. Hei chhunchawlh hun dar 1 a lo ri ta reng mai a, tikhanin kan House leader in sawi tur a neih chuan kan la sawm tur a ni a. Tin, kan Minister khan a wind-up tur te pawh a la ni a. Engnge, Kaltlang pui kan ti nge, thingpui inin kan chawl dawn? (House-in kaltlangpui a remti a)

A nih le. Tunah kan House Leader, kan Chief Minister zahawm tak Pu Lalduhoma, a sawi duhte sawi turin i lo sawm ang.

PU LALDUHOMA, CHIEF MINISTER: Pu Speaker, ka lawm e. Kan hriat ang khan, he MYC Act hi kum 16 kal ta 2008 ah MNF sawrkar lo siam a ni a. An siam laia an thinlung ni awm tak kha tinzawn theihin a chiangin ka hria a. “He Dan hi siam ila, a thawktu tur lak kawngah erawh chuan dan leh hrai engmah behchhan awmlo se la, kan duh duh kan lak theih nan i siam ang; kan duh duh huna kan ban theih turin, engmahin min phuar lo turin he dan hi i siam ang,” an ti ni phawt tur a nia. Tin, “Sum leh pai pawh duh

ang anga kan sawhkawi theih turin audit pawh hi ti lo ang,” an ti bawk a ni. Chutiang thinlung atanga he dan hi lo piang chhuak a ni a, a pawh ngawih ngawih a ni.

PU LALCHHANDAMA RALTE, OPP. LEADER: Pu Speaker, *Point of Clarification:* He House zahawmna hi vawn hram hram tha ka ti khawp mai a. Kha bill kan sawiho laia tel ve ngei a ni a, kan House Leader hi. Khatiang rilru kha tuman an sawi loh a ni a. A lo kim lo chu amendment-in a kal ang a, a kal zel tur a ni a. Khatiang tawngkam kha chu House Leader hi chuan hmang lo hram se ka duh a ni.

PU LALDUHOMA, CHIEF MINISTER: Pu Speaker, kan sawi ve phawt ang e. Thil thalo hi kan sawi ngam tur a ni a, kan siamtha ngam bawk tur a ni. Tichuan 2015-ah, rei fe hman tawh hnuah Congress in an amend a, a pawh lai, a thalo lai hi an amend duh miah lo. MNF thinlung tawmin vawiin thlengin he dan tha lo hi siamthat ngaiin an hnutchhiah a ni. Chumai a nilo a, siamthat kan tum pawh an la ui em em leh nghal a ni. ‘A vai vai hi chuan min paih sak teh suh u’ a an la ti talh talh a. Congress-in 2015 a an siamthat hnuah MNF a lo sorkar leh tawh a, a siamtha duh hauh lo bawk a ni. Kum 16 chhung kan thalaite enkawlna tur dan thalo hi he ram hian a hmang tawh a. Vawiinah hian amendment-a han tih that mai chi pawh a ni tawh lo a. ‘I thlak hlawk ang u; a dan hi repeal ila, a thar i siam ang u’ tih hi kan Minister-in a rawn pulut a ni. A tul ngawih ngawih a ni, chu chu...

PU C. NGUNLIANCHUNGA: Pu Speaker, *Point of Order:* Khalai kha, Congress sorkar a ni emaw, MNF sorkar a ni emaw, khatianga siam duhlo ang zawnga kan House Leader-in a sawi kha chu, House record-a awmah pawh a nalh lo ang a. Vawiinah pawh hian amendment-a hi a soal kan tilo, a kimlo lai dah belh hi kan pawm a ni. Amaherawhchu, repeal-a paih kher hi engnge a tulna kan ti a ni. Dan hlui 70% hi a rawn chhawpchhuak leh tho si a, engnge a danglamna? Khatianga kal tawhte khata taka tih kha chu, Pu Speaker, House Leader tih atan chuan a nalh lo deuh lo maw, ka ti a ni.

SPEAKER : Awle. House Leader sawi ngaithla phawt ila.

PU LALDUHOMA, CHIEF MINISTER: Pu Speaker, dan thalo hi kan repeal thin a, a thar kan siam fo. Engati nge chuti taka an lak nat? Kum 16 chhung he dan fel lo lutuk siamtha duhlo ho hian vawiina siamthat tum tute hi engatinge min sawisel? Kalphung thar kan ni a, dan tha lo chu kan siamtha zel ang; a pumpuia paih ngai pawh kan paih zel ang; kan ram hi kan siamtha dawn, keini chuan. Kum 16 chhung he thil hi a awm a, vawiinah kum khat awrh kan sorkar a, keini chuan a thalo tih kan hmu a, siamthat kan rawn rawt a ni. Kum 16 chhung lo ngawihpuia, siamthat tum lova a dang te te zawk lo vei kha, khang kha kan ni ve lo. Chuvang chuan, kan ram hi kan siamthat dawn chuan, a nihna tak kan sawi te pawh hi a ngai a ni. Hei mai hi a nilo a, dan thalo kan tih chu he sorkar hian a siamtha zel dawn. Kalphung hlui thil te chu a tharin a thlak zel dawn a ni. Chu chu ka’n sawi duh a.

Tin, CSR chungchangah CSR te pawh an khawih theihna tur provision hetah hian a awm a, ‘CMO in a centralized si a’ tih a ni a. CMO hian department te thuneihna kan lak sak miah lo, kan pui zawk a ni. Vawiinah hian department hrang hrang ten CSR an hmuh tam theihna turin Bangalore-ah meeting te kan zuk nei a, India rama company lian CSR

pechhuak thinte kan ko khawm a. Mizoram tana an sum te rawn hmang turin kua kan zuk hreuh a, tunah hian a result kan hmu mek a ni. Chunga kan hmuhchhuah te chu a khawihtu tur department te hnenah te kan pe ang a. Department ten an rem hriat a an rawn tihchhuah te pawh, department dangin chu vek lo tite an lo awm chuan, chu chu kan tana a tangkai tur ngaihtuahin kan lo regulate mai a ni. An zalenna kan chhuhsak lo a, kan pui zawk a ni, tih kha kan sawi duh a.

Tin, Pu Speaker, kan sorkarah hian opposition lam an tlangnel em em hi lawmawm ka ti a, kan MYC Chairman tur te pawh min rawn rawt sak ngam zel a. Kan minister-te pawh min reshuffle sak chang te pawh a awm leh zeuh thin a, media-ah te kan lo hmu a. An tlangnel khawp mai a, a lawmawm lamah ngai ang. Tin, Library leh Heritage chungchangah te MYC hian tih tur a nei ve a ni a. Chu chu *Allocation of Business* nen a inkalh ang em tih hlauhthawmna deuh a'n awm a. A inkalh hran lo a, hetiang convergence-a tih ngai hi kan ngah a ni.

Department te hi water-tight compartment anga then hleih theih loh an ni a, *entirnan* – lo kan nei a, kan vah dawn chuan Forest purview a ni; buh kan ching a, Agriculture purview a ni. Tunah hian kan sorkarin buh an lei leh ta a, Supply lam chan a lo ni ve leh ta a ni. Aprocessing unit te chu C&I lampang chan a lo ni ve leh a, khatiang khan. Thil pakhat department tam takin kan inkhawih tawm hi a awm a, harsatna tur a awm lo turah ngai ila. Tin, MYC Chairman appoint chungchangah fimkhur tura chahna kan hmu a, a lawmawm a. ‘Tunhma lam ang kha chuan kan ti ve lo ang’ tih, he House hi ka tiam e. Chuvang chuan, he Bill hi pass-pui ka rawn ngen a ni e. Ka lawm e.

SPEAKER : A lawmawm e.

DR. K. BEICHHUA: Pu Speaker, *Point of Clarification:* ‘Siamthat’ kan ti a, siamthat chu ‘amend’ a ni; ‘Repeal’ chu ‘nuai bo’ a ni. Chuvang chuan, tuna kan Bill hi amend ni lovin nuai bo a ni. Chulai chu hun lo la kal zel turah he House zahawm nan te leh kan tih dan mi hmuh leh mipui hmuhah pawh thil mawihnai ni turin kan duh a. Siamthat ni lovin nuai bo a ni; chulai chu a diklo kan tihna lai chu a ni.

SPEAKER : Aw le, a chiang e. ‘Thlakthleng’ te pawh ti ila a dik thei tho mai awm e. Engpawh ni se, a Bill neitu Minister zahawm tak Pu Lalnghinglova Hmar, a Bill te windup-a, House pass pui dil turin ilo sawm ang u.

PU LALNGHINGLOVA HMAR, MINISTER: Pu Speaker, ka lawm e. Kan Bill put luh kha kan Minister, House Leader tiamin mi 9 in kan sawi a. Kan inlungual tlang viau dawn a, amaherawhchu, a Bill in a content-ah dan ni lo, a ngaihtuah chhuak tu ten kan ngaihtuah dan pawh ni chuang lo, kan ngaihtuah dan nia an ngaihtuah kha an rawn sawi tak hnu khan, a danglam ta deuh a. Mizoram Youth Commission dinchhuak tute ka sawi tawh a, a tirah khan. Kan sorkar hmasa te fakawm zia te pawh ka sawi tawh a ni. Tin, an thiltih that kan chhonzawm dawn tih pawh kha kan sawi mek laia, he bill kan put luhna spirit ni miah loa an han puh ta daih mai kha, a hrilhhai thlak ang rengin ka hria a. Chutih rual chuan, a sawi hmasatu pahnih kan member Pu Lalrinsanga Ralte, Serlui bialtu leh

Thorang bialtu Pu R. Rohmingliana ten an sawite kha kei chuan ka thlawp vek a ni; ‘MNF kutchhuak a ni’ an tih te.

Tin, Pu R. Rohmingliana’n fakna a sawite pawh kha ngaihthlak a nuam em em a. ‘MNF in 2003-a a intiam angin, 2008-ah a din ta a ni’ a tih te kha, thil tak tak a ni a, kha kha kan thuam tha chho mek zel a ni. Chuvang chuan, thil inkawkalh a awm hran lo a ni tih kha kan sawi hmasa duh a. A office building kha chu a ding a, a Dan erawh chu duhthu a sam lo deuh a. Chuvang chuan, chulaia chu he sorkar hian a ngai pawimawh em em a, siamthat a duh lai tak kha a ni ta a ni. A hma a mite an siam a lo ni a, chumi nuai boa, an hmingthatna zawng zawng laksak tumna lam rawngkai pakhatmah a awm lo a. A tak takah chuan, a bul tantu pawh hriat a ni a. Pu Speaker, tun tumah erawh hi chuan amendment tih a remchan lohna chhan chu keiin kan chhinchhiah chinah pawh hian a thahnem hle mai a.

Entirnan: Chapter 3, Section 6-a nos. 1, 2, 3, 4, 5, 6, 7, 8, 9 kha a thar hlak a ni a, Section 7 ah pawh khan nos. 1, 2, 3, 4, 5, 6, 7, 8, 9,10 te kha a thar hlak a ni. Section 11 ah khan nos. 1, 2, 3, 4 kha a thar hlak a ni. Tin, chapter 4 pumpui kha a thar hlak a ni bawk a, chapter 5, Section 15 kha a thar hlak a ni. Chapter 6-a Miscellaneous Section no. 20 pawh kha a thar hlak a ni. Tikhan, thil thar kha atam em avangin, “amendment-a kal tir ai chuan Bill tharin pulut ila, Act tharin kal ta mai se”, tih kha kan rilru a ni a. Thildang eng emaw thalo kha a inzep lem lo a ni tih kha Pu Speaker, House ah hian ka’n sawilang duh a ni.

Tin, Hachhek bialtu Pu Robert Romawia Royte in a a rawn sawi ‘Committee’ tih laia kha ‘C’ kha capital a nih avangin, khami bik Committee kha a ni tih kha ka’n sawifiah duh a ni e.

Tin, Siaha bialtu Dr. K. Beichhua rawn sawiah khan, ‘department tha tak tak a awm a, MYC in a enkawl nilo; mi huang kan va dai lutuk palh ang e’ a tih kha, Mizoram Youth Commission hi en ta ila, department dang tih loh a tih dawn chuan, tih tur pakhatmah a neilo a ni. A chang chuan Education a khawih a ngai, a chang chuan Sports a khawih a ngai, a chang chuan a parent department LESDE a khawih a ngai, a chang chuan Industry lam hawi deuh a khawih a ngai a. Chutiang zelin, thil hrang hrang a tih dawn khan midangte nena han innék deuh nia lang kha, an ti dun dawn zawk a ni. An innék dawn lova, an inchuh dawn pawh a ni lova, an tidun dawn zawk a ni a.

Tin, Library chungchang pawh kha, heti laiah hian ka lo notice nghal chu - a *power & function*-a ‘Function of the Commission’ tih hnuaia Sub-Section 15 ah khan, ‘Mizoram Culture heritage, midang chanvo an va chhuhsak’ kan tih kha, kan chhiar Chiang lo emaw ni ka ti a, Pu Speaker, ‘to support’ tih a ni; “to support traditional and contemporary art to preserve and promote Mizoram Cultural heritage.” Tihah hian Art & Culture chhuhsak tumna a awm lo reng reng, Pu Speaker. ‘Youth Commission hian Art & Culture a support dawn’ tih a ni. Khalaia kha kan chhiar Chiang hmanlo pawh a ni thei a.

Tin, Library chungchang kha a rawn sawi a, ka’n chhiar leh mah ang a - “To develop and implement programme to encourage book reading and to establish and support libraries, reading clubs and literary events to foster a love for reading’ tih a ni a, Mizo thalaite zingah lehkhabu chhiarna lama hmalakna tura encouragement chungchang lam daih a ni a. Tute

emaw va chhuhsak lam hawi kha ani lova. Helaiah hianin Pu Speaker, i phalnain, reading culture kan promote tumnaah MYC hnuaiiah tunah hian ‘MYC Book Club’ tih a tharin kan din tawh a. A duh apiang in-register theih a ni a. Hei sikul ah te, college ah te, veng leh kohhranah te khatianga hman tangkai tum khan tunah hian ruahmanna siam mek zawk a ni a, a in clash loh dana kha ka’n sawi tel duh a ni.

Engpawh nise, he Act kan hman tan tir dawn a, a bill lo pulut tute, a taka hmangtute, kan hmaa kal hmasate kha an zahawm em em a, khangho kha zu diriamna emaw, an thiltih tawh nuai boa, anmahni hrim hrima kha a history-ah an lang ve lo ang tihna nilovin, Mizoram thalai ten hma an sawn zawkna turin Youth Commission ina kan Act hman mek aia tha zawk leh changtlung zawk Bill thar hi pulut law law mai ila kan ti a. Nichina ka chhiar tawh ang khan, amendment ringawt mai pawh kha a tam em avangin tun tunah hi chuan, kum 2025 ah *Mizoram Youth Commission Bill 2025* hi kan rawn pulut zawk a ni a. Pu Speaker, a tir lamah pawh khan kan member, i veilama thute pawh khan min thlawp viau a, tha an tih thute pawh an han sawi a. Kan han sawi kan han sawi khan, a nilo zawng khan kan her ta deuh a. Engpawh nise, thalaite hmasawwna tur a ni a, kan zavaiin kan duh tlang vek niin ka hria a. Chuvang chuan, Pu Speaker, *Mizoram Youth Commission Bill 2025* ka’n put luha hi min pass-pui turin House member-te ka sawm e.

SPEAKER : Kan Minister zahawm takin ‘*The Mizoram Youth Commission Bill 2025*’ chu House hnenah pass-pui a rawn dil a. Tunah kan buk ang a... (*interruption*)

PU LALCHHANDAMA RALTE, OPP. LEADER: Pu Speaker, I veilama thute hian kan Minister zahawm tak thusawi kha chu a ngaihtlak nuam pawh kan ti a, hriatthiamawm kan ti a. He Bill hrim hrim hi kan duhlo pawh a ni lova, Select Committee ah dah dan a awm zawk lo maw, kan ti a. Kan House Leader-in ram hrulaitu kal hmasate khati taka diriamna a tih avang khan, keini i veilama mite chuan kan pass-pui lo mai ang e.

PU LALDUHOMA, CHIEF MINISTER: Pu Speaker, eng dan pawh, duh duha pawisa hman theihna dan audit tello leh, a hnathawktu rules engmah behchhan pakhatmah telloa lak theihna dan lo siamtute hi chu kan dem turah ka ngai. A diklo a ni heng hi. Chuvang chuan, a siamthatna Bill rawn put luh a ni ta zawk a ni.

SPEAKER : Aw le. Remti apiangin “Remti” ti ula; rem tilo kan awm chuan, “Rem tilo” ti ula (*House in pass a remti a*).

Aw le. *The Mizoram Youth Commission Bill, 2025* chu he House hian lungtual takin a pass ta a ni.

Tunah chuan chhun thingpui in chawlh kan nei ang a. Dar 1:30 PM a la rilo deuh a, dar 2:30 PM ah kan tan leh dawn nia.

(*Recess at 1:18 PM*)

2:30 PM

SPEAKER : Kan Bill pathumna ah kan kal ang a, *“The Mizoram Private Placement Agencies (Regulation) Bill, 2025”* hi a bill neitu Minister zahawm tak Pu Lalnghinglova Hmar-in House ah introduce phalna lo dil se.

PU LALNGHINGLOVA HMAR, MINISTER: Pu Speaker, ka lawm e. *“The Mizoram Private Placement Agencies (Regulation) Bill 2025”* hi i phalna leh he House zahawm tak phalnain introduce ka rawn dil e.

SPEAKER : Aw le. A changtu Minister-in House ah introduce phalna a rawn dil a, kan phalsak em? (House-in a phalsak a.) Kan phalsak chuan, tunah han introduce-a, sawiho tura rawn move nghal turin lo sawm ang.

PU LALNGHINGLOVA HMAR, MINISTER: Pu Speaker, ka lawm e. *“The Mizoram Private Placement Agencies (Regulation) Bill, 2025”* hi *“The Mizoram Private Placement Agencies Regulation Act, 2015”* tih thlakna tura siam a ni a. Mizoram pawna hnathawk duh workers te hna zawnsaktu private placement agency te ho kaihhraina dan a ni ber a. Kaihhraina a nih piah lamah Pu Speaker, he Bill thar kan put luhah hi chuan awmze nei zawka an function theihna tur te, a hnathawk tura an tirhchhuahte an himna tur te, chumi piah lamah chuan hna tha zawk leh hna sang zawk an thawh theihna tur te a ni a. Tin, he Bill ah hian a hma a la awm ngailo thil thar eng emaw zat a awm dawn avangin he Bill thar hi rawn put luh a ni.

Pu Speaker, kum 2015-a *Mizoram Private Placement Agencies Regulation Act* kan hman mekah kha chuan Mizo hmeichhia ramdanga awm, inchhung khura hnathawk, ‘Domestic Workers’ kan tih bik te tana dan kha siam a ni a. Amaherawhchu, khawvel a lo thang zel a, domestic worker ni chiah lo hi mizo thalai hnathawk thahnem tak ram pawnah an chhuak a ni. An thahnem zia chu Covid 19 a len khan a hriat mai a, India ram pawn leh Mizoram pawnah pawh khati zat kha hnathawk an awm a ni. Chutih lai chuan, dan anga thawnchhuah erawh chu domestic workers te chauh kha an ni.

Tichuan, he Private Placement Agencies Regulation Act kan hman mek hnuaiyah hian domestic licence chauh pek a ni a. A awmzia chu, domestic placement bak chu tih theih a nilo a ni, dan ang chuan. Chutih rual chuan, he danah hian a vague deuhin ‘Outside Mizoram’ tih tawp kha a lo awm a, ‘Outside mizoram’ kha a duh danin a interpret theih ta a. Tichuan, a then chuan ‘Outside Mizoram’ tih chuan Singapore a huam alawm, Dubai a huam alawm, Oman a huam alawm, ti khan chumi thleng thleng chu kan intirchhuak a ni. Amaherawhchu, Sorkar laipui dan awm mekah chuan *Emigration Act, 1983* kaltlang lo chuan ram pawnah hnathawk tura dan anga intirh chhuah hi a ni lova. Chuvang chuan, he Act pawnlam atanga ram pawna hnathawk tura chhuakte kha sorkar laipui dan-ah chuan *dan bawhchhia* kha kan lo ni ta a ni.

Chuti chung chung chuan foreign placement hi 785 kha kan nei hman a, tunah hian a hma khan registered private placement agencies hi 44 an awm a, heng zinga 24 te hi chu revoke

an ni tawh nghe nghe a ni. A dan hi a famkim tawh loh avangin Pu Speaker, mizo thalai ram pawna thawkten harsatna tam tak an tawh a ni tih chu kan zavaiin a hretu kan ni awm e. Hemi chungchangah hian mimal thahnemngaite tangkai tak tak an awm a, pawl thahnem ngaite pawh an awm a. A then chu political party behchhana thahnem ngai tak taka han thawkte pawh an awm bawh a, chung mite chuan kan Mizo thalaite hi an lo chhanchhuak tawh thin a. Tin, Sorkar pawhin a chhanchhuak tawh thin a. Tunhnaiah pawh Mizoram sorkarin heng dan dik tak nilo deuha ram pawna hnathawk tura chhuak, amaherawhchu, harsatna tawh si kohkir hna te, chhanchhuah hna te an thawk a, a namen lovin a harsa hle a ni tih chu kan zavaiin kan hretlang awm e.

Chumai chu ni lovin Pu Speaker, kan dan hmasa behchhan deuh si khan hemi kan private placement agencies thenkhat hian Adhar Card leh document dik tawklo hmangin kum 18 hnuailam, kum tlinglo te pawh an lo tirchhuak thin a ni. Chu chuan harsatna a thlen a, *Mizo Hmeichhe Insuihkhawm Pawl* (MHIP) pawhin Home Minister hi nikum May thla khan hmuin, kum tlinglo tirchhuaktu private placement agencies te dan anga hrem turin a lo ti tawh nghe nghe a ni. Kan Home Commissioner Statement kha kan hriat chuan, nikum April thla khan private placement agencies 29 man an nih tawh thu a tarlang nghe nghe a nih kha.

Tichuan passport lem leh tourist Visa lem te an siamsak a, chu chuan security engmah a provide bawh si lova, chumi hmang chuan dan ang pawh ni chiah silo khan ram pawnah hian kan intirchhuak nasa ta hle a ni. Hei vang hian kum 2023 (sorkar hmasa hun lai) hun lai khan an vei a, Commissioner leh Secretary, Home Department kaihhruaina hnuaiiah meeting te pawh an lo ko tawh a. Amaherawhchu, an term tawp lam kha a ni a, duh angin thil pawh an ti hman ta lo a ni.

Tichuan, Pu Speaker, sorkar thar a lo piang a, theihtawp kan chhuah ve nghal a ni, hemi thilah na na chuan. *The Mizoram Private Placement Agencies Regulation Bill 2025* duang tur hian tan kan han la chho ta a. A tirah chuan he subject hi Home Department hnuaiiah awm thin a ni a, chumi hnuah chuan a ken tel te leh a hmangchang, a awmdan, a ziarang han en hian ‘Home department atang hian LESDE lamah hian i suan ang’ tiin kan hotuten tha zawkin an ngai a. Tichuan, June Ni 28, 2024 khan ‘*Regulation of Private Placement Agencies*’ chu Home Department atangin LESDE lamah dah (reallocate) kha a lo ni ta a ni.

Tunah hian India ram pawna hnathawkte leh Mizoram chhunga sorkar leh private thlenga hnathawh dan mumal taka inkaihhruai dan hi a tel tawh dawn a. India ram pawna hnathawk tur zawnsaktu private placement agencies ten India ram pawna an inthawnchhuah theih dan tur pawh kha tuna kan dan hmanlai aia chak zawk hian, *Emigration Act, 1983* zawm theihna tur hian tuna kan bill hi putluh a ni. Tuna kan dan tharah hi chuan kan hmeichhia domestic workers te chauh a huam dawn ta lo a ni.

Tahchuan, hnathawktu hrang hrang unskilled atangin semi-skilled te, skilled-I leh skilled-II te pawh a huam tel tawh dawn a ni. Chu chu kan bill tharin a kentel tur hi a ni dawn a. Domestic workers chauh ni tawhlo khan Mizo thalai lehkhathiamte leh thiamna dang hrang hrang neite tan ram pawna hnathawh theihna tur dan kan duang ta a ni. Chumai chu a ni lova, kum 18 chung lam bak chu chhawr theih an ni dawn lova, Mizoram chhung leh

pawna placement te pawh hei hian a huam dawn a ni. Kan placement agencies hian india ram Dan *Emigration Act, 1983* te an behchhan a tul tawh dawn a, placement agencies kaltlanga employers ten worker an chhawr dawnin written agreement an sign phawt tur a ni tawh dawn a ni. Chu chu sorkar dan hnuaiiah written agreement a awm tawh dawn a, a hma ai chuan a khauh tawh dawn bakah, a him tawh zawk dawn bawk a ni.

Tin private placement agencies kaltlanga hnathawkte felfai leh him taka chhawr an nih theih nan dan zawm tur hrang hrang zam belh a ni a. Chung zingah chuan sorkarin a hlawh bithliah tlem lam '*notified minimum wages* chu chu an pe tur a ni' tih a ni a. Chubakah chuan, register-ah chipchiar taka ziah luh an ngai tawh dawn bawk a ni. A ruk deuh emaw anih loh, a chiang mang lova inziaklut, mi hmehriat mang loha an chhuaha, harsatna an tawha buaipui leh ngai ang chi kha tunah chuan an chhuah hma atangin kan hre tawh dawn a ni. Chu mai chu ni lovin, Pu Speaker, placement agencies te hian hnathawktu an tirhchhuah turte hi 'Employee Provident Fund leh Employment State Insurance Corporation hnuaiiah khan an hamthatna an hmuh theih dan tur agencies ten an ngaihtuah sak ang' tih a ni ta bawk a. Chuvang chuan, an la khawm a, a then chu mi fel tak tak, thahnem ngai taka mi hna hmuhsaktu an awm laiin midangte an hna an pek piah lama sumdawna atana hrelo zawk leh harsa zawkte hmanga khatianga han tikual te kha an awm ve bawk a.

Pu Speaker, he dan a pawimawh em em chhan chu, dan naranin a chhuak ho, domestic worker phei kha chu lehkha zir sang tawklo, a thente phei chu chhungkaw harsa zawk te anni bawk a, an chhungkua an harsat avanga eizawna duha chhuak an ni a. Chuvang chuan, a thawn chhuaktu thenkhatte'n an demand ang ang kha dan tur emaw tia *aw lo theilo* an awm a, a pakhatnaah chuan. Pahnihnaah chuan, tlanchhiatna tur nei chuango, an chhungte eng emaw tal an thawn let ve a ngai si a, an hna hmuh ang ang an thawh a ngaih avangin, saptawnga 'abused' kan tih ang te pawh hi a thleng niin a zirchiangtute chuan an hria a. Chuvangin, Employees-te an himna turin he dan hi siam a ni ta a ni.

Tin, Private Placement Agency kaltlanga hnathawktu turte chuan hna an thawh hmian Pu Speaker, helai hi a pawimawh khawp mai, '*compulsory pre-placement orientation programme training*' kan tih ang kha an kaltlang a ngai tawh dawn a ni. In tirchhuak tawplo deuh khan helaiiah an inzir ve bawk ang a, safety chungchang te, an ram hnathawhna tur dan chungchang te, a kalphung hrim hrim kha awmze nei zawkin he dan tharah hi chuan an awm tawh dawn a ni.

Chu mai chu a nilo, kan ngaih pawimawh em em mai pakhat chu, '*harsatna an tawhin tu hnenah nge an thlen ang*' tih hi a ni ta a ni. *Grievances and complaints* kha khawiah nge an thlen dawn tih kha he danah hian kan bilh tel tawh a ni. A hmaa kan harsatna chia kha hei hi a ni ta a ni. Harsatna an tawk a, tu hnenah nge an thlen ang, tu hnenah nge an tlan tawh chuang ang? Pu Speaker, he bill kan putlul thar tur hian khang te kha a rawn cover tel tawh dawn a. Private Placement Agency-te tana license dil dan tur pawh hi a process felfai tak siam a ni tawh dawn a ni. Kum 5 atan license hi issue phawt tur a ni a. A dan kan en chuan chapter 3, section 7-ah *license cancel leh suspend theihna* pawh dah tel a ni ta a ni. An lo tihfuh loa, dan an lo bawhchhia a nih chuan, *penalty leh punishment* section te pawh dah a ni a, chungte pawh chu kan han ti tel dawn a ni.

Tin, Registering Officer-te an awm dawn bawk a, hei hi a hmaa awm lo kha a ni a; authority kan ruat belh a ni. Registering Officer an awm tawh chuan, chu mite hnuaiiah chuan pawnlama hnathawk tur domestic worker, mi awmpui tura chhuak chauh nilo khan skilled, semi-skilled, skilled-I, skilled-II thleng khan an chhuah theihna tur kha tunah hian kan duang ta a ni.

Pu Speaker, kan tih tel duh leh thil lawmawm tak mai chu, *Emigration Act, 1983* hnuaiiah hian Mizoram-a in register kha a ni ve thei ta silo a, a har em em a ni. License nei te kan lo awm mumal lo a. Vairamah te, hmun dangah te an zuk in-register a ngaih si avangin, LESDE Department chuan registering authority kan neih theih vena turin hma a la ta a. Pu Speaker, keimah ngei Delhi-ah zuk kalin, January Ni 31 khan Ministry of External Affairs kan zuk dawr a, Joint Secretary nen kan inkawm a, “sorkar ang hian registering authority neih kan duh a ni; kan Mizo thalai rampawna hnathawka kal te hi an him theihna tur leh dan hnuaiia tha taka an thawh theihna turin ruahmanna min siampui rawh u” kan ti a. Anni chuan sorkar anga a theih loh thu an sawi a. Amaherawhchu, ‘in dan ka en chuan, *government* tih kha a tel tlat a ni; kha clause kha min activate sak rawh u’ kan ti a. Joint Secretary chuan kan awm lain a in-charge, a dealing kha a ko a, a theih dan a awm nge, awmlo lo enchiang turin a ti a. Kan awmlai reng chuan, ‘a tih theih dawn a nih hi a’, an ti a. Amaherawhchu, ‘department hmingin PAN card te neiha GST te pek a ngai ang’ an ti a, chu chu tih kan lo tum ang kan ti a. Tunah hian thui tak kan indawr tawh a, a hlawhtlin ngei pawh kan ring a.

Pu Speaker, House-ah hian tun session lai hian puan hman kan duh tehlul nen, document tih felfai chhung hi hun a duh ve deuh avangin, ‘registering authority kan ni tawh e’ tih hi chu kan la puang thei lo a. Sorkar hnuaiiah LESDE hi registering authority a ni ngei dawn niin a lang ta a, hei hi keini tan chuan thil lawmawm tak a ni a. Tin, kan Mizo thalai hna zawngte tan ram dang agency hnuaiia an zu inziah luh kha ngai tawh lovin, Ministry of External Affairs hnuaiiah LESDE hi in register-na tur agency kan nih theih hlauh chuan kawng thui tak a inhawng dawn a ni.

Pu Speaker, *Regulation of Private Placement Agencies* chungchang hi nichina ka sawi ang khan, June Ni 28-ah LESDE hnuaiiah la dah chauh a ni. Home Department atanga kan lak hnu ah hun rei lutuk lo ah hetiang bill kan han pulut thei hi kan lawm ve hle a. Keimahni tih theih a nilo a ni. Hemi atan hian min hringtu Home Department chungah lawmthu kan sawi a, vawi tam tak meeting kan lo neihpui Law & Judicial lam te, UD & PA lam te, Health & Family Welfare Department lam te, Tourism Department lam te, Women & Child Development lam te bakah Aizawl DC office-a thawktute pawh kan tibuaiin, kawng engkima min puitu an ni a. Tin, mimal thahnem ngai, helam pang hawi zawnga thawktute chungah pawh lawmthu kan sawi a ni.

Pu Speaker, a tawpna atan kan sawi duh chu, he Bill hi bill thar a ni hranpa lo kan tih rualin, bill thar diai deuh thaw anga sawi theih a ni bawk a. Bill hmasa chu a lo awm tawh a, “*The Mizoram Private Placement Agencies (Regulation) Act, 2015*” a awm tawh a. Amaherawhchu, a spirit-ah te, a bill hawi zawng hrim hrimah te, a content hrim hrim pawh thil danglam tak a nih avangin, he “*The Mizoram Private Placement Agencies (Regulation) Bill, 2025*” hi kan zavaia min pass-pui turin ka rawn sawm a ni e. Ka lawm e.

SPEAKER : Minister zahawm takin a bill chungchanga sawi turte sawiin, a bill putluh chhan te min hrilh tawh a, sawiho tul kan ti em? Sawiho tul kan tih chuan tunah kan sawiho ang a, member pakhat tan minute 5 kha tha kan ti mai em? (*House-in munte 5 tha a ti a.*) Minute 5 zel kan ti ang a, minute 4-ah bell ka rawn hmet ri leh dawn a ni.

Tunge sawi hmasa ber ang? Pu K. Laldawngliana ilo sawm ang.

PU K. LALDAWNGLIANA: Pu Speaker, ka lawm e. Vawiina “The Mizoram Private Placement Agencies (Regulation) Bill, 2025” putluh a ni hi lawmawm ka ti hle mai a. Kan hriat theuh ang khan kum 2015-ah Mizoram Assembly-ah “The Mizoram Private Placement Agencies (Regulation) Act” hi lo passed tawh a ni a. Tuna kan dan hman mek hi chu a sawi ang khan domestic workers te chauh a huam a, hnadang thawk tur, Mizoram pawn leh ram dang kal duhte a huam tel lo a ni tih kha kan ngaithla tawh a. Kum 10 lai a lo vei tak avangin khawvel hmasawna zelah Mizoram pawn lama hnathawk chhuak duh kan thalai rual lehkha, technical thiam tak takte, zirna sang zawk ang chi te pawn an kal theihna tur bill duan a lo awm hi a lawmawm ka ti hle mai a.

He dan hnuaiiah hian kan sawi ang khan Private Placement Agencies te kaltlangin Mizoram chhungah hian domestic workers te tan chauh a ni a. Dan thar turah hi chuan India ram chhung piah lamah India ram pawn, foreign thleng thawn theihna tur dan a ni hi hmasawna tur lawmawm tak a niin ka hria a. Dan hman lai 2015-ah kha chuan Mizoram chhung bika private placement agency te ngawr ngawr tin zawn kha a ni a. Vawinah kan sawiho mek bill-ah erawh hi chuan state pawn lama registration nei private placement agencies-te leh foreign lam atanga Mizoram chhunga rawn inbun tur private placement agency te khuakhirhna leh enkawlna tur te pawh a rawn lang tel ta a. Khawvel hmasawna zela mamawh chhoh zel tur a nih avangin, hei hi a pawimawh tak zet a.

Pu Speaker, Zofate thalai zawng zawngte tan kan ramah hnathawh tur kan indaih tawh si lo a, ram pawnah inthawn chhuah a ngai tawh si a. Hemi chungchang anih avangin kan bill hi phek 20 bawr vel a ni a, ka chhiar ngun khawp mai a; point 4 hi ennawn atan ka duh deuh hlek a -

1. Private placement agencies-te license pek dan tur tarlanna chapter 3, section 4, clause 4-ah khan controlling officer-in dilna a dawn te chu pek tlak an nih leh nih loh enfiah turin a changtu district SP te hnenah an thawn theih tur thu tarlan a ni a. Amaherawhchu, a dawt chiah section 6, clause 5-ah khan, ‘SP chuan a enfiah hnuah No objection certificate a pe ang’, tih tawpa tarlan a ni a; SP khan ‘pek tlak loh a ni e’, tih lam a lang bawk si lova. Thil fello lo hmuchhuak palh pawh ni se, No objection certificate kha an pek tho a tul dawn tihna em ni? Helai hi a kim lo deuhin ka hria a.

2. Tin, chapter 4, section 8 ah khan Mizoram chhung nilo India ram State danga in register Private Placement Agency, Mizoram chhunga rawn lutte khuakhirhna tur tarlan a ni leh a. Khatah khan Mizoram-a hna thawk thei tura an tih tur leh, an neih ngai tarlanah, he dan hnuaiiah controlling authority-in no objection certificate pek a tul tur thu tarlan a ni leh a. Chapter 4, section 8, clause (b) ah hian no-objection certificate an hmuh thei tura an tih tur tarlanah khan Bank warranty tarlan a ni ve lo a ni. Mizoram chhungah he dan hnuaiiah

in register turte hnen atanga chapter 3, section 6, clause 1 ah hi chuan ‘fee leh Bank warranty lak sak tur a ni’ tih a ni thung a. Ram leilung fate aia pawhin lam mite duhsak zawk anga lan hi pawm harsa ka ti hle a.

3. Tin, chapter 4, section 8, clause C bik kha kan en chuan, India ram chhung state danga in register private basement agency te, an in register-na State-ah hetiang dan nei silo ten Mizoram chhunga hna an rawn thawh theihna tur dan te leh, permit an dil dan tur te tarlan a ni leh a. A phok tlar hnuai ber atanga chhiar leta tlar hnihna ah khan han en ula, thumal pawimawh em em chhut kim loh a awmin ka hria a. Khalai kha kan Minister zahawm takin lo chhin chhiah se, a thain ka hria a. “In any place or country beyond the boundaries,” tih chinah *comma* a dah tawp a. Section 8(a) ah khan chiang deuhin a inziak a, Pu Speaker, i phalnain kan chhiar chhuak ang a. – “In any place or country beyond the boundaries of India,” tih hi chiang takin a inziak a. Chuvang chuan, ‘*boundaries of India*’ tih hi chhut hmaih palh niin ka hria a. Hei hi nakin zela a taka dah aniha, hman anih hunah a inanglo thei a, siamthat a tulin ka hria.

4. Tin, Mizoram pawn State danga in register leh khawvel ram danga in register placement agency te hnenah Mizoram chhunga hna thawh phalna No-objection certificate pekchhuah an renew dan tur chapter 4, section 9, clause 5-a tarlanah hian, ‘an certificate tih hma ni 60 a la awmin dilna an thehluh tur a ni’, tih a ni a. Pu Speaker, mak deuh mai chu, Mizoram chhunga in register placement agency te chu, an licence thih hma ni 90 la awm ah renew dilna an thehluh a ngaih tur thu chapter 4, section 6, a clause 9 hmanga phut a ni leh tlat thung hi, hei pawh hi ram leilung, a neitu te zawk duhsaklohna langsar tak niin ka hria a, ka sawi lang tel leh duh bawk a ni.

Pu Speaker, wawiina dan hmanlai kum 2015 dan paiha dan thar tur bill 2025 dan kan putluh lo pian dan pawh hi thil mak tak niin ka hria a. Nikum lawk khan private placement lamah Dubai leh Syria lama an thawh chhuah kan hmeichhe thenkhat ten harsatna an tawh kha kan la hre rengin ka ring a, kan chai laih laih a nih kha. Khami tum khan kan House Leader zahawm tak hian Ni 11.6.2024 khan, Zofa Agency a hawn tumah khan Mizoram-in hetiang Dan siam theihna a neih loh thu leh, Dan dinglai 2015 Dan hnuaiyah licence lo pek tawhte pawh kha ‘*a valid lo*’ tiin a sawi a. Dan bawhchhetute hrem turin, “Protector General of Emigrants hnen atangin phalna prosecution sanction lak hmasak a ngai a; kan dil a, reminder pawh kan thawh a, wawiin thlengin min pe thei rih lo” tih a sawi kha kan la hre vek awm e.

Dan hmanlai Chapter 6, section 11 ah pawh khan, dan dinglai belhchhahna tura dan siam a nih thu tarlan a ni a. Dan hmanlai ah pawh private placement agency te khan India ram dan dinglai dangte pawh a zawm tel a ngai tho a. A awmzia chu, India ram pawm lama hna thawka thawh chhuah turte chuan, dan dinglai Immigration Act, 1983 hnuaiyah Ministry of External Affairs atanga registration leh permission an neih a ngai tho tho a ni. Tuna ka hriat dan pheih chuan, Mizoram-ah pahnih chauhin an neiin ka hria. Tuna kan sawi mek lai hian, “Immigration Act, 1983 hnuaiyah hian registration leh permit neilote chuan Mizoram pawn lamah hna thawktu tur an thawh chhuak thei lo ang”, tih te a rawn tarlang leh ta nghal a. Chapter 3, Section 6, clause 1 dan hlui ah pawh thil kalphung nisa reng a ni a. Hetianga chiang zawka dan thar tarlan a ni ta hian mipui rilru a tifiyah zualin ka ring a. Hetih

lai hian kan House Leader berin dan hmanlai hnuaiah a bawhchhe tute hrem theih loh ang hiala a sawi kha, khatih hunlai khan dan bawhchhetute hum tumna a ni thei mai ang em, tih zawhna lian tak a awm theiin ka hria a ni.

Pu Speaker, Dan hmanlai 2015 danah khan, dan bawhchhiatna hremna chu Chapter 4, section 9 ah khan tarlan a ni a, Dan thar tuna kan sawi mekah hian chapter 9, section 15 ah tarlan a ni leh tho bawk a. Dan hmanlai leh tuna kan sawiho mekah hian dan bawhchhiatna chu, magistrate phalna lak hmasak ngai lova, police ten an chhui nghal theih tur cognizable and non-cognizable a nih tur thu tarlan ve ve a ni leh zel bawk a. Hetiang anih avang hian, Mizoram Sorkarin private placement agency-te khuahkhirhna chungchangah hian dan a siam theih zia chu vawinah hian a tarlang a ni lawm ni; chu chu kan sawi mek hi a ni lo em ni?

Pu Speaker, a tawpna atan, ngaihthatthlak loh tak mai thil dang leh chu, 2015 dan hmanlai ah khan dan bawhchhia leh paw khawihute chu phalna la hranpa lovin police te khan an chhui nghal theih mai dan kha a ni a. Mahse, tun dan kan sawi lai mekah hian chapter 10, miscellaneous Section 23, clause 1 ah khan, Controlling authority-in thubuai siam phalna a pek loh chuan, Court te chu thubuai an siam phalsak an ni ta lo tlat mai a ni. Hei hi Sorkarin a hum duh apianga hum tumna a ni mai lo maw, tia ngaih theih a ni. Khatiang zawhna kha a awm thei a ni a. Thil ngaihthatthlak loh tak mai a awm thei em aw, tih ka rilru-ah a awm a ni. Dan tha hmel tak, mahse hman sual remchang tak mai si, vawinah hian pass-pui min tum ni pawhin a ngaih theih rum rum a lawm le.

Tichuan, Pu Speaker, he Bill, *“The Mizoram Private Placement Agencies (Regulation) Bill, 2025”* hi a tlangpuiin tha ka ti e. Ka lawm e.

SPEAKER : A lawmawm e. Pu H. Ginzalala ilo sawm ang.

PU H. GINZALALA: Pu Speaker, ka lawm e. Thu ka sawi hmian thu nawi deuh ka han sawi lawk ang a.

Hei tuna ka muffler awrh hi Manipur ka han kala min lo present a ni a. Zo-hnaathlak hnam hrang hrangte hnam puan hetiang hian an tahkhawm a ni a. Hei hian inunauna leh inlungualna a entir a, ‘inpumkhat an duh tawh hle a ni’, tih a chiang a. Mizo main stream-ah tun aia nasa zawka inlungualna leh inpumkhatna a awm hi an dreams niin a lang a. Mizoram Sorkar pawh kan inhawng zau hle niin ka hria a. Tun hnuaiah kan hotu ten hma an la a, a lawmawm ka ti a. Tuivai Lei pawh dawh kai a lo ni lehzel bawk nen, a ropui ka ti a. Kei ngei pawhin ka theih tawkin hma ka lo la ve a, hemi kawngah hian, Mizoram Sorkar pawh a inhawng zau hle a ni.

SPEAKER : I thil awrh lai kha i han sawi takah chuan, heta tang hian ka han thlir kual a, rilru nei deuh leh neilo deuh ka lo thliar ve a, ‘Zo ze lang theia inthuum tur’ tih kha Sorkar thuchhuak a ni a. Tam tak hian kan awrh a, kan duh tawk deuh mai a, tamtak chuan a thuam deuh takin kan inthuum thung a. A thuam tak taka inthuum te kha chu a a pawl kan ni mai thei a. Hetia han awrh mai pawh kha a finthlak hle mai; rilru kan inneih hleih hle mai ka ti a nih chu. Aw le. Chhunzawm rawh le.

PU H. GINZALALA: Pu Speaker, vawiinah ringawt pawh ama chan Bill pahnih a lo lut thei hi, a efficient hle a ni tih hi a lang reng mai a. A ni hi kan Minister chhuanvawrte zinga mi a ni tih kha ka lo sawi tel duh a. “*The Mizoram Private Placement Agencies (Regulation) Bill, 2025*” hi keimah ngei pawhin ka inchhiar zau ve viau a. A chhung thu hi tam tak sawi tur a awm ang a, he mi Bill ina a rawn ken tel thil tha tak tak inphum ru a awm teuh niin ka hria a.

Mizoramah hian kan harsatna ber chu, *Human Resource* issue hi a ni deuh ber a, department tin pawh a ni ve vek tho mai. Tin, Entrepreneur hote harsatna ber pawh *Human Resource* hi a ni tho tho mai a. Helamah pawh hian he Bill hian nasa takin contribution a rawn nei dawn niin a hriat a. A bik takin placement orientation chungchang chu a tha ka ti leh zual a. Vawiina ka sawi duh chu, awmpuite pawh kha kan sawi tawh a; kan awmpuite hi an background pawh hriat lem loh hmun dang dang atanga kan lak khawmte kan awmpui a ni a. Tam tak phei chu training mamawh ngawih ngawih an ni a, an history pawh kan hriat lem lohte an ni a. Tin, mamawhna a sang a. Chutih rualin, kan awmpuite hi basic training pawh paltlang miah lo te an lo ni a. Kan han awmpui a, thla hnih-khatah min tlanbo san leh mai a. Tawng mawilo nilo sela, kutkem neite an lo nih phei chuan kan thil tam tak kha a bo thei a ni; kan ro hlu tak takte pawh enkawl turin kan dah lo thei lo a. He Bill hian chung zawng zawng chu a rawn take-care dawn nia a lang ta hi a ropui ka ti a. Basic training, pre-placement orientation programme hi changtlung taka kalpui theih a beiseiawm ta a, a lawmawm ka ti khawp mai a.

Tin, Labour chungchangah hian coding te pawh kan mamawh a ni. Labour coding hi engnge a awmzia kan tih chuan, an performance a zirin kan labour te, awmpui an ni emaw, driver an ni emaw, technician an ni emaw coding hi kan neih chhoh zel a ngai a ni. An past life kan track theih loh chuan thil pawi tam tak a awm thin a. Khatah khan labour coding te kan tih theih chuan hmasawna tam tak he Bill hian a rawn keng dawn a ni. Tin, an past life experience atang te pawhin thil tam tak a chhui let theih a. *Entirnan*: performance grading te pawh siam a tha khawp mai. Khatah khan kan awmpui turte pawh eng ang quality nge an neih, midang ina an lo awm tawhnaah khan engnge an performance tih te kan hre miah lo a ni a. Chutiang a nih avang chuan, kan coding hi mamawh chho zel dawn niin a hriat a. An awmna hluiah kutkem te an lo nei em tih thleng pawhin chhui theih tur a ni. Chutiang chuan performance grading pawh kan tih chho a ngai em em a ni.

Chutiang zelin, performance monitoring te pawh, tuna an awm meknaah engnge an performance tih te chhui theih dan kawng hi he Bill hian a rawn keng tel dawn niin a hriat a. Chutiang zel chuan, an performance-a zirin leh training tam tak an paltlang dan azirin an hlauh te pawh a awm chho zel dawn niin a hriat a ni. Chuvangin, hei hian revolution te nau chu a rawn hring chhuak hrim hrim dawn niin ka hria a, a lawmawm hle mai. Labour-ah hian he Dan hmang hian hma kan sawn dawn niin a hriat a. Tin, thil dang deuh, driver, operator te pawh hetiang system a kan kal chhoh zel theihna tur kawng a rawn inhawng hi a lawmawm ka ti a ni.

Tichuan, Pu Speaker, “*The Mizoram Private Placement Agencies (Regulation) Bill, 2025*” hi lawm takin ka pawm e.

SPEAKER : Pu Jeje Lalpekhlua ilo sawm ang.

PU JEJE LALPEKHLUA: Pu Speaker, ka lawm e. *“The Mizoram Private Placement Agencies (Regulation) Act, 2015”* hun rei tak kan lo hman tawh, changtlung tawk lo leh him tawk lo lai kum khat chungh leka sorkar tharin siamtha tura a rawn chhawp chhuak thei hi a lawmawm hle in ka hria a. A bik takin a changtu Minister pawh a fakawm viauin ka hria. Mizoram thalai leh mipui tan pawh thil pawimawh leh chhinchhiah tlak tak tur a tling niin ka hria a. He Dan siamthat hian system thar tha zawk leh him zawk, a hnuaiyah thalai tam tak ten kan thawh tawk eizawna kawng dapna kawngah harsatna tam tak te min sut kian sak thei dawn niin ka hria a.

Pu Speaker, i remtihain ka experience te pawh han sawi lan ve ka duh a. Mizoram pawna hun tam tak hmang thin ka nih avangin kei hi social media tak kaltlang tein ka thalaipui tam tak harsatna an tawh rawn thlentu an awm ve thin a. BMA (Bangalore Mizo Association) nen khuan khu laia hnathawk awm harsatna tawk thawn haw lamah pawh khan theitawp kan lo chhuah ho tawh a; he House zahawmtak kaltlang hian BMA chungah pawh lawmthu ka sawi nghal ni sela.

Pu Speaker, kan hriat angin, Mizo thalai hnathawka chhuak turte pawh training-na mumal tak nena an tih tur thu a rawn sawi lang te kha a lawmawm hle a. Mizoram-ah hian thalai tam tak hnathawh duh si tihdan leh kal dan hre lo kan tam a. Amaherawhchu, he Bill ah hian khatiang te tan pawh kawng zau tak a inhawng niin ka hria a.

Pu Speaker, he Dan duan thar *“The Mizoram Private Placement Agencies (Regulation) Bill, 2025”* ah hian India ram pawn leh chhunga hnathawkte leh Mizoram chhunga sorkar leh private thlenga hnathawh dan mumal taka inkaihhruai dan telh a ni a. A bik takin Mizoram chhungah ngei pawh hian thalai tam tak private-a hnathawk te an awm bawk a, an tan hian a lawmawm leh zual a. Mumal taka Dan a awm loh avangin a chhawrtute leh anmahni ngei inkarah pawh harsatna tam tak pawh a awm tawh thin a. Mizo thalai tam takin Mizoram chhungah ngei Dan mumal hnuaiyah hna an thawk thei tur ringawt pawh hi kei a thalai ang zawnah pawh a lawmawmin a thlamuan thlak ka ti a.

Pu Speaker, Chapter 6, Section 2-ah khan Placement Agency-te kaltlanga employers ten workers te an chhawr hmaa written agreement neihpui a nih tur thu te a rawn ziaak lang a. Tin, No. 6-ah khan hnathawka kan chhawr turte detailment kimchang tak dah a nih tur thute a rawn ziaak lang te kha a lawmawm hle a. Hei hian kan hnuaiyah hnathawkte atanga harsatna kan tawh theih hrang hrang, a bik takin ruk ruk chungchangah te pawh nasa takin min veng thei dawn niin ka hria a. Tin, a chhuichhuah kawngah pawh he Bill hian nasa takin min pui dawn niin a lang a.

Tin, Chapter 8 ah khan hnathawktu ten an harsatna awlsam taka an thlen theihna turin provision dah tel a nih tur thu kha kan hmu bawk a. Hnathawktu harsatna tawk mek sawi chhuak ngam lo hi an tam a ni. A bikin Mizoram chhungah ngei pawh hian harsatna, a chhawrtu leh a chhawra ngeite pawhin harsatna kan tawh mek a ni a. Heng hi Bill ah a rawn tel leh zel pawh hi a lawmawmin ka hria a. Tin, Chapter 8 ah vek khan hnathawktu ten

harsatna an tawh thlen theih dan awlsam electronic mode thleng pawh a lehkhah nen submit theih a nih tur thu te leh, hengah hian kan hnathawktute hi he Bill thar hnuaiyah hian an him zawk tur thu te a rawn lang hi a lawmawm ka ti a.

Pu Speaker, a tawp berah chuan, Mizo thalai ram chhung leh pawna hnathawka kalchhuak tam takte hi an chhuanawm ka ti hle a. An chhungkaw chawmtu an nih bakah ram dang atanga an thawh chhuah pawisa tam tak hi Mizoram-ah hian a rawn lut a. Tun hnaiah kan hriat angin Mizoram chhungah harsatna hrang hrang kan han tawk a, he mi chungchangah pawh hian an lo che chhuak nasa khawp mai. Pu Speaker, i remtihna-in han sawi lan ve ka duh a. Jeje Trust Foundation kha COVID lai khan kan han din rum rum a. Khatiang hunah pawh khan Mizoram pawna awmte hian nasa takin kha Foundation kaltlang khan Mizoram hmun hrang hrangah mi harsate tan anlo luangchhuak tawh a. Khangte pawh kha antana hetiangah humhalhna mumal zawk he Bill-in a rawn siamte pawh hi a lawmawm ka ti a.

Pu Speaker, LESDE changtu Minister Pu Lalnghinglova Hmar bill a rawn putluh, “*The Mizoram Private Placement Agencies (Regulation) Bill, 2025*” hi ka pawmpui a, pass ngei nise tha ka ti e. Ka lawm e.

SPEAKER : A lawmawm e. Pu B. Chhanzova, ilo sawm ang.

PU B. LALCHHANZOVA, MINISTER: Pu Speaker, ka lawm e. “The Mizoram Private Placement Agencies (Regulation) Bill, 2025” Pu Lalnghinglova Hmar, Minister zahawm takina vawiina a rawn putluh hi kan ram kal zelna atan thil pawimawh tak a ni dawn avangin han sawi ve ka duh a.

Ka ngaihtuahnaah thil tam tak alo lut a. Tunhma atanga thalaite eizawna lam kan lo kilkaw venaah te foreign-a thalai thawhchhuah chungchang hi debate tawp hlei theilo a ni a. ‘Engvang nge kan thalaite hi India ramah emaw foreign lamah emaw kan thawhchhuah vak vak ang’ tih leh, ‘ram pawnah hna an hmuh theihna a nih chuan kan thawhchhuah hi a ngai a ni’ tih hi inhniaalna tawp theilo a ni a. Kan state hi state intodelh, thalaite hnathawh tur pe thei khawpa inbunghet tawh lo ni ila chuan, kan thalaite ramdanga kalchhuah tir hi tumah hian kan duh ka ring lova.

Amaherawhchu, kan state chhungah hian kum 38 chhung te pawh han ti ila, thalaiten vawnban nghet tur an hmuhloh avangin an thiam ang angin India ram pawnah te hna zawngin *thih leh thih* tiin an lo chhuak tawh thin a ni. Hetiang foreign-a kal rawn haw lehte, awm mekte kan inbe pawp ve reng thin a, an thawhna hmuna an awm dante ka lo chik ve em em thin a. Hmeichhe pakhatin min hrih phe chu ka rilru a tina khawp mai a. A ram hming pawh sawi ila a pawilo turah ngai ila. “Singapore kan han thleng chho chu vawk phurh hian min phur a; kan balh ang ang khanin chak tak tak khan motor-in min tlanpui a. Tichuan, damin Mizoram hi kan hmu leh tawhlo anga kan ti a. Ni 3-na velah kha chuan min lo mikhualtu agency te hnenah min dah a”, a ti a. Khangte kha ka ngaihtuah a, Mizoram-ah thawh tur tha hriain thawh theih chu nise ram pawnah khan kal an duh bikin ka ring lova. Chuti rual chuan, chu ram pawnah thawkte chuan pawisa te an khawl a, Mizoram-a an nu leh pa leh an chhungte an rawn chawm let thin a. Hmanni chu social

media-ah ka mi hriatchian tak pakhat, a naupan lai atang pawha ka hriat hi ‘placement agency facebook atangin Japan a thleng chho ta a’, tih kha ka hmu a. A pi te kan zawt a, ‘kha, facebook-ah ka lo hmu a, Japan-ah a lo han chho a ni maw?’ ka ti a. A pi chuan, “Aw, Japan-ah kum upate enkawlina Home-ah a thawk a, thla khatah India pawisa cheng sing 6 a hlauh dawn a ni”, a ti a. A lawmawm hle mai a, an kal dan kha a pangngai deuh tawh tihna a ni ang a.

Tin, ka bial Chhinga Veng atang hian mipa pakhat ka kawm fuh hlauh mai a. ‘Engnge i thawh thin’ ka ti a, ‘Singapore-ah ka thawk a’ a ti a. ‘Engnge i thawh a’ ka ti a, ‘furniture company-ah ka thawk a, thlatin hian India pawisa sing 7 bawr vel hi kan hlauh a ni’, a ti a. Chutiang ho chu thlamuang zawk leh awmze nei zawk, Mizoram-a an kalsan an chhungte mai nilovin, sorkarin mumal zawka a monitor theihna tur, hetiang ang dan bill kan han sawiho thei hi a lawmawm hlein ka hria a.

Tin, MLA ni tura kan beih chhohna ah khan zawhna a lo awm thin a. *‘MLA-te mawhphurhna pawimawh ber chu engnge?’* tihah hian, MLA fund sem tih emaw, contract pek tih lam kha a ni lova; Dan tha siam hi a ni. Vawiin niah Pu Lalnghinglova Hmar hian kan thalaite dam khawchhuahna tur, hnam zahawm zawk kan nih theihna tur, an kalsan tak an chhungte pawhina ngaih tha taka an kaltir theihna tur dan tha zawk thalai hna zawng mekte tan a rawn buatsaih hi lawmawm ka ti a. Compulsory pre-placement orientation training te phei hi chu life skill education leadership training kawng engkimah heng hi kan tih chak chuan, an han awmna khua leh rama te khan zahawm takin hun an han hmang thei dawn a ni. Tin, harsatna an neih pawh grievances & complain lam kan han focus thei tur te hi a ropui hlein ka hria a. Tin, Registering Officers hran kan han nei turte hi a lawmawm a.

Chubakah, Pu Speaker, ka lo ngaihtuah ve thin chu, kan thalaite hi centralise record system te hmanga heng khawvel hmun hrang hranga vakchhuakte an data zawng zawng - an damtha em, harsatna an nei em, tih te kan lo monitor thei a nih chuan kan nula tlangvalte tan hian kawng thui tak kan sial sak theiin ka ring a.

A tawpnaah chuan, Immigrant Act, 1983 registering authority, Ministry of External Affairs hnuai Mizoram State sorkar-in registering authority kan nei ve a nih chuan, hei hian kan rama thalaite tan kawng tha a hawn ka ring a. Tin, Pu Speaker, he Bill sawi paha kan thalaite ka fuih duha chu, hmalam eng an nei a ni tih hi hria sela, damrei te pawh tum sela. Kan thi nasa lutuk a; kan thalaite hian future an neilo ni te hian an inhre nasa lutukin ka hria a. Chuvang chuan, thalaite hmakhaw ngai tak sorkar vawiinah Mizoram-ah kan nei ta tih hi ka’n sawilang duh a. Tichuan, “The Mizoram Private Placement Agencies (Regulation) bill, 2025” hi tha ka ti e. Ka lawm e.

SPEAKER : Member zahawm tak Pi Lalrinpui ilo sawm ang.

PI LALRINPUII, MINISTER: Pu Speaker, hei ka sira mite hian ‘Minister chuan sawi ve vak loh tur’ an ti a. Mahse, sawi ve ngei ngei tulin ka hria a. Hei, khawvel hi a danglam zel a, kan dan neih te hi siamthat a lo ngai ve zel a. *The Emigration Act, 1983* hnuai hian India ram pawna hnathawkte lo chhinchhiah zeltu Protector General of Emigrants (PGE)

an tih mai hi recruiting agent-te recognize-tu a ni a. Hetiang hi India ram pumpui ah hian 1988 an awm a, North-East-ah hian 3 kan awm ve a. Chuta pakhat chu, Mizoram-a ‘*JJ Placement & Solutions*’ tih hi a ni a, a dang pahnihte chu Assam rama mi an ni.

Tichuan, vawiina kan din ve duh kherna chu, Pu Speaker, Mizoram pawnah kum 20 vel lai kan lo awm ve tawhna hian experience tam tak min neihtir a. Mizoram Youth Commission-ina heng hotel management te leh skill hrang hrang training tura an rawn chhuk thlak puite hian a buaipuitu ber leh an harsatna lo sutkian saktu thin ka nih avangin, hetiang dan mumal tak mai zam a ni tur hi a lawm ber pawl ka nih ka ring a. Tin, vawi tam tak FIR te pawh lo thehluh sak ve tawhtu ka ni a. Chuvang chuan, kan thawncchhuah tam ber hi nurses te, spa leh salon-a thawkte; tin, security lam leh domestic worker lama thawkte an ni a.

India ram pawna thawktute zingah hianin domestic worker-hi an tam ber a. Tin, nurses an tam leh bawk a ni. Chutiangah chuan harsatna an han neih hian khulaia Bangalore-a kan han awm te pawh khan Mizo Welfare-ah President kha kum eng emaw zat ka ni ve a, harsatna hi kan tawk tam em em a. A chang chuan kan thin te a rim a, rawn an hluai te pawh kan nei thin a; chanchinbu ah te pawh kan rawn ziak fo tawh thin a ni. Chuvang chuan, a dang tam tak a bill chhunga awm kha chu a changtu Minister khan fiah fel takin a rawn sawi tawh a. Tin, kan lo zirchiang vek tawh a, khang kha sawi ka tum lova.

Chuvang chuan, khatiang hrang hranga buaina kan pumpelhna turin “The Mizoram Private Placement Agencies (Regulation) Bill, 2025” hi ka support em em a, pass ngei tur hian ka support a ni. Ka lawm e.

SPEAKER : A lawmawm hle mai. Hun a la hmang tha ber ang. Member zahawmtak Dr. K. Beichhua ilo sawm ang.

DR. K. BEICHHUA: Pu Speaker, “The Mizoram Private Placement Agencies (Regulation) Bill, 2025” kan sawihoa hi, chawhma khan *amendment* leh *repeal* kan sawi nasa tawh bawk a, kha lam kha chu duhtawh ila. He Bill, “The Mizoram Private Placement Agencies (Regulation) Bill, 2025” hi “The Mizoram Private Placement Agencies (Regulation) Bill, 2015” thlakna tur niin a lang a. 2015 Act repeal a nih chhan nia lang chu, 2015 hi a kim chang lo a, India ram pawn lama hnathawk tura intirchhuahna chungchangah dan leh dun felfai leh huapzo tur Bill niin a lang a ni.

Pu Speaker, Opposition kan ni a, kan lo oppose dawn a ni. Mahse, kan oppose-na hi constructive a nih kan duh tih hi min lo hriat sak se, a changtu minister pawh khan. Kan lo oppose hian thinrim hian min lo dawngsawng lo ula, a diklo lai leh a thalo lai a awm chuan, ‘A dik e’ ti zawng hian i kal ang u.

A Bill chhunga ka sawi duh chu, Section 2, sub-section 1, Clause C(a) – ‘Child’ tih hi ‘Minor’ ti ta ila a dik zawk em aw? Khalai kha dik zawkah kan ngai a nih chuan, min siam rem sak theih se. Kum 18 hnuai lam te ‘Child’ kan tih hi a dik ber ang em? ‘Minor’ tiin thlak ila, tih kha.

Tin, hei hian a ken tel Section 11, sub-section 3 te, Section 14, sub-section 2 te leh Section 18-a 'Child' tiha lang hi 'Minor' tih ni bawk se tih kha a ni bawk a. Tin, Section 8, Clause (b), sub-clause 1, Clause (b) leh (i) tan tirhnaa 'for' hmaa bracket kan dah hi printing mistake nge hriat chian a tha bawk a. Tichuan, Section 20-a 'How to make Rules' tih hnuaiha sub-section 2, Clause (d)-ah hian sub section tarlan hi kan tvisual deuh em? Sub section 6 of section 6 hian enquiry lam a kawkin a lang si a. Chumi chungchangah chuan sub-section 8, 9 leh 10 te ah hian 'Fees and Condition for Renewal' tih angin a lang a ni. Chuvang chuan, helai hi a dik lo deuh em, hetah hian reference angin kan lo hman si a? Section 6, Sub-section (c)-ah hian, kha kha a dik thei ang em? Sub section dah tel lovin emaw, Section reference-a kan lo hman hi kan tidik emaw a nih loh chuan, hei hian a ti hmelhem deuh lo maw, ka ti a ni.

Tin, he Bill hi a tha thawkhat viauin ka hria a, kan ramin a mamawh a ni a. Hetiang bill tha tak kan nei hi tunah chuan a tul chauh pawh nilovin, kan mamawh tak zet a ni, tih ka sawi tel duh a. Duhtusamah chuan, hetiang placement agency hawng thei tur hian criteria khirh tak siam ni se, ka ti a. A chhan chu, Mizo hming hawh chawpa siam mai mai te pawh thil awm ve thei a nih avangin hei hi hlauh thawn awm ka ti a. Chulai chu nakinah kan kenkawhna kawngah pawh strict taka kan tih a tha hlein ka hria.

Pu Speaker, Central Sorkar pawh hian a ngaipawimawh khawp a, immigration chungchang hi, tunah hian theihtawpa chakin hma an la mek bawk a. Chu chu keini pawh hian tun atanga kan lo inhmakhuuaa, kan harsatna lo tawh te leh kan hmalama kan in shape-na turah hian he thil hi thil pawimawh a. Nichina opposition ka nihna anga ka rawn oppose kha min lo chhinchhiah sak se; siamthat ngai laite a awm chuan "Opposition sawi a ni a," te min lo tihsak lo ula. Kan zavaia tana thil tha tur anihna angin min lo siam that sak turin ka ngen a ni e. Pu Speaker, ka lawm e.

SPEAKER : Member zahawmtak Pu C. Ngunlianchunga ilo sawm ang.

PU C. NGUNLIANCHUNGA: Pu Speaker, ka lawm e. Chawhma lamah khan 'Amendment nilo; a repeal hi a diklo a ni' kan ti a; kan chhuah lai khan thil diklo hum duh avanga ti ni awm deuh te khan kan han ri a. Mahse, kha dan kha a chhung thu kan sawi sel lo, a kimlo lai, a fel lo laia te siamthat kha kan support em em a ni. Amaherawhchu, a kalkawng a kha a dik lo a ni kan ti mai zawk kha a ni a.

Hei, kan Minister hi a fakawm ka ti a. Ama tih ang deuhin, bawngpa thlun phelh ang vah maia a kum khatah Dan pahnih a rawn ti thei hi a lawmawm ka ti a, a lawmpuiawm pawh ka ti a. Chutihruah chuan, chawhma lam thil kha thil thalo hum kan duh avanga ti kan nilo. Kha kha chu amendment type-in lo kal sela a dik a ni. Tupawhin a dik an tih ka ring.

Tichuan, tuna ka'n sawi tur hi a changtu minister khan, "Tun hmian Home Department lamah te a awm thin a, amaherawhchu, a kal dan a fuh tawklah avangin LESDE lamah dan thar siam a ngai a ni" a ti a. State dangah te pawh heng dan ang hi Home Department lam enkawl nilovin LESDE in a an buaipui thin niin kan lo hre ve a. Chuvang chuan, tun ami hi chu a kalkawng a rawn zawh dik ta a ni.

Hei keini ram hi chu state rethei, state hnufual kan ni a. Chumi avang chuan kan fate, kan naute, kan thalaite tun hnuah India ram pawna kan inthawn kan tih hi chu, Singapore tih te, Malaysia tih vel te a ni deuh mai em aw, ka ti a. Pathian leh thiante duhsakna avangin khawvel ram changkang thenkhatah te pawh kan kal ve zeuh zeuh tawh a; a bik takin USA-ah te khuan *vai* kan tih ang ho, state dang Maharashtra atang te, Tamil Nadu atang te leh hmun dang dang atang tea kal an tam em em a ni. Chungte chu hnathawka awm te an ni a.

Chutiang chuan, an thawh tur level erawh a inang lova. USA Maryland-ah te, Indiannapolis ah te leh Dallas ah te, Houston ah te pawh khuan petrol pump kan tih kha an ni chuan gas station an ti a, khung ho khu Indian an ni deuh tlangpui a ni. Chutihruah chuan, khang khan naute an nei a, hruai an lo nei thin a. India ramah ni khata skill-I hlawh cheng 740/- ang kha anni ah chuan hna hniam ber thawk pawhin nikhatah dar kar 8 te thawkin, an darkar khat hlawh kha \$8 a ni a. Chutiang a nih chuan, an dollar khat kha keini tan phei chuan cheng 80/- chuang a lo ni a. Kan hlawh a inthlau em em a ni. Chuvang chuan, a ram hausakna dollar hmang an nih kha an khua leh tuite, an pasal fanaute, an nupui fanaute leh an chhungte tan a hlu em em bik a ni. Vawiina hetiang Dan “*The Mizoram Private Placement Agencies (Regulation) Bill, 2025*” hi, a chhung thu chu sawi dawn ila a sawisel tur pawh a awmin ka ring tho a; a thalai te pawh tam tak a awm a. Chutih rual chuan, a lo tha lo deuh a nih pawhin, amendment te pawhin a la kalpui leh theih zel turah ngai ila.

A chhung thu pakhat kan sawi ve duha chu, Chapter 6, sub-section 16-a placement agency-ten a an va thawh chhuahte kum khatah an awm dan, an dinhmun te enpuia, an eizawna te, kum khat chhunga an chenna te an va thlithlai ang a, agency te hian detail record bu an nei anga, an hna hmuh te chu felfai takin a date nen an chhinchhiah thlap ang han tih kha a himin a tha a ni. Keini ramah chuan chemtum humin 500/- kan hlawh a, mistiri-in 1000/- an hlawh a, han chawr chhua hi a huphurhawm em em a ni. hetiang ram pawn, India ram mai nilo khawvel ram pawnah te pawh an kal theihna tur ruahmanna tha tak mai a han awm te hi, kan thalaite tan chona nasa tak a niin ka hria a. Chutih rual chuan, he House-ah vawiina he Dan “*The Mizoram Private Placement Agencies (Regulation) Bill, 2025*” kan sawi rual hian, kan thalaite pawhin helai ringawta inhnawh tawng lo hian ram changkang zawkah te, ram zau zawkah te, khawpui lian zawkah te kal ila, eizawna hi tam tak a awm a ni. Ka tih ve thin chu, hei Mumbai-ah hrisel lohna avangin ka in check-up thin a, ei tur pawh a tam a, eitu pawh an tam a, mihring an tam na na na chuan thawh tur pawh a tam a, chutiang chuan eizawna pawh a lo awlsam thin a ni. Vawinah hian Pu Speaker, he “*The Mizoram Private Placement Agencies (Regulation) Bill, 2025*” hi kan thalaite leh he Zoram tan hian tangkai tak a nih theih nan kei pawhin tha ka ti a ni. Ka lawm e.

SPEAKER : Tunah kan Opp. Leader kan sawm ang a, minute 5-a a khung len chiah loh pawhin kan hriatthiam thin kha.

PU LALCHHANDAMA RALTE, OPP. LEADER: Pu Speaker, ka lawm e. Kan Minister zahawmtak LESDE changtuin “*The Mizoram Private Placement Agencies (Regulation) Bill, 2025*” arawn pulut hi lawmawm ka ti khawp mai a. He bill introduction ah pawh khan a sawi Chiang a, Mizoram-in kan mamawh tak, vawinah chuan khawvel hi village pakhat anga inkal pawh zung zung theih a nih laia, harsatna tam tak sutkianna tura

kalkawng pawimawh a ni a. Sawi tak ang khan, 2015 ah he bill ang hi lo neih tawh a ni a, Home Department enkawl na hnuai ah he dan hi hman a nih avangin, thil hi a awk ai tam ta khawp mai a Ministry hmasa keini hun ve laiah pawh khan placement agencies-te hi registration zawng zawng LESDE hnuai ah ni siin, a tak taka an hna leh function zawng zawng enkawltu kha Home-ah nih a ngai a. India sorkar lam zawk nen thil thui Emigration Act te nena kaihnawih thilah hian DC te nena thil han tih ngai a awm a. Hengah hian thil laklawh tam tak a awm avangin kan mite hamthatna tur te, harsatna an neih nikhuaa an welfare ngaihtuah kawngah pawh a kawng hi a bai deuh thin a ni.

Hetianga Allocation of Business siam tharah LESDE hnuai ah he thil hi dahin, tun hnu ah he Bill chak tak maia Minister-in a bawhzuia, a rawn table thei hi lawmawm ka ti a. Amaherawhchu, kan member tam takte tan hian sawi pawlh thei tep awmin ka hria a. *“The Mizoram Private Placement Agencies (Regulation) Bill”* hi chuan a tlangpuiin India ram chhung hmun dang leh abroad-a foreign hnathawk turte a tlangpuiin a tin zawn deuh a. Helaia kan thusawi atanga lang chu, kan Minister hian hetiang bill a ti chhuak thei a nih chuan, reilo teah hian mizoram chhunga kan labours, domestic workers te leh shop & establishment hnuai ah thawkte hamthatna tur te pawh hi House-ah hian rawn pulut leh sela, ani hi a fit tha bawk a; he bill huangchhunga a tel dana hi tunah hi chuan a pawnlam deuh zawk hi a kawh tam deuh avangin, kan mamawh mek vawiina dawr nghaka kan chhawrte an ni emaw, thil dang danga kan mi chhawr, kan driver te, kan awmpui domestic workers te enkawl chungchangah hian a tha zawk hi a rawn duan chhuak leh ngei ka beisei tel tih kha kan sawi duh a ni.

Khawvel a insing a, America sorkar-ah Donald Trump-a a'n president takah hian khawvel ram hrang hrangte kan inkalpawh dan, kan insumdawn tawn dan te, hnathawktu kan inthawn dan te pawh tih danglam ngai a tam ta khawp mai a, India mi hnathawktu tam tak pawh an lo haw a ngai a. Chutianga chu khawvel kal dan a ni a. Tun boruakah pawh hian, kan minister sawi ang khan Emigration Act, 1983 hmanna hi a rei tawh a, chumi avang chuan Paliament nikum 2024-ah pawh khan Overseas Mobility Facility and Welfare Bill, 2024 lo lut tawhin, hemi chungchangah hian Parliamentary Committee on External Affairs, chu Committee Pu Sashi Tharoor, kan MP lar tak kaihhruaina hnuai ah khan he Immigration Act, 1983 chungchang hi enfel a, rawtna pawh mumal tak Central sorkar-ah thehluh a ni ta a. Chu chu rei vak lovah kan Parliament hian Immigration Act, pawh hi a thar an rawn ti chhuak dawn a.

Vawiinah hian hei hi kan hmanlai a nih avangin reference-ah kan hman lo thei lova. Reilo te ah hian danglam hi a awm dawn nual niin a lang a. Kum thar lo kalah amendment te pawh kan tih a ngaih leh kan ti mai turah ngai ila. Vawiinah Parliament-ah kha tak kha pass a la nih chiah loh avangin, reilo te ah an pass beisei a ni a. Chuta kan sawi 'protector of immigrant' kan tih te pawh kha state-a han hun hnaiha, state hrang hrangte pawhin an neih theihna turin vawiina kan harsatna tam zawk pawh hi chinfelna tur pawh kha a awm tih kha kan tarlang duh a ni.

Kan Bill section 13, sub-section 13 ah khan private placement agencies-te welfare check neih theihna tur a kum khatna ah a rawn dah a, a awhawm khawp mai a. A hnu ah khan mi

kum 4-5 te thawk ta se, welfare check neih nawn emaw, kan workers-te grievances han ngaihtuah zuina tur emaw kha a awm lo em aw, ka ti a. Kan Minister khan insert leh theih tur khan remchangah la rawn en ta se tha in ka hria a. Section 13, sub-section 3 ah khan, 'miin harsatna an neiha complaint an thehluhin, rang taka hmalak tur a ni' tih inziak a ni a, 'rang tak' kan tih hi a inang dawn lo khawp mai a, vaiho *ek-minute* pawh a rei khawp mai kan ti a. 'Rang taka hmalak tur' tih hi, dan ah hian engtin nge kan bilh ang? *Entirnan*: 'karkhat chhung talin' tih emaw, 'ni hnih-nithum chhung talin' tih emaw, a specific time a awm loh hi chuan, 'rang tak' kan tih hi a him kher em tih ngaihtuahna a awm a. Chungte chu kan Minister khan remchangah theih leh siamthat theih te ennawnin, tin, sawifiah deuh a la tha lo maw, tiin ka'n rawt belh duh a.

Tin, Section 6, sub-section 9 hnuaiah khan, 'kum 5 chhung license kan pe dawn a, ni 90 a la awmin license renew hi an buaipui tawh tur a ni' tih a awm a. Khami chhung khan a tling leh tling lo examination kan ti a, renew tlak loh te kan enfel nan hun pawh kan inpe tamin ka hria a. Khalaiyah khan eng tin nge ni renew tlak leh tlak loh kan tehkhawng kha, hun kal zelah rules-ah an rawn la ti tel zel turah ka ngai a ni.

Eng pawh nise, Pu Speaker, hetiang dan tha tak mai "The Mizoram Private Placement Agencies (Regulation) Bill, 2025" kan nei hi a lawmawm a.

A hmasaa 'amendment a tih awm' kan tih te nen khan a danglamna chu, a hmasa a mi kha chu 2008 ami mah ni se a changtu department hi tunah hian danglam daih avangin, thil danglam daih a ni a. Chuvang chuan, hetiang a thar hlaka lo kal pawh hi kan welcome viau a, a tha pawh kan ti viau a. Kan Minister pawhin hei hi kan pass chuan, a rang thei anga kan bawhzui hian kan Mizo thalaite mindset pawh a tha tawh a, hmun hla zawka hnathawk tur pawhin kan inhuam a, kan talent pawh a tha a ni. Hospitality sector-ah ngat phei chuan kan mite thawngchhuah leh kalte hian fak an hlawh fo a, thil tam takah pawh. Chuvang chuan, he thil hi Mizo thalaite tan hamthatna tur niin ka hria a, ka thlawp a ni e. Pu Speaker, ka lawm e.

SPEAKER : Opp. Leader of Opposition chungah lawmthu kan sawi e. Tunah chuan kan House Leader kan sawm ang a. Hei, House Leader te hi hun bituk a awm lemlo a nih kha. Kan House Leader-in sawi tur a neih te sawi turin ilo sawm ang.

PU LALDUHOMA, CHIEF MINISTER: Pu Speaker, sawi vak pawh a ngaiin ka hre lova. Kan inlungual tlang niin a lang a, a lawmawm khawp mai. Kan ngaihtlak tak ang khan a danpui ber, Central-in *Immigration Act, 1983* a neih pawh hi review mek a nih tlat avang hian a rawn danglam ve leh dawn a. Chumi chuan tuna kan siamthat pawh hi a rawn nghawng leh kha a rinawm viau mai a. Engtikah emaw chuan kan amend leh thuai pawh a ngaih duh hmel niin ka hria.

Kan han sorkar tirh khan vanduinah hrang hrang kan tawk a. Dubai leh hmun danga kan domestic workers tangkhang buaipui tur khan min hmuak a. Sorkar pawhin sum nuai tel sengin Dubai mai ni lo, Syria-ah te khan an lo awm a, indona hmun a ni si a. Tichuan, Syria-a kan Embassy a zim si a, han riahna hmun pawh an neilo a. Chuti chung chung chuan eng tin tin emaw mi tlawmngaite nen tang tlangin kan lachhuak thei a. Chutiang

chuan, mi tam tak thawncchhuah an ni a. ‘Éngtizia nge ni’ kan tih khan, agency-te khan dan tlawhchhan kan nei an ti ve miau a. Kan Dan hlui Section 2 leh Section 8-naah khan ‘beyond the boundaries of Mizoram’ tih hi hmun hnihah hian a lo chuang ve a. ‘Mizoram pawn chuan huap loh a nei hlei nem’ tih changchawi khan an lo thawncchhuak ve a. Amaherawhchu, khatianga Mizoram pawna thawncchhuah theihna dan kha Mizoram sorkar hian kan siam thian loh hrim hrim a, a dan kha a valid loh avangin siamthat a ngai hrim hrim a ni. Kha dan hnuai lo thawncchhuaktute pawh khan dan an bawhchhe ta hrim hrim a. Tichuan, a dik lo tawn ta a. Chutah chuan, kan han cancel nghal ta vek a. Kum tlinglo thawncchhuak an awm nual avangin case pawh kan register nghal a. *Protector General of Emigrants* atang hian phalna lak a lo ngai a, Ministry of External Affairs pawh an lo inhnawh a. Sanction kan hmuh lawk theih loh avangin tunhnaiah sanction min lo pe ta a. Chuvang chuan, kan police-te pawhin thil tvisual na nana kha chu a tul angin an umzui chho thei turah kan ngai a ni.

Tin, keimahn state chhunga registering authority awm thei tura kan department leh a changtu Minister hmalakna hi a lawmawm ka ti hle a, an rawn inbuatsaihna pawh hi a ropui a. Hemi piah lam deuhah hian kan mangangin Chief Minister’s Office-ah hian *Mizo Diaspora Cell* kan hawng ta ringawt mai bawk a. Kan ram atanga foreign a hnathawk buaina tawkte pan tur bik pawh hre lemlo khatianga an awm avang khan a lo buaipui vat turin cell i hawng ngawt teh ang kan ti a, extra constitutional platform ang deuh a ni. Phuahchawp deuh hlekin kan din a, chutah chuan hetiang lama mi hawizau deuh leh hriatna nei deuhte mi hrang hrang member-ah kan sawm a, chu chu a khat tawh hian buaipui tur a awm chuan, an thu ve thin a.

Tichuan Agencies ten an thawncchhuah hi chu thudang, Agency ten an thawncchhuah ni hauhlo mahni thua China-a lo lut ve ngawt mai te hi an lo awm thin a. Heta tangin Myanmar-ah an chho a, Myanmar atangin ke-in an lut a, eng passport-document mah kha an nei si lova. Tichuan, an lo man ta thin a, an phone te an chhuhsak phei chuan communicate kha a har em em mai a, ‘khawiah nge an awm, an thi nge an dam’ tih pawh kha hriat a har thin a. A maherawhchu, engtin tin emaw hian kan lachhuak thei thin a, hlim takin an lo hawng a, India ram an rawn thleng a. India sorkarin ‘passport act bawhchhia’ tiin thubuai an lo siam sak ve leh a, an lo hawn hnuah pawh thubuaiin a lo hmuak a, khatianga vel te kha a ni a.

Tunah pawh hian mi pahnih buaipui lai kan nei a, Catherine Lalhmangaihzuai leh Johnny Lalremruata te an ni a. Hemi hi Sucho Suzhou University-a doctor zirlaite an ni a. Nikum November thla atang khan an chhungte’n an be pawp thei tawh lova, an mangangna an rawn thlen a. Tichuan, kan External Affairs Ministry leh kan Embassy te theitawp an han chhuah a, an han zawng an han zawng a. Chutah chuan Wangshi ah China police-in an lo man a lo ni a. An phone an lak sak tawh si a, a buaithlak khawp mai a; doctor an zirna atang hian an manna kha a hla em em mai a. Chuvang chuan, ‘hengah engnge intih; doctor zir si’ tiin an ringhleh a ni maithei a, kan hre phak tawh si lova. Tunah hian kan la chhan chhuak hlei thei lova, kan inbiak pawh hnunng ber chu tun zirhtawp kha a ni a, chutah pawh chuan ‘an tha e, an dam e’ tih kha kan hriat theih chin a ni. An thubuai lampang kha chu han tih vak ngaihna kan hre lova, External Affairs Minister te nen pawh lehkha te kan

inthawn a. Tichuan, anni pawhin an theih ang angin min buaipui a ni.

Kha kha tlema a inkaihnawih deuh avangin ka'n sawi tel hram hram a. Hetiang kawngah hian kan fimkhur a ngai khawp mai a, khawi emaw lai ah kan vak chhuak a, document mumal nei mang si lova mi rama te kan lova luh hian, an lo man vaih chuan inbuaipui hi a har em em a ni.

Aw le, he kan Bill thar putlul hi a chipchiar thain a famkim thawkhat tawh chuan a lang a, Minister pawhin a rawn ulukin ka hria a, kan lungrual viau bawkin a lang a. Lungrual taka kan pass te pawh kan beisei a ni e. Ka lawm e.

SPEAKER : Aw le. Tunah chuan, kan Minister zahawm takin a Bill te windup-a House pass-pui rawn dil nghal turin ilo sawm ang u.

PU LALNGHINGLOVA HMAR, MINISTER: Pu Speaker, memberte thahnemngai takin, pakua (9) laiin kan sawi ho a, tha kan titlang niin a hriat a; a hmasa berin lawmthu ka sawi a ni. Members ten an sawi pawimawh laite kha ka lo chhinchhiah a, a then kan chhang thei ang a, a then kan chhang thei dawn lova.

Turial bialtu khan a chik hle mai a, lawmthu ka sawi duh a. A zir nasa hle a. Pu K. Laldawngliana khan a chik hle mai a. Kha ta a rawn sawi kha ka lo ziaa a, a then kha kan chhang nghal thei mai lova. Amaherawhchu, khami 'SP ten No Objection Certificate an pe ang' tihah khan, a hnial theih dan kha a awm si lova, 'engtinge' tiha kha; a hming khan a chingfel maiah ka'n ngai a. No Objection kha a ni a; an pek loh chuan *objection* a awmah ngai mai ila, an pek chuan *no objection* kha a ni dawn a ni. Tichuan, ngaihthatthlak loh lai deuh khan an nei a, Pu Dawngtea khan. Engti zawngin nge kan thlir ang aw tih kha ka rilru ah chuan a lo awm a. Tikhan, an inthawn chhuah danah hian '*ta se*' tih laia kha thil tam tak a awm thei a. Amaherawhchu, a tam zawk kha chu a ngaih a tha tho in ka hria. A ngaihthat thlak loh lai tea kha a han sawi nangin. A thuphung chuan a tha min tihpui thei kha a lawmawm ka ti a.

Pu Speaker, Pu H Ginzalala Champhai 'N' bialtu khan thahnemngai takin he a bill-in a ken tel piah lamah hian Mizo thalaite hnathawk tura kan inchhawr leh kan inrawih dan chungchangah hmasawn kan tulna (a ruaitu pawh, a rawiha te pawh) chungchang a sawi kha, a sawina platform tha takah ka'n ngai a. Mizoram rorelna in sang berah hetiang ang kan chai hian rah tha a chhuah ka ring a. Vawi leh khatah thil hi a inthlak vek thei lova, amaherawhchu zawi zawiin a inthlak thei a. Pu Speaker, thahnemngai taka khatiang hnathawktute Right lam lo buaipuitute an awm bawk a. Chutih rual chuan 'Right' kan han tih hian khuta *right* leh heta *right* te pawh hi a chang chuanin a inanglo ni lovin, a hmanna hmun azir khan a key kha a dang ve hret hret bawkin ka hria a, chungte chu tha takin a rawn address niin ka hria a.

Tichuan Pu Speaker Pu Jeje Lalpekhlua South Tuipui bialtu khan a tha a tih thu a sawi rualin, a experience te a rawn share a, a thil lo tih tawhte. Hei, Pu Jeje-a hi a rualpui Mizo tlangvalah chuan tawnhriat ngah tak pawl a nih ka ring a, ram pawna a hun tam zawk lo

hmang thin a ni a. Chutah chuan thil tha tak tak, hlawh tam a neih tirh atanga mi tanpuitua lo tang, chumi piah lamah chuan nichina a sawi ang khan, vai rama a awmlai pawha khatianga Mizo thalai hnathawkte tan a lo inpe tawh a ni a. A thusawi te kha a bengvarthlak bakah a chhuanawmin ka hria.

Ka'n sawilan duh chu, Pu Speaker, chawhma lamah khan sipaia navy lam lo tang tawh, football lama best player ni tawh te kha kan awm niawm tak a ni a. Kha kha han teh that leh chu a chakawm khawp mai a, best player nihna kha. Aw, hei, Pu Speaker, i hovin i vei lama mite nen hian han inkhel fiam ila a thain ka ring a. Saw, kan member Pu Robert-a te, Pu Rintluanga Sailo te, Pu Rinsanga te ho hi football hruaitu hlun leh footballer thin kha an ni a. Helamah pawh hian eng emaw zat chu an awm bawk a, tichuan a friendly-match zawng te pawhin ti chho ila a thain kan ring a. (**Speaker:** A best player lai kha chu kan zuk hmu ve si lova. a questionable riauvin ka hre deuh.) Pu Speaker chutah chuan best player kha teh that leh a chakawm a ni. Chuvang chuan, eng emaw friendly match hi i hovin Session zawh lamah hian bial zim deuh, ground zim deuhah emawa neih chu a chakawm khawp mai. (**Pu Robert Romawia Royte:** Tih ngei chi.) Pu Speaker,

Pu B. Lalchhanzova Aizawl East II bialtu khan a thil tawn tawh atangte leh ama lo vei ve zawng atangin a bill a tha a tih thu a sawi a. Tin, Lunglei East bialtu Pi Lalrinpuii khan Pu Speaker, Bangalore-a vawi tam tak hetiang a harsatna tawkte a lo chhanchhuah tawh dan a kha a sawi a. Pu Speaker House pawn lamah hian ka sawi ve vek a rem lo maithei a; 'Bangalore-ah hnathawk avang a buai hi kan lo chhanchhuak nasain kan lo buaipui nasa e' tih kha min share a. A sawi vek duhlo mai pawh a; an lo bei nasa tawh hle a ni.

A dawt lehah Pu Speaker, Dr. K. Beichhua kha ka fak hle mai. A lo zir chiang a, constructive criticism tak tak a niin ka hria a. A thil sawi zawng zawng ka zu react vek thei lova. Amaherawhchu, then khat, a bracket pakhat a sawi kha chu typing mistake a nih hmel a, I rawn observe dik chiah a. Tichuan, heti laiah hian (**Speaker:** 'child' aiah 'minor' tia thlak' tih kha a awm bawk a; 'Child' aiah 'minor'.) 'Child' tihlai chungchanga kha; hei, kan Dân hman ah hian Pu Speaker, 'child' tih hi a chang chuan kan hmang ve tho mai a; *minor* leh *child* hi hman pawlh thin a ni a. Kum 18 hnuai lam hi chu *minor* an ni a, *child* pawhin an dah ve tho a.

Entirnan: 'Protection of Children from Sexual Offences' tihah te pawh khan, *minor* ti lovin *child* (children) kha a hmang ve tho a ni. Chuvang chuan, tvisual êm êm lovah min ngaih sak mai se. A rawn point-out kha chu lawmthu ka'n sawi duh a. A hman kawp theih ve v ah min ngaih sak mai se. (**Speaker:** Kan Minister zahawm tak khan, *Opposition* sawi a nih vang ni chuang lovin, a tihna a nih chu.) Pu Speaker, khati zâwna min ngaih sak theih chuanin kan lawm khawp ang.

Tichuan, NOC chungchanga "Section 6 a mi leh Section 8 a mi hi a va inang lo ve", a tih kha, Section 8-a NoC hi a inanglo hret a. A chhan chu, Section 6-ah hi chuan keimahni license pêk tur kha a ni a; ramchhunga endikna tur kha a ni ta a ni. A rei hret a, a chhan chu, a license kha a petu kan nih bawk avângin.

Section 8-a NoC kha Pu Dawngtea pawh khan a rawn point-out a. Khatah erawh kha chuan State pawna license lo nei tawhte heti laia hna an thawh theihna tura NoC chauh a nih tak avâng khan, a reilo ta hret a. Kha kha a inan lohna, midang duhsak leh duhsak loh lam kha a ni chiah lo deuhin kan hria a ni.

Tichuan, kan Opposition Leader-in a a rawn point-out pakhat, ‘Rang tak’ tih laia kha, a rules 13(a) zawkah khan kan han bilh tel a. Rules 13 (9) ah khan, “The procedures and timeline for the submission and resolution of complaints and grievances shall be prescribed by the controlling authority in accordance with the law”, tih kha a lo inziak tawh tho a. Chuvâng chuan, kha kha min pawm sak theih chuan a hrilhfhahna ni ta mai se.

Tin, Pu Dawngtea rawn sawi tho niin ka hria a, ‘competent authority’ tiha kha, Chief Secretary a ni dâwn a. Chuvâng chuan, a hlauhthawnawm lo turah ngai ta ila a ða awm e.

Tichuan, Pu Speaker (**Dr. K. Beichhua:** Pu Speaker, khawngaih takin. Section 20(d)-ah khan ‘Fees and Conditions of (renewal) under Section-6 (6)’ a ti ta a. Section-6 (6) kha en ta ila, “Authority may make such inquiry or cause an inquiry to be made in respect of application received under the section”, a ti ta a ni. Chuvâng chuan, a fees lampang kha ni lovin, inquiry lampang kha a ni deuh zâwk si a. Hei hi kan tvisual palh a ni maw, ka rawn tihna a ni. Kha lai kha en chiang ta la.)

Sub-section 6 zâwk tiraw i refer kha? (**Dr. K. Beichhua:** Section 20(d) kha en ta la, a hnuah section 6 (6) kha en leh ta la a hriatthiam theih mai ang.) Section 6 (6) a nih chuan, a refer kha ‘a thu kha a inmil lo deuh e’ tihna a ni maw, a reference nen khan? (**Dr. K. Beichhua:** Pu Speaker, fees titu kha ni lovin, a inquiry titu kha a ni zâwk a. Section 6 (6) ah khan.)

Pu Speaker, a lawmawm e. Dr. K. Beichhua khan a rawn chik a. Khalai kha an refer-na clause leh heti laia inziakah khan inmil lo palh a awm a nih chuan, khami bik kha chu Pu Speaker, i remtihna in a en theih turah ka’n ngai a ni. Tichuan, Pu Speaker, helaia kan Opp. Leader-in a rawn sawi kha chu nichin khan kan react tawh a, a *ran* dan chungchânga kha.

Tin, a tâwp dâwn lama ka’n sawi duha chu, Pu Speaker, kha *Mizo Diaspora Cell* kha August Ni 13-a an ðutkhâwm khan tuna kan Bill put luh tura hi, “a hmanhmawh thlâk e; a theih angin i tirang ang u, harsatna tawk an awm reng si a. Kan Dân hman hian a cover vek loh avângin”, an rawn ti a. Chung te chu hna chak zawka thawk tura min turtu a ni a, a ðangkai hle a. Kha kha thil lawmawm tak a niin ka hria.

Tichuan, ram pawna hnathawh kan sawi a. Pu Speaker, kan hre ðeuh ang a. (**Speaker:** Kan Minister zahawm tak khan ‘*Opposition sawi a nih vang ni chuang lovin*’ a tihna a nih chu.) Hei, ‘NoRKA’ kan tih hi *Non-Resident Keralite Affairs*, niin, Kerela mi ram pawna thawkho, khumi an government agency tho a ni a. An data ka’n enchhin a, anni chuan mi nuai 21 vel hi ram pawna hnathawh an lo nei der mai hi a ni a. Tichuan, an state economy khu a let zawngin pawisa an rawn pe a ni. Chu chu an statistics atanga a lan dan chuan, khawvel hi ram 100 ni ta se, ram 93 ah Kerela mi hian hna an thawk tih a ni a.

Mizote pawh hi kan Diaspora Cell atang hian emaw, a nih loh pawhin department atang hian emaw data hi lakkhawm kan lo tum ang a, ram engzatah nge hnathawk kan awm ve tih pawh hi hriat a chakawm vein ka hria a; ram pawna hnathawk hi kan thahnem ve tawh hle a ni. Amaherawhchu, regulate a nih tak loh avang leh inziah luhna bik a awm tak loh avang khan, a then chu vai ram atangin an kal a. Nichinah khan tunge ni kan Member zinga rawn sawi, ‘Myanmar lam atangin China ah an kal’ tih te kha thil diktak mai a ni a. Tin, chu mai chu ni lovin, a hla lehzual Japan lam te khian min ko nasa em em mai a. Tun hnaiah Indo-Japan Intellectual Summit ah kei pawh ka zuk tel a, chutah te pawh chuan Japanese ho hian hnathawk turin min duh a ni; a bikin Northeast lam hi min ko a. State dang hian min hmakhalh nasa hle mai a, kan tan chhoh lehzual te pawh a ngai dawn a. Nurse te an duh a, kan tirchhuak ve reng a, ‘care-giver’ an ti a, nurse ni chiah lo, kum upa deuh enkawl tur te leh midang han pui thei tur te chu tun hnaia Finance Commission Member lo kal pakhat pawh khan sorkar nena kan inkawmnaah khan a point out nghe nghe a; ‘Mizoram chuan helam hi hawi rawh u’ te kha min han ti a.

Tin, chumi hnu lawkah NITY-Aayog Member Dr. VK Paul a lo kal leh a, amah leh a team-te rawn sawi chu, chu tho chu a lo ni ta a ni. Chuvang chuan, Pu Speaker kan zavaia tangrualin mahni bial theuhah, *eptu leh ruling* tih lam awm chuanglo khan tangrual ta ila, thil tha tak, thalaite eizawna siam kawngah hi chuan inpui tlang dial dial ila a thain ka hria a.

Chutiang taka kan thawh theihna tur chuan, tuna kan Bill putlul – “*Mizoram Private Placement Agencies Regulation Bill 2025*” hi min pass-pui turin House hi ka sawm e. Ka lawm e.

SPEAKER : Kan Minister zahawm takin, “*The Mizoram Private Placement Agencies Regulation Bill 2025*” chu House pass-pui turin a rawn dil a. Tunah kan buk ang a.

Pass remti apiangin, “*Remti*” ti ula; remtilo kan awm chuan, “*Remtilo*” ti rawh u le. (*House-in a remti a*) A lawmawm e.

Tichuan, “*The Mizoram Private Placement Agencies Regulation Bill 2025*” chu House hian lungrual takin a pass ta a ni. (**Pu Lalnghinglova Hmar, Minister:** Pu Speaker, ka lawm e.)

Vawiin atana kan business chu kan zo ta a. Naktuk March Ni 4, 2025 (Chawhma) 10:30 AM ah kan thukhawm leh dawn nia.

Sitting is adjourned. (4:02 PM)